

LIBELLE
Observationes
Medicæ de Pelle
Bruxinensi.








21


W. C. 32³


G. XX. 25


24,573/B













4250
7)


LAURENTII GISELERI
OSTERODENSIS MED. D.
ET PHYS. REIPUBL. BRUNSVI-
CENSIS ORDINAR.
OBSERVATIONES
MEDICÆ
DE
PESTE BRVN-
SVICENSI

Anni M DC LVII.



BRUNSVIGÆ

Sumptibus CHRISTOPH-FRIDERICI ZILLIGERI,
ANNO M DC LXIII.



INCLUTÆ REIPUBLICÆ
BRUNSVICENSIS
MAGISTRATUI
VIRIS

*Nobilissimis, Amplissimis Consultissimis,
Prudentissimis, Clarissimis*

Dnn. CONSULIBUS

Dnn. CAMERARIIS

Dnn. SENATORIBUS

Dnn. DECEMVIRIS

ut &

EJUSDEM REIPUBLICÆ
TRIBUUM MAGISTRIS
PLEBISQUE TRIBUNIS
VIRIS


*Spectatissimis, Honestissimis, Vigilantissimis,
longoq; rerum usu Experientissimis*

Patronis, Fautoribus & Amicis eâ, quâ par est, animi
devotione honorandis, suspiciendis, & amandis

D. D. D.

LAURENTIUS Gieselex D.
Medic. Ordinarius.





S*Eneca Ovidium à describendo Ætna deterri-*
tum refert, quod illum à Virgilio jam sciret satis decanta-
tum. Subiit non semel animum meum cogitatio Amplis-
sime Senatus, Statusq; spectatissimi, nonnulla, quæ obser-
vata prateritâ sava peste heic sunt, publicæ luci dare, cum
quadam notaverim, quæ non facile alibi occurrunt, aut te-
merè legas apud ullum scriptorem. Verùm enim verò idem mihi ferè con-
tigit, quod Ovidio in describendo monte Sicilia, qui vulcano sacer erat,
quiq; per noctem flammæ evomebat per hiatum stadiorum XX. Conspecto
enim & perlecto Athanasii Kircheri Mathematici Romani longè celebra-
rimi, ingeniosi sanè & summè industri Viri de Peste libello illicò hæsit ani-
mus, calorq; pene omnis & fervor quicquam de hac re commentandi eva-
nuit, tum quod haut vanè forsàn conjiciebam, vix quidquam addi posse
novis istis Kircheri ingeniosè inventis, (quanquam non omninò librum
istum ab absurdis quibusdam possis vindicare) tum quod bene sciebam va-
ria hanc meam scriptionem experturam judicia, eaq; plurimùm diversa &
perversa, quanquam non stimulet me vesana quorundam libros scriptu-
riendi libido aut insatiabile scribendi cacoëthes, præstareq; sapius Socratis
tis exemplo λαθὲν βιώσαντας, eoq; agrius potui à me hoc impetrare, quò me-
arum magis ipsarum virium bene mihi ipse sim conscius: Et tamen ante
omnia necessum est se ipsum æstimare, quia ferè plus nobis videmur
posse, quàm possumus Senec. de Tranq. animi c. IV. &

*Turpe est, quod nequeas, capiti committere pondus,
Et pressum inflexo mox dare terga genu.*

Vicit tamen tandem clarorum quorundum Virorum instinctus sti-
mulusq; & vestrorum præcipuè nonnullorum, Patres Amplissimi, admonitio,
imò & compulsus etiam in publicis solemnibus congressibus plus semel repe-
titus

titus, huic enim reluctari justaq; vestra' postulationi diutius obniti nefas duxi, officioq; meo minimè congruum.

Debentur autem Historia hæ præ aliis Vestro Magnifico & Amplissimo Ordini, atq; iis, qui Vobis proximi consiliorumq; arctiorum sive secretiorum non postrema pars sunt, Decem Viris scilicet, Dominis & Amicis itidem meis spectatissimis, Vos enim me pro Medico vestro ordinario ultrò constituere dignati estis, & hæc ita acta esse in Republica vestra bonam partem ipsi novistis, tum ut vobis in memoriam revocem singularem divini Numinis clementiam, quâ nullus ex Dnn. COSS. dira hac lue affectus est, etiamsi hujus aut illius ades furorem pestis expertæ fuerint haut mediocriter. Nec Vos, Status & ordines inclutæ nostræ Reipublicæ celeberrimi, qui & ipsi in partem curarum publicarum venitis, & certos in Republica honores geritis, debuistis præteriri, quod enim omnes tangit, debet ab omnibus vel probari vel rejici: Vobis vero vestrisq; & pestis tempore & nunc maximam partem medicinam feci, & ut spero, non infelicem eam, aut planè infrugiferam, ideoq; potestis & Vos de his judicare ipsi, eaq; vel commendare vel reprobare. Hæc si vobis placebunt, abunde lætor, sin secus, feci tamen, quod jubentium voluntati fuit congruum. Accipite ergo Patres P. Amplissimi, Decem Viri spectatissimi Ordinesque honoratissimi, Observationes hæc eo, quo Vobis offeruntur animo, & eum, qui dudum vester fuit, benevolentia & favore vestro non exuite. Quod reliquum est, precor & opto animitus, ne concedat Altissimus in pejus fluere retroq; sublabi res vestras, sint potius tutæ omnes & tranquilla, adfluentia opum ingens, Regum Principumque in vicino atq; etiam procul Gratia & Benevolentia erga Rempubl. Vestram firma sit atq; perpetua. E Museo meo, quod est Brunsviga, ipsis Idib. Mart. Anno M DC LXIII.

HERMAN. CONRINGIUS
LAVRENTIO GISELERO M.D.

V. C. & Physico inclutæ urbis

Brunsuigæ eximio,

S. P. D.

Non possum non laudare institutum tuum, Clarissime GISELERE, publicandi historiam eorum quæ tibi in nupera illa lue pestilenti, qua inclyta urbs Brunsuiga graviter fuit afflicta, obtigerunt. Cum enim, ut aliarum artium scientiarumque, ita & Medicinæ nostræ, duo sint immota fulcra, Experientia & Apodictica Ratiocinatio, quas inter illa ut tempore prior ita certitudine alteri parest; hinc indagaturis mali istius naturam omnem & rectam medicationem necessum est, Experientiam ante omnia ut consulant. Et quidem cum Experientia propriè in singularibus eventis occupetur, ex singularibus autem illis jam compertis demum universalia axiomata formentur; quæ itidem, etsi minus rectè, Experientiæ attribuuntur; non potest non ipsum scientiæ omnis exordium ab illa, quam Tu instituisti, Experientiæ specie accipi. Nec tamen hætenus ferè quisquam, circa hoc quidem morbi genus, multa adeò publicè communicavit singularia experimenta, quàm abs Te est factum: eoque tanto majores tibi gratias posteritas debebit. Id quod ideò etiam poteris tibi certò polliceri, quandoquidem haud videtur mihi pestilentium morborum cognitio plenè hætenus nobis innotuisse: cum tamen intersit plurimùm tam funesti & tetri mali nihil ignorare. Multiplex scilicet luis forma uno Pestis nomine comprehenditur: quæ omnis hoc quidem habet commune, quod magnam hominum stragem ci-

tò edere soleat, cœtera autem multum est difformis, variamque proinde curandi rationem postulat. Præterquam sanè quod colica quædam pestis jam olim Paulo Æginetæ fuerit memorata, Pleuriticæ, Peripnevmonicæ, Phreneticæ, Hepatiticæ, Anginosæ, Sudoriferæ, patrum & nostra ætas perpeffa est: quasdam etiam à causis naturæ vires excedentibus profectas. Quamvis etiam longè sint frequentissimæ quas bubones & carbunculi comitantur, etiam illæ tamen aliis quàm multis symptomatibus plurimum sæpè diversæ sunt. Quod vel ex illis liqueat, quæ Rolandus Capellutus de Peste Parmensi retulit singulari opusculo: quod ego propterea dignum jam antehac censui quod abs me denuo in lucem revocaretur. Ac Tua quidem observata illustrant cum primis bubonice Pests naturam & medelam. Eo autem illa sunt utiliora, quo illud mali genus mortales nos affligit sæpius, atq; adeo sæpius cum præcaveri tum tolli debet. Nec verò veterum quidem monumenta hic nos multum juvant. Imò vereor ut illi pestilentium morborum omnia habuerint plenè explorata: quamvis Hippocrates isthoc cum primis nomine quam maximè soleat laudari. Salthim paucis utique violentia, nunquam penè non in Peste grassantis, contagii perspecta videtur. Quæ res superiore seculo ipsos magnos illos Medicos Patavinos, Capi vaccium, Mercurialem, & Aquapendentium circa Pestem Venetam & nostrum quoque Joannem Cratonem circa Germanicam, in gravissimos errores conjecit. Tuæ sanè Observationes luculenter & contagii & pestilentis veneni vim ostendunt: non catharticis scilicet, non venæsectione, sed alexipharmacis potissimum profligandam. Imò nihil penè non rectæ de Peste Bubonica doctrinæ, explosis Helmontianis similibusq; de illa deliriis, Tua illa observata mirificè confirmant. Quapropter ipse etiam, quæ antehac & ore & scripto de Peste docui, tuis illis perlectis, jam majore quadam fiducia & teneo, & aliis trado. Perge verò, mi GISELERE, ceu cœpisti; & quicquid obtigerit in facienda arte dignum memoratu, pristina diligentia calamo annota. Ad hoc opus sanè, præter insignem proprium tuum usum, invitant Te exempla maximorum quorumq; mendendi artificum, imò ipsiusmet principis Hippocratis: cujus Epide-

mia

mia utique non alterius sunt argumenti. Vale & plur. salve. Hel-
mestadii in Acad. Julia 3. Non. Mart. 1663.

*Ex alia ejusdem Conringii Epistola
exceptum.*

REvertitur tandem ad Te liber tuarum circa Pestem Observationum.
Perlustratus ille est à me, simulq; in conventu Collegii nostri mul-
tis nominibus laudatus omnium accedente suffragio. *Et post alia:* Li-
ber tuus mihi cum primis per placet, adeoq; me iudice dignus quàm ma-
ximè est, qui videat lucem publicam. Id sanè excitabit exemplum alios
ad similem industriam adhibendam, eoq; rem medicam experiètiâ
confirmandam. Perge v. Tu, quo cæpisti modo Artem nostram & fe-
liciter facere & observando juvare atque illustrare, simulq; longum
vale multorum commodo.

In observationes de pestilentia Brunsvicensi
CL. V.

LAURENTII GISELERI.

NUminis irati vindex & triste flagellum
Dira lues, miseris terris incumbere iussa,
Mista senum ac juvenum nullo discrimine densans
Funera, nec pueris parcens tenerisve puellis,
Civibus atque urbes viduans agrosque colonis;
Tam variis horrenda modis vultuque habituque
Incedens late stragem mortalibus infert.

Nil memorare juvat, quas senserit Ausonis ora
Vastæque Parthenope clades. Byzantia regna
Mitto & Sauromatas. Patria ô satis ipsa malorum
Est experta domi, casus nec postulat ullis

Illustra

Illustrare suos peregrinis. Ecce recentes
Luget adhuc obitus & funera acerba suorum
Atque rigat lacrymis mœstas Brunonia tumbas.
Teque eadem rapuit tunc vis, Hieronyme dulcis,
Et quondam pars magna mei. Succurrere fessæ
Dum patriæ satagis, tætri morbique nefanda
Sævitiæ pressis præsens afferre levamen:
Occidis exanimis, properata morte peremtus.
Usque geram memori te pectore: nulla vetustas,
Nullaque te menti eripient oblivia nostræ:
Donec in ætherea rursus sociabimur aula.

Felix, Laurenti, rigidi violentia fati
Cui parsit, ne plane omni spoliata periret
Civica res, afflicta nimis, solamine fido.
Vive diu, incolumisque feras languentibus ægris
Auxiliatrices herbas succosque medentes.

At tu, siderca cæli qui celsus ab arce
Despiciens mundum hunc æterna lege gubernas,
A nobis posthac tales avertere pestes
Et quæcunque velis morborum semina clemens.
Sis nobis placidus, Patriam pax incolat alma,
Et donis ditata tuis plenisque canistris
Usque suas effundat opes nutricula tellus.
Sic bellirabie procul & contage maligna
Ævum hoc degamus tum nos serique nepotes.

Valentinus Henricus Voglerus.

Magnus erat quondam Hippocrates, artisq; medendi
Præcipuus, famâ celsum super æthera notus;
Depositos capulis agros & faucibus orci
Eripiens, sævô fere jam Plutone vadatos:

major

Major erat, medicae leges dum condidit artis;
Quæ densâ quondam jacuit caligine seclî
Obruta, & arbitrio vani temerata popelli:
Maximus ingenio, pestem amolitus Athenis,
Professusq; luem succensâ cedere sylvâ.
Hinc statuam magnosq; Viro decrevit honores
Græcia, summorum genitrix memoranda virorum.
Maçte animi Giselere! Senem felicibus ausis
Dum sequeris, medicasq; manus languentibus agris
Porrigis, aut nomen scriptis in secula proferis,
Horrendumq; doces laqueos corpore virus
Pellere, successu non infelice medendi.
Ipsa tibi Virtus pro tanto munere grates
Persolvat meritas, nec edent obliviam famam.

Testandæ benevolentia
scribebat

Paulus Neufcrantz / Phil. & Med. D.
Reipubl. Lubec. Medicus.

Ad Nobilissimum, Excellentissimum Experientissimumq;
VIRUM

Dn. LAURENTIUM GISELERUM MED. D.
ET PHYSICUM REIPUBL. BRUNSVICENS.
CELEBERRIMUM,

Cum observationes Medicas de Peste ederet.

Dum tu describis diri mala semina morbi,
Et docto calamo singula quæq; notas,
Quid faciat morbum, quæ sit Natura Veneni,
Et quam deposcat languidus ager opem,

b

Hybleas

*Hybleas imitatis apes, quæ cuncta pererrant,
Et docili rostro dulcia mella parant
Natura cælestis opus: sic plurima condis,
Plurima sic solida, qua decet arte legis
Quæ tibi cum cedant, Musis Phæboq; secundis
Virtutis merces GLORIA parta tibi est.*

Joannes Albertus *Sus*wedel Phil. & Med. D.
Reip. Hamburgens. Physicus Ordinarius.

*Ad LAURENTIUM GISELERUM M. D.
& Physicum Brunsvicensem, observationes
suas edentem.*

SAlve, delities amorque Phœbi,
Laurenti, cui plurimum favemus,
Quicunque Aonias amamus artes,
Et Coi studiis sacris tenemur.
Nam, quicquid vehit ignei veneni
Pestis, seu volitans die per auras
Claro, seu mediâ ferens sagittas
Acres nocte, doces, notasque chartis
Doctis, & statuis modum veneno,
Ne instar fulminis afferat venenum
Clades, mille modis nocere tentans.
Sanè, difficile & laboriosum
Opus, quodque dedit Stygis paludi
Plures, dum cupiunt notare lethi
Vim, lethique modos, mali que causas.
Felix tu, ter & amplius, vocandus.
Non frustra tibi contigit cavisse
Pestis tela, notando vim veneni,

Curan-

Curandique modum parùm expeditum,
In re difficili & periculosa.
Vale, præsidium decusque Coi.

*Christianus Busmannus Ph. & M.D.
& Physicus Hanoveranus.*

*Ad Amplissimum & Experientissimum
Virum*

**Dn. Laurentium Giselerum Med. D. &
Physicum Brunsvicensium meritisimum;**

*Affinem & Amicum plurimum colendum, Observationes
de Peste edentem,*

Res cedro digna est, magnâ dignissima laude
Herbarum vires callere, usumq; medendi:
Hydropem, sævamq; luem, febriumq; cohortem
Arte salutiferâ novisse repellere dextrè.
Non minus est præstans, sed nec minus utile factum,
Ingenii monumenta dare, & conscribere libros,
Quæis possis etiam seclis prodesse futuris.
Tu, GISELERE, uno minime contentus utrumq;
Conjungis, morbosq; fugans, doctumq; volumen
Evulgans de Peste tuum. Tibi jure vicissim
Hinc geminus debetur honos, hinc postera saltem
Ætas quam tribuet, Tibi laudis adorea surgit.

Helmstadio mittit

Andreas Frölingius in Acad. Juliâ P.P.

Præfatio ad Lectorem.
Εἰς Πράττω.



Uintus nunc labitur annus, Benevole Lector & candidè, quò dira lue pestifera mirum in modum affligebamur, tot millibus paucorum mensium spatio sævâ peste intereuntibus. Semestri, & longiori, illo tempore observata mihi nonnulla sunt, quæ utrique merentur tecum, Lector, ut communicentur, eris tamen prius de quibusdam amicè admonendus. Et primò quæris forsitan, cur non citius hæc publicaverim, tot annis interim elapsis? Hujus facti rationem habes in dedicatione.

Præterea librorum multitudo non parit scientiam, sæpe etiam impedit & discentem potius onerat turba librorum, quam instruit Seneca effato cap. IX. lib. de Tranq. animi, multoq; satius est paucis te Autoribus tradere, quàm errare per multos. Quò etiam respexisse videtur Martialis Epigramm. lib. IV. Ep. XXII. inquit:

*Obstat chære Pudens nostris sua turba libellis
Lectoremq; frequens læsat & implet opus.*

Cui nunc addo consilium Horatii, lacubrationes scilicet nonnum debere premi in annum, nec ita statim nimio sui amore in publicum protrudendæ, aliàs paucis mensibus potuissent hæc absolvi. Quæris secundò, cur non ubique apposuerim ipsa, quibus in singulis subjectis usus fuerim, medicamenta, & curandi modum? Fateor certè, è re hoc futurum fuisse juniorum medicorum & commodo, iis enim ut filo ariadnéo felicius & facilius è difficili & intricato pestis lahyrintho se expedire inq; rectam sanitatis semitam ægros suos deducere posset, tantum enim vix superest sæpe medico temporis grassante peste, præsertim in magnis & populosis civitatibus, ut prius evolvere possit hunc vel illum autorem de Contagio commentantem, & consulere illum, quid in hoc vel illo individuo variis sæpeque diversis symptomatis infestato maturè facto opus sit. In hoc, inquam, non frustra posuisssem operam, si cuilibet observationi sua medicamenta apposuissem, ut utroque extemplò, exemplo scilicet & remedio, poruisset uti medicinam ægrotis facturum. Verùm enim verò condonabit ex facili mihi, qui cum animo suo reputaverit, quàm molestissima & laboriosissima fuerit praxis eo tempore, paucæ enim horæ, etiam quæ edendi tempori destinantur, mihi fuerunt vacuæ, quibus non continuâ ægrotantium curatione fuerim interpellatus, & avocatus: à summo insuper manè ad crepusculum usq; vespertinum cursitationibus per plateas defatigabar, ita ut precationem matutinam recitare ordinariam mihi sæpe haut fuerit integrum, nedum speciatim notare, quæ cuivis subjecto præscripserim. Eam ob causam ex tot millibus vix hæc pauca potuerunt observari accuratè: Audita, & quæ non accuratè & quasi cum nota notavi, tecum, Lector communicare nolui, aut tibi obtrudere. *Historia quippe est secundum Verrium Flaccum apud Gell. V. Noct. Atticar. c. XII. proprie narratio earum rerum gestarum, quibus rebus gerendis interfuerit is, qui narrat.* Imò planè de me possum polliceri, quod Dion Cassius de seipso lib. XXVII. dum inquit: *Hæc autem Ego, cateraq; omnia, quæ sequuntur, non ab aliis audita, sed à me observata notavi.* Aliàs plura fortè millia, quàm hic vides centurias, curavi, quorum tamen pars magna cum his affinitatem & similitudinem habet,

bet, ut ita non fuerit necessum singulis observ. medicamentorum formulas adscribere: Videbis tamen sparsim medicamenta in multis observationibus posita, quibus cum sperato fructu uti licebit, potiora nonnulla, quorum Ego vim expertus sum efficacem, quibusq; præ aliis plurimum fidendum, deinceps notabo. Tandem quis tacite posset secum musitare & pendere animi, an omnia ita contigerint, uti narrantur, & anne concipienti placuerit interdum *ἡρώδης*, cum paucis fortuna ita illucescat, ut superstitēs à peste, qua cum continuo pugnandum ipsis fuit, maneant, & incolumes, rei q; veritati possint attestari. Ferè simili modo, uti *Vossius de Idololatria gentium* inquit: *Indorum scriptores maximam partem mendaces fuerunt. Et Strabo lib. XI. quod difficulter redarguantur, quæ de longè distitis narrantur.* Quæ scabie Græcos historicos laborasse multi notârunt. Hinc Euripides in Iphigenia:

Fidem Græcia non novit.

Et juvenal. Satyr. X.

- - Et quicquid Græcia mendax

Audet in historia.

Et Aurelius Victor in Caligula: Græcorum dicto, queis augendi omnia studium est, Verum cum plures adhuc per Dei gratiam, quibus feliciter medicinam feci, vitali fruuntur aura, possunt isti testimonium dare omni dubitanti, fidemq; meam omni deprædicare modo, mihiq; ubi opus fuerit, in hoc *μαρτυρεῖν*. Commodum pro me hic possum adducere Herodianum, qui sub initium lib. I. ita loquitur: Ego non quidem acceptam ab aliis, aut incognitam, aut testibus egentem historiam, sed eorum, qui legent, sensibus adhuc memoriæq; inhærentem, summa vel fide, vel diligentia collectam, conscribendam suscepi.

His prælibatis restant adhuc quædam addenda de præservatione, præcautio enim morbi est causarum illius vel declinatio, vel prius quam lædant remotio. *Serò enim animus ad periculorum patientiam post pericula instruitur Sen. de Tranquill. animi c. IX.* In ea multi & magni committebantur errores à quam multis, qui nimium vitæ suæ timebant quod hic notare omnino necessarium duco.

Inprimis verò vitæ emendatio præcedat oportet, ut homo sit Dei metuens, integer vitæ, scelerisq; purus. Cum terra Attica, magnâ pestilentia laboraret, incolisq; in magnis angustiis constitutis Pythia consulta respondisset, expiari oportere urbem & agros, nec, cui Deo sacrum fieri oporteret, dixisset, Epimenides, qui tum Athenis fuit, iussit dimitti hostias per agros sequiq; eas sacrificos, & in quo loco quæq; constitisset, ibi maclari eam immulariq; Deo ignoto propitio. Eò respexit Lucas in Actis Apostolorum c. XVII. inquit: *εἶπον ὃ βωμὸν, ἐν ᾧ ἐπερχεσθαι, ἀγνῶστον θεῷ.* Et Pausanias *θεῶν ἀγνῶστον βωμοῖ, ἀρα διῷ ἄγνωστον ἅγια.* Nos Deo ignoto sacrum facere aut ipsi hostiam immolare non debemus, cum nobis Christianis satis constet ex sacro codice, cui Numini divinum honorem exhibere debeamus. Constat autem honor iste aut sensu aut cultu. Utroq; venerandus omnipotens & misericors Deus est, ut contra luem pestiferam nos muniat, contraq; illatam medicamenti vim addat eaq; efficacia esse jubeat.

Præservamus corpora nostra præmunimusq; nos ab ingruente hoste Sex rebus, non Naturalibus medicis dictis, de quibus singulis *ἡ δὲ βροχίαν* & fortè *παχύτερον*. Aër, quem primum in istis numeramus, in corporibus nostris alterandis plurimum valet, eo enim ne horulæ quadrante carere conceditur nobis, nunc rarefacit, nunc densat corporis habitum, jam frigidus eo, jam calescimus inde intensè, nunc agiles, torpidiores, nunc ejus afflatu inspiratuq; reddimur,

Tanta equidem vis est aëris per cuncta meantis,
ut etiam antiquitas divinitatis nomine ipsum insigniverit, eundemq; Diogenes Apollinaris Deum
b 3
appel-

apellare non dubitaverit. Variat autem Aer multum ratione loci & temporis, ita enim *Hipp. de aere aq. & loc.* *Loca & tempora diversa formarum naturam variant.* Situs itaque cujusque loci maxime attendendus. Urbis nostræ positus satis salubris & commodus, in plano enim ædificata undiq; ventis perflatur, solisq; orientia lumina optimè aerem illustrant, nec sylvæ aut luci ventos, quò minus ventiletur aer, excludunt, estq; ita affabrè constructa & artificiosè urbs universa, ut cum amplissimis & elegantissimis Imperii urbibus certare posse non immeritò quis dicat, non videas hæc platearum flexuosos gyros & incongruas ambages cæno lutoq; refertas, nec extra urbem conspiciuntur multa stagna paludesq; cænofo maleque olente limo abominabiles, potius immenso gaudet aquarum beneficio non longâ mora in alveo suo putrescentium, sed continuo & rapido cursu urbem mediam perfluentium, in quibus natantes conspicias pisces, quos plurimi ad fluminis alveum habitantes capiunt. Ocra siquidem magnus fluvius & altus in sua brachia divisus plurimas utilitates nobis affert, cujus beneficio

- v Nec ingrato Vici vitiantur odore.

Ædificia splendida, ampla & elegantissima, horti intra muros plurimi & amœni, omnis generis arboribus plantisque confiti, ut ita aeris ratione præ multis aliis locis meritò queamus gaudere. Ad elegantiam & claritatem civitatis nostræ etiam hoc, quanquam huc propriè non spectet, pertinet, scilicet quod non sit nimis parva, quam ne quidem esse civitatem Aristoteles autumat, quamque suis ipsam opibus non pollere, quod tamen civitatis proprium sit: nec nimis magna, magnitudine enim nimia non civitas sed gens fit. Tempore pestis si temperatus aer est in qualitatibus primis, optimus, si longius abit à *συμμετρίᾳ* ista, eò reducendus est, luculentus ignis ad purificandum aerem optimum censetur remedium, non est tamen plus justo siccandus aer, cum hic pestem faciat acutiorem ex *Avicenna sententia*, propterea diebus æstivis & calentibus possunt suffumigia fieri ex aceto cum rebus refrigerantibus ut ros. nymph. santalis &c. insternendæ quoque herbæ virides frigidiores ædium pavimentis. In cibo & potu plures delinquant potius, meâ opinione, nimis ad libellam vivendo, quàm si paulò liberalius viderent, multi enim ita tenuiter & parcè vivebant, omninò ut mutaverint corporis temperiem, qui dein peste correpti viribus citò exhauriebantur morboque ut plurimum succumbebant. Propterea nulli ero autor, ut pestis tempore esuriat, vel *Celsi monitu lib. III. c. VII.* aut de consueto demenso demat quicquam, nec prodeat in publicum ventre vacuo. Non tamen susque deq; habenda *Διάτῃ* est, utpote quæ multum momenti ad firmitudinem corporis conferat, nec ullus ex cibo ita replendus secundum *Avicenn. tert. pr. cap. de regimine ejus, quod comeditur, ac bibitur, ut non sit ibi locus superfluus, sed ab eo removendus reliquis desiderij adhuc in anima remanentibus*, planè ad exemplum Cyri Persarum Regis laudatissimi, qui scribitur nunquam satur de mensa surrexisse, & nunquam sine appetitu accubuisse. Optima profecto ratione, nam quæ parcè sumuntur, etiam non optima alimenta, superantur facilius à facultate coctoria, & in exercitatione melius est excedere, in cibis melius est deficere dicebat *Philos. 2. Ethicor. ad Eud. IX.* & non satiari cibis, & impigrum esse ad labores, sanitatis studium esse inculcabat *Hipp. VI. de morb. vulg. IV.* & apud *Macrobius VII. saturn. cap. VI.* dicit *Disarius medicus doctissimus*, vitandos esse cibos, qui ultra famem sitimq; appetentiam producerent. Hinc cibi parcitatem ad corporum proceritatem facere habet *Plut. de Vit. illustr. in Lycurg.* Et existimârunt cum *Erasistrato* medici antiquiores, hominem ferè semper ob alimentum agrotare, quod vel sit immodicum, vel incoctum vel corruptum, propterea rectè *Hippocr. & Serenus* dixerunt, Ventrículum errantem toti corpori incommodare, eleganter *Phocylides*:

Μέτρον μὲν φαίνειν καὶ πίνειν, καὶ μυθολογεῖν,
Πάντων μέτρον αἰετὸν. ὑπερβασὶν δ' ἀλεεῖν.

Non

Non possum tamen valde patrocinari iis, qui nimis stricte se & certe dietę adalligant, corporaque sua emancipant, ut non sint homines mancipi & sui juris, piaculum reputantes & grande nefas morteque piandum, si aliquando leges suas dieteticas excedere cogantur: nam illi magnū errant errorem. Et merentur omnino legi hic elegantissima verba Hippocr. Lib. I. Aph. V. Τότων υγιαίνονσι σφαλεραί αἱ πάνυ λεπταὶ καὶ καθεστηκυῖαι καὶ ἀκρίβεις διαίται, ὅτι τὰ ἀμαρτανόμενα χαλεπώτερον φέρουσι: *Sanis tenuis admodum, stata & accurata diætā est periculosa, quia errata postmodum difficilius ferunt.* Et licet interdum ad insueta transire ejusdem monitu, ut errata facilius feramus. Optimè notat ex Gal. comment. in de sal. diætā 1. 1. Cl. P. Neucrantz in suo de Purpura libro, quod nimirum sua spontis esse debeat, qui se diætā legibus obligare velit: quemadmodum & Ἰδία τὰς ad hanc rem postulabat Polybus, ἰδιοπραγοῦντας, scil. propria privatę negotia exercentes: Famulis verò aliisq., qui πειραιστικὸν διὰ genus agunt, nulla exquisita cura valetudinis esse poterit, cum cibus, quorum datur facultas, uti cogantur. Cels. lib. I. c. I. scribit, quod ille, cui ad sanitatem nihil deest, nulli diætā sit adstrictus, neq. medico se subicere opus habeat, & homo sanus nullum cibi genus debet fugere, quo populus utitur. Verum non incongruè fortè aut inconcinne huc accommodantur verba Cl. Tulpij: Non inconsideratè videtur agere, qui circumspiciet naturā cedit inclinationibus, & obliquat prudenter sinus, ubi non licet rectum tenere cursum. Regnante peste victus ad siccum vergat, & condiri debet aceto, acetis medicatis, Citri succo, ribibus, Berberib. cerasis, aliis: is enim minus putredini subicitur, imprimis autem varietas ciborum omnis in una mensa vitanda, nihil enim deterius, quam diversa nutrimenta in una mensa simul, & in comestione prolongare tempus ex Avicenna. Et cum primis, ut dicit magnus Conringius in dissertat. de corporum germanicorum habitus antiqui ac nostri causis, naturā congruentissima est simplex illa quę hodie rustica censetur ac barbara vita. Et diutius plerumque vivunt homines, cum tempora sunt barbara & simplicioris victus, & exercitationi corporis magis dedita: brevius, magis civilia, & plus luxuria & otij, ex Verulamio recitat Ionsen. de naturā constantia, populūq. Romanum per aliquot secula non nisi pulte & farre victitasse Plin. testis est & Plautus, cui propterea etiam Pultiphagi audiunt: devictā verò Asia Luxurię primū influxerunt Roman, quos, si quis alius, Lucullus videtur, & invexisse & auxisse atque ornasse, & constat non aliunde majorem luxuriem fuisse epularum apud Romanos, quā ē piscibus, unde piscinarii nobilissimi Romanorum dicti, cum vix sit cibus alius, quā pisces, corruptioni magis obnoxius, in peste sanè parè in usum trahendi, imò fugiendi. Simplicem cibum esse optimum dixit Plinius: nam dissimilia quę sunt, ait Hippocr. seditionem movent, planè ut Respublica, quę omnis generis hominum plena est, seditionibus abundat. Singulatim hīc enumerare, quę ciborum genera vel fugere vel arripere debeamus grassante peste, cum plurimi pluribus hoc monuerint, supervacaneum duco, dein an ordo aliquis, & qualis in cibus assumendis sit observandus, ut & quando, etiam supersedeo longius recitare, nec hoc argumentum tangam, an largius cęnandum quā prandendum, & an bis in diē melius sit cibum capere quā semel: etsi jucunda pariter & utilis de his posset institui disquisitio. Verū exactam & immotam cuiquam viverē regulam prescribere, cum varia sint, quę variant eam indies, ἐν ἐκ τῶν ἀδυνάτων est, quod & suo tempore jam sensit Hippocr. uti videre est in principio lib. III. de diætā, & ὁπόθεν τι καὶ τῇ ἡλικίᾳ, καὶ τῇ χώρῃ, καὶ τῇ ἡλικίᾳ, καὶ τῷ ἔθει, ex eodem lib. I. Aph. XVII. Dicebat Cicero quod valetudo sustentetur notitiā sui corporis & observatione rerum earum, quę aut prodesse solent, aut obesse. Et apud Tacit. Annal. VI. legere est, quod Tiberius solitus fuerit medicorum eludere artes, atq. eos, qui post trigesimum ætatis annum ad internoscendum corpori suo utilia vel noxia, alieni consilij indigerent.

In peste cum omnis diætā ad siccum & moderatè calidum vergere debeat, liquet omnino

nō & potum præcidi potius quàm augeri oportere eumque exiguum & tenuem pesti præcaven-
 dæ esse accommodatum. Hinc laudantur cerevisiæ defecatæ, claræ, lupulo mediocriter conditæ
 siccandi; vīm sortitæ, qualis est Mummia nostra celeberrima ex multo lupulo hordeoq; cocta,
 sit tamen non nimis potens, aut ejusmodi, quæ terra mariq; ad distantissima loca Garaman-
 ras usque & Indos vehitur, illa enim calidior est & efficacior, quàm id tempus requirit. Nec
 possum istam multum laudare Mummiam etiam extra pestem pro quotidiano potu, quæ feces
 quidem ad fundum vasis deposuit suas, elutriata tamen & defecata nondum est, contra quàm
 vulgo creditur. Ætatem bene fert, & vel ideo à putredine concipienda remotior est, secus
 cerevisiæ non ira lupulosæ. Et præter id, quod lupulus durabilitatem cerevisiis dat, aperiendo
 abstergendoque crassitiem, obstructionis causam, corrigit, sanguinisque defecationem, excre-
 mentitiarum partium separatione, adjuvat, etiam secundum *mesuem vim purgandi & sangui-*
nem mundificandi habet, quæ purgandi vis clarè elucet in turionibus, quos primo verè pro ace-
 tariis sumimus. Inest & hordeo purgatorium quiddam juxta *Hippocr. lib. II. de diata*: Et quò
 intensiorem colorem habet, eò meracior est, & consequenter calidior fortiorque, quò remis-
 siorem, eò frigilior & debilior. Est tamen quod & in hoc potus genere mediocritatem obser-
 ves, non usque quaque enim coctioni conducit præcipuè paulò liberaliùs pota Mummia, si enim
 laxandi alvum potestatem habet, statim apparet coctioni officere, alvumque movendo coctio-
 nem turbare, quod experientià quotidiana quoque sit manifestum. Optandum sanè foret, ut
 nostri asvescerent rursus, quod desvererunt hactenus magno sanitatis suæ dispendio, mummiano
 potui, & vix forent tot morbi ex obstructionibus & hinc nata putredine oriundi, ut sunt scor-
 butus, melancholia hypochondriaca, obstructio Epatidis, Lienis & mesenterii. Breihania nostra
 pestis tempore non admodum salubris est, quia calidior, & obstruendi potestate ob triticum
 non omnino destituitur, aliàs non culpabilis potus est, multum nutrit, & quidem plus, quàm
 Mummia aut ceteræ cerevisiæ lupulosæ, quæ ob majorem lupuli, qui purum putum medicamen-
 tum est, quantitatem magis medicamentosæ redduntur, quàm cibales. Et immeritò sanè tam ma-
 le audit tam apud nostratum nonnullos, quàm exteros, modò debito modo maltum, quod
Bovyn Aetius dicit, præparetur, & coquatur perfectè, postea depuretur sive transcoletur optimè.
 Cavendum insuper Zythesiæ sedulò est, ne nimiam excitet flammam, quæ desuper decoctum
 lambat, unde postea cerevisia adustionem sapit, nec utatur stramine, stipulis, aut lignorum
 ramentis, ut ignis consiat ad elixationem, tunc enim fumum olet & fuliginem sapit. Certè in-
 gredientia si spectes, hordeum nempe & Triticum, ad quantitatem aquæ, non potest non quivis
 judicare optimam eam esse cerevisiam, quod autem fatuæ nonnullorum gulæ minus sapit, hæc
 potior ratio est, quod nimium recens bibitur, nec justam ac debitam ætatem acquirit,

Non acidum sapiat cerevisia, sit bene clara,

E granis sit cocta bonis: satis ac veterata,

dicunt *Salernitani*. Dein suspectam eam reddunt & invisam ii, qui nefario ausu & culpando
 meritò modo multorumque præsentaneo sanitatis dispendio eam præparant, quando, cum jam
 deferbuit ferè vasisque suis excepta est & plane frigida, novam materiam ex priori decocto
 ad hoc aucupium reservatam omnisque fermenti expertem denuo super infundunt saltem ut
 dulcescat quorundamque palato fiat gratior. Aut, cum jam ex omni parte præparata debi-
 tumque ac justam nata est ætatem, qua bibi solet, secundaria infunditur cerevisia quæstus
 tantum faciundi ergò, præsertim quando emptores congregatim accurrunt. Verum mixtio
 illa nova, cum jam cessat fermentatio, vera mixtio, quæ debitam fermentatione peragitur, non
 est, sed saltem humorum sive totius decocti confusio. Hinc cerevisiæ crassæ, feculentæ, facilè
 & citò acescentes, obstruentes, ventrem inflantes novamque in corpore, nescio quam, pravam fer-

fermentationem molientes, qui tamen mos plurimis non arridet, sed cane pejus & angve vitatur, qui nullo non encomio afficiendi. Halberstadiensi & Hannoveranâ, & quæ Regio - Lothariæ coquitur, ob arctam occlusionem, cum nihil tunc ad nos vehi Serenissimorum Principum jussu permetteretur, carere cogebamur, salubriores grassante peste future, utpote tenuiores levioresq; in putredinem sive corruptionem procliviores tamen sunt nostratibus cerevisiis magisq; flatulentæ, prout hoc non semel probavimus. Aliàs non usque adeo cerevisiis favere, aut earum inventori videtur Plin. XIV. XX. inquit: *ô mira vitiorum solertia! Inventum est quemadmodum aqua quoque inebriaret cum frugibus alterata.* Quantum bibendum docemur à Seneca l. de Tranq. anni c. IX. *Cibus famem domet, potio sitim, libido, quò necesse est, fluat, hinc Vino forma perit, Vino corrumpitur etas, ut canit Propert. II. El. IV. & Salernitani c. XLIX.*

De qua potetur, non stomachus inde gravetur.

Aliàs ad cibi in ventriculo elaborationem paucus potus sufficit, qui tamen calidorum sunt viscerum ad fallendam sitim paulò liberalius bibere possunt. Nec vino, quod *ὀλιγοπόρον* est, assuetis interdendum. Laudat id *Marfil. Ficin. in Epidem. c. V. & VI.* suâ enim vi theriacali humores perniciosos corrigit, vires cordis roborat, & admiranda suâ potestate theriacam longè superare censet *Gibbert, Med. Offic. de Tuend. Valetud.* probatq; exemplo exercitus *C. Jul. Cas.* qui in Africa peste infectus exhibitо generoso vino convalescit. *Magis tamen pituitosis in morbis Epidemici convenire, quàm aliis temperaturis vult Forest. l. 6. Obser. III.* Ab ardenti verò & inflammabili isto spiritu, quem Aquam vitæ vocitamus, caveat sibi quisque, nisi qui diu ante ipsi assuevit, præterquam enim quod summè caleat, & *κράσιον* temperiemq; corporis nostri longè excedat, etiam viscera nostra, quæ liquido temperato, & vix primum caliditatis gradum excedente gaudent, exurit, siccatur, quæ natura temperatè humida esse voluit. Et notat *Mercurial. in prælect. Pisan. hist. I. f. V. exemplo Thasiornm & Venetorum, bibaces, & qui vina generosa potant, acerbius peste corripuntur aliis.*

Crato quidem Conf. CCLXXV. valde commendat Aquam suam Vita compositam, quam medicamentum regium vocat, sed cum grano salis accipiendum hoc, ne Aqua vitæ vertatur in aquam mortis, cujus vehiculo vis contagiosa ad Cor retrahatur, quæ ad cutim jam expulsa fuerit. Novi quidem multos, qui quotidiano ejus usu nihil noxæ corporibus suis ascivere, non sunt tamen facienda mala, ut inde eveniant bona, cum è centum vix uni ejusmodi felicitas obtingat, pluribus contra irreparabile damnum exinde sentientibus, moderatus tamen ejus, ut & aliorum, usus non omninò improbandus. Et cum calidus sit & siccus tempore pestilentie pro non insalubri *περιλαλῶν* cum commendat *Cl. Sebizius lib. II. de Aliment. Facult.* Quid de vinis ex multis calidis ingredientibus & aromatibus medicatis sentiendum in Observationibus reperies. Parcus omninò earum sit usus, ut & cerevisiarum medicatarum, præsertim quæ cum cibo sumuntur ipsique pro vehiculo debent esse: cum enim ipsarum ingredientia pura medicamenta sint, imò multa diuretica, ut Absynth. Caryophyllar, Enul. scolopend. rosam, adeoque cibo in ventriculo coquendo ineptam. Distrahitur certè natura in Chylificationis opere ab istiusmodi adulterato & fucato liquore ad coctionem nihil conferente, utpote quæ gratum, quique cum chylo in unam massam corpori alendo amicam coeat, potum desiderat, quod de cerevisiis medicatis asserere nescio an quis audeat. De Diureticis res ex *Gal.* plana est, & ratio hoc ipsum evincit, quod nunquam cum cibo danda, imò longius ante & à pastu sumenda, ne incoctum cibum celeri suo transitu ad arctiores meatus secum ferant, unde obstructions & plura alia mala oboriri possunt. Hinc modum & morem inveteratum ab omnibusque receptum bibendi Fontes acidos sive Acidulas non possum non improbare, quando tam in prandio, quàm cæna, aquam istam medicatam cum vino miscunt pro potuque in mensa usurpant, cum

utrumque

utrumque diureticum sit, & aliàs maximo caveatur opere ne farto aut impuro ventriculo ista sumatur, constringendi quidem vi sua, quàm plerumq; pollent, possunt juvare ventriculi actionem, sed melius ista exeritur extra cibi tempus, quàm ventriculo cibi pleno, ubi metus est, ne incoctas cibi portiones secum avehat, quas præstaret prius coqui in chylificationis officina. Ita observatum, quandoque potu istius aquæ semen Anisi ad vesicam per mesaraica vasa, hepar, emulgentes & renes deductum esse. Quanquam non sim nescius, præclaris Viris hanc vini cum aqua mixtionem probari, tamen perplacet mihi consilium Fallop. de Thermis c. XIV. quo prohibet vina aqua thermali diluere, alterum enim ex altero corrumpi. De cerevisia excerasis, quæ naturæ magis familiaria tamen sunt, & quandam alendi vim habent, statuit Sebizius lib. de Aliment. facult. quod in corporibus frigidis debilib; Stomacho præditis facile ventris tormina & colicos cruciatus excitet, aliàs visceribus astuantibus potest prodesse. Certè ad coctionem cerevisiæ medicatæ nil faciunt, imò turbant eam, ut vel hoc nomine parcius in usum trahenda.

Hippocr. VI. Epidem. sect. IV. Motum inter præcipuas sanitatis conservatrices causas retulit. Planè enim ad eundem modum, quo ignis elementaris, sive culinaris noster, ita noster ignis animalis, τὸ ἐμφύλον, θερμὸν, per motum gignitur excitaturque, ita per eundem fovetur ac conservatur, quod nemo omninò negat, nisi qui in rebus physicis planè sit hospes. Non debent tamen Motus & quies modum excedere secundum eundem, aliàs noxam corpori inferunt. Præsertim tempore pestis, ne nimium moveamur, cavendum est, præterquam enim quod plus debito incalescimus nimium nos movendo, etiam altè respirare cogimur, quò fit ut inspirando multum aëris attrahere necessum habeamus, qui si impurus est, non potest non magnum corpori nostro inde impendere periculum. Contra ne quiete dulci torpescamus in otioque nimio collectis humoribus obruamur sedulò annitendum, ut enim tempore pacis & otij homines petulantes evadunt Arist. VII. politicor. Ita humores in quiete efferuntur, rebelles fiunt, & seditionem in corpore moliuntur, & homo edens sanus esse non potest, nisi etiam laboret, contrarias namq; vires inter se habent cibi & labores, inter se verò mixti conferunt ad sanitatem Hipp. I. de Diata, t. II. Contra segnities & otium humectant & corpus debile faciunt II. de Diat. t. XXIX. Motus præterea absumit superfluitates calefaciendo, artus roborat ipsisque soliditatem affert & duritiem, & dum calorem auget, etiam coctionem adjuvat, exercitatio enim inquit Hippocr. est artuum & carniū cibū.

Ἦπνῶς, ἀγρυπνίη, ἀμφοτέρω τοῦ μέτρου μᾶλλον γενόμενα, κακόν, inquit, Hippocr. Aph. III. s. II. Quod si somnus, & vigilia modum excedant, malum denuncient. In peste præservanda ut in his, prout consueveris, quicquam mutes, non magnopere laborandum, assueta enim diu minus molestant, etiamsi mediocritatis limites egrediantur, & arduum, imò impossibile est certum spatium in his definire & horam, cum varient juxta ætates hominum, temperamentum, & anni tempus, simul & victus ratio dissimilis varium dormiendi & vigilandi requirit spatium, nec ita simpliciter verum, quod dicitur septem dormisse per horas convenire ac sufficere juveniq; seniq;, nunc contrahendum illud tempus, nunc extendendum est. Secundum Oddum de odd. lib. III. de Prand. & can. somni tempus mediocre est octo horarum. In universum tamen statuendum plus vigilare nos debere, dormire minus,

Plus vigila semper, nec somno deditus esto,

Nam diuturna quies Sitiis alimenta ministrat,

nam non ad somnum natura nos genuit, imago mortis somnus est, imò somnus & letum fratres sunt & noctis filii, hinc Virgil. VI. Æneid. consanguineum leti soporem facit. Vigilia totum exsiccat corporis habitum, propterea incommodat, quibus corpus gracile est, succedit inde extenuatio, debilitas, cerebri siccatio, denique & consumptio Gal. VII. Meth. Med. cap. VI. sed in exsatiatis cibo noxia est, non permittens cibum liquari & concoqui, Hippocr. de Diata. Nihil ma-

gis impedit coctionem humorum, quàm Vigilia continua, dicit Senn. in Paralip. Et Vigilia faciunt abundare humores malos Mont. Cons. de Morb. Part. CLXXXII. Vigilia reddunt humores acros & biliosos Zech. Cons. Med. I. p. X. Verùm cum ex Aristot. ἀδύνατον sit αἰεὶ ἐγρηγῆναι, dulcis & amica quies captanda nobis est somnoque ex naturæ necessitate indulgendum, hic reparat vires, fessaq; membra leuat. Hinc vocatur Senecę in Tragœd Herc. domitor malorum, requies animi parsque humanę melior vitæ. In peste longior & immodicus somnus vitandus, præsertim meridianus, replet enim cerebrum, cruditates auget, quod clarè liquet ex Fien. de Flat. c. XII. dum inquit: Somni diurni vapores eleuantur sed non discutiunt, coctionem aggrediuntur, sed non perficiunt, unde cruda generantur phlegmata, flatuum vera materialisq; causa. Somnus meridianus præsertim in non assuetis cerebrum valde gravat. Nymm. de Apopl. p. m. CCCVII. meridianus generat, matutinus detinet omnia capitis excrementa. Mont. Cons. de morb. Part. p. m. XXXV. & LXX. Et dormire noctu oportet, vigilare interdum dicebat Hipp. Insuper sæpe in somno pestis invadit, id verò cum fit, non potest non inadvertenter ligatisque quasi sensibus usque quaque ire per corpus universum, & nullo resistente in intimos œconomix recessus serpendo vitæ arcem invadere, cum ultima hominis ruina. Somni moderati nocturni utilitates plurimæ sunt, est viscerum cibis sive instauratio & robur, virtuti enim adjicit partium nutritus & vita, concoquit calido ad interiora recurrente, hinc quibus ventriculus languet, somno indulgendum, Spiritus resolutos instaurat, lassitudinem membrorum tollit, vires reficit, humectat corpus ejusque partes interiores, hinc illud Virgilij

Fessos sapor irrigat artus.

Debet porrò sanitatis studiosus magnam habere curam τῶν ἐκκρινόμενων καὶ ἐπεχομένων, Excretorum scilicet & Retentorum, cum enim indies de corporis nostri substantia depereat aliquid & absumatur, indies etiam cibo & potu, ut in locum deperditi & absumpti reponatur aliquid, opus est, quo homo conservetur aliàs paucos dies superfuturus. Quo respexisse videtur Hippocr. cum lib. de Flatibus medicinam definiiverit Appositionem & Ablationem. Cùm verò non omne id, quod estur bibiturve in substantiam alendi convertatur, sed alimentorum quedam multum alia paucum alibilis succi contineant, reliquum, ut inutile, è corpore eliminandum, sequitur necessariò in id sedulò incumbendum esse, ut id, quod ἐπερογανὲς est corporique inutile excernatur debito modo & tempore, quod fit per alvum, urinam, sudores & etiam ἀδελον διαπνοήν. In hoc si natura non deest officio suo, bene est, & hominis vires vigent, sin, νοσέσθης est homo, & instabilis sanitatis: ita si excernitur, quod præstat retineri in corpore, pariter ægrotat corpus & auxilium medicum in subsidium sollicitandum.

Pestis tempore summâ ope niti decet, ut nihil in corpore retineatur, quod pesti fomitem causare posset, & unde facilè putredo subnasci, quàm enim graviter impura corpora & κακόσπλαγχνα præ reliquis peste laborent, quàmque gravibus præ aliis putredinis accidentibus infestentur, non potest ignotum esse iis, qui cum peste infectis conversantur eorumque curam gerunt, prout in Obs. meis abunde id docetur. Qui enim pravè scatent humoribus, quicq; quicquid cibi aut medicamenti assumitur, corrumpunt, evacuandi sunt, antequam Alexipharmacum exhibeas, inquit Cl. Sennert. de Febr. Vngar. p. m. 551. Hinc quotidie alvus officii sui admonenda, quæ si segnior est, medicamentis ad opus suum adigenda. Quibus autem & quando iis utendum, paucis indicabo. Notum, quod alvum ducentia sive purgantia duplicis sint ordinis, quedam ἐκκοπρωτικά, ὑπακτικά ἢ ὑπαγωγὰ dicuntur, id est, lenientia, quæ ultra primas vias non adscendunt, nec peculiarem aliquem hominem prolestant, dicuntur & stercoraria medicamenta: Quedam propriissimè sunt purgantia, quæ universum corpus pervadunt, & ἀνω καὶ κάτω nonnusquam id perturbant, hæc tam in præservatione quàm curatione summo studio vitanda, illorum verò usus, tutus est & necessarius, parcior tamen. Eminent inter illa primasque tenent

Aloë, Cassia, manna, myrobalanorum omne genus, pruna dulcia, Rhabarbarum, Tamarindi, imprimis aloëtica laxantia plurimum conferunt: *Aloe enim & ex ea compositorum vis super Ventriculi & intestinorum loca non ascendit Pernum. lib. V. de Curat. Arte p. m. CCCLIII.* Aloë præterquam, quod è ventriculo vicinisque locis bilem pituitamque crassiam expurget, corroborat impensè ventriculum, omnesque omnium viscerum obstructions aperit, corpus universum à putredine defendit, nec quicquam corpori noxæ infert, si acrimoniam legitimā correctione exuerit, imò basis & fundamentum omnium pilularum constitutum est, prout multus est in ejus facultate & laude cantanda *Solenand. f. III. Conf. XXIX. Aloe bis aut ter in septimana à ℞j. ad ℞j. integram ante cœnam sumpta advertit à capite vapores omnes, provocabit urinam & alia excrementa, aperiet obstructions Venarum, corroborabit Ventriculum & Vegetabit innatum calorem Mont. Conf. de morb. Part. Conf. XXXII. Aloe lota in catapotia præstantissimum ad urinarum virulentiam à C. Clusio positum est medicamentum, & planè mirificum dicit M. Aur. Severinus de recond. Absces. natura p. LXXVI. Aloe in quotidianis & aliis longis febribus optimum est remedium L. Septal. Animadvers. lib. V. p. CXIV. Pilulas ex Hiera Gal. & Aloëphanginas bis in hebdomada in pauca quantitate sumendas svadent mauritani medici. Sunt tamen quibus non ita tutò exhibetur ñ 'Αλόη: Hinc quibus Epar calidum est in magna copia non danda *Senn. in Paralip. p. LXXIII.* incommoda tamen quæ Epati calidiori asferre potest, facilè vitantur admissione succi rosar. qui acrimoniam mitigat, & vim purgandi auget. *Nisi multæ obstructions sint prævia, in quas Aloe agat, si Epar calidius sicciusq. fuerit, magnam inde cladem sequi docet ex Gal. Ballon. lib. I. Epidem. p. m. LIX.* In hæmorrhoidum fluxu cavendum ab Aloës usu, hinc Itali dicunt, ex centum hominibus Aleoticis pilulis utentibus nonaginta ferè hæmorrhoidibus laborare. *Hor. Aug. lib. II. de Peste cap. XIII.* dicit, hæc nocet epati, pungens suâ acrimonia & amarore Venas subtiles, rodens musculos ani, Venas ejus aperit, inimica est sanguinem spuentibus vel vomentibus vel exonerantibus eum ex intestinis vel utero, inimicissima est corporibus calidis, siccis, extenuatis, nisi in abundantia multarum humiditatum, nocet proinde mulieribus gravidis & senibus. Epati adversari ex *Avicenna* etiam docet *M. Martin. de Aff. Hypochondr. p. m. CCIII.* Nos Aloen in morsulis, quos tantopere laudavimus in Obs. semper rosatam aut violatam posuimus cum conserva rosar. aut alia convenienti, ut Aloës vis & acrimonia infingeretur dispersaque magis esset, additum quandoque & diacrydium Sulphuratum, ne planè in alvo maneret inefficax, aliàs scammoniata in peste fugienda, præsertim gravidis, voluique in morsulos redigere Aloën, quàm pilularum formâ exhibere ob siccitatem & caliditatem nimiam, in æstate præsertim calidissima siccissimaque, ut tunc aëris, quando peste tantum non opprimebamur, intemperies erat, quasi per totam æstatem arsisset Sirius. Ferè eadem aëris constitutio erat, qualis fuit tempore pestis Atticæ, quam Thucydides descripsit. Aliàs meritò manet Pilulis Ruffi sua laus, & potior, quàm aliis operosè & multâ congerie conquisitis & complanatis ingredientibus compositis. Exhibuit eas Ruffus formâ potius cum vino, de qua portione *Ægineta lib. II. cap. XXXVI.* Hanc scio, an sit quis, qui ex hoc potu non à peste immunis ac superior evaserit. Ejusdem ferè notæ est Elix. propr. Parac. quod Juristis communicari vetuit Autor.*

Prima cura debet esse, ut siccemus, corroboremus, à putredineque præservemus, omne hoc præstat medicamentum ex Aloë, quod confit, in quacunque forma. In Morsulis meis nihil est, quod culpes, quàm amarorem, verum amarior multò pestis est, hæc si conferas, eligas utrum liber. Sufficit verò vel semel saltem in corporibus calidis siccis, vel bis in frigidioribus humidioribusque eos sumere hebdomatim. Nec sequendus quorundam mos, qui tantum remediorum sæpe devorabant, *Quantum quadrijugi possent agitare juvenci* vel qui singulo die, vel alternis laxantia sumebant remedia, effaminatur inde corpus, coctiones turbantur, viresque dejiciuntur.

tur. Ab aliis medicamentis fortioribus, quæ *μολύβδης* operantur, summo cavendum est opere. Erant qui pilulas suas usuales, uti vocant, vespere tantum sumebant opinantes somni tempore minus noxę corpori daturas, quàm si manè eos deglutirent, qui mos hodiernum apud plurimos quàm medicos, quàm alios in usu frequenti est, atque ita invaluit, ut contra hiscere aut quid contra ponere, temerarii sit, hominisque frustra curiosi. Non possum tamen non, quid mihi super hac re in mentem venerit, æquo lectori ob oculos ponere, liberum illi linquens, quid velit sequi, modò naturam sequatur, rationem, & experientiam. Et certè ex sacro codice scimus, Deum sapientissimum hujus mundi conditorem diem creasse in laborem, noctem vero in requiem omni animanti. Quiescit autem corpus nostrum non tantum, quando artus exteriores membraque feriantur ab opere externo, quod lacertorum peragitur beneficio, & quando sensus externi ligati quasi sunt & sopiti, verum tum maximè, quando calor natus non tantum ab opere externo feriat, sed quando sibi relictus & ad interiora revocatus *ὑπερκαύματι* tam prope, quàm toto corpore conficiendo unicè est intentus, à qua per certè necessaria & grata opera avocatur per importunè assumptum medicamentum, in quod satis habet, quod agat neglecta interrim & perturbata coctione, unde illi corpori; vires accrescere per labores diurnos fractæ debeant, hinc imbecillior fit durabilisque non est alternà carens requie. Atque ita peccatur in Creationis Autorem, qui totum hominem noctu quiescere voluit, jusfit. Dein & interrumpitur somnus virium refectioni unicè destinatus, ut diei curis negotiisque ac spirituum dissipatione enervatum corpus & languidum cibi beneficio reficiatur pristinumque recuperet habitum; id enim cunctis naturà ingentum est animantibus, ut accedente vespere sua reperant antra suosque quærant recessus, & capiant dulcis medicamina somni, quod etiam *Sylus Italic.* respexit, quando canit

agit levibus per sera crepuscula pennis

E pastu volucres ad nota cubilia vesper.

Et Auson.

Longa dies operosa viro, sed temperies nox.

Norandum etiam & hoc, quod medicamentum illud, vespere sumi solitum, est vel mite & imbecillium virium, vel validius, quodque corpus nimium moveat. Si lenius, metus est, ne sine operatione in corpore diutius retentum facultatis naturalis œconomiam susque deque vertat, planeque inefficax fiat cibo obrutum, ea enim est omnium evacuantium conditio, ut præpostero ordine usurpata effata sæpius reddant viscera diutiusque retenta mirum, quàm visceribus noceant, utpote quibus tota substantia sunt adversa. Interim dum irainers est sensibiliterque nil operatur, saltem hoc efficitur, ut turbet fermentationem in ventriculo cibis superadditum, sine qua coctio non absolvitur, flatus exciter, cibum corrumpat, ad putredinem disponat crudumque; ac liquidiorum chylum ab alvo præcipitet. Hic quidem multi censent, medicamentum bene suam vice functum, cum liquida ab alvo fluunt, cum tamen cruda atque corrupta sint, quod vel ex favore nares judicant. Et *Avicenna* præcipit *Fen. IV. prim. Docti. V. c. V.* à medicamento mitiori laxante sumpto non esse dormiendum, ita habent ejus verba: *Si medicina Ventris solutiva debilis fuerit, ne super eam dormiat, quomodocumque fuerit.* Itaque hoc incommodum inde sequitur saltem, materiam scilicet in corpore turgentem exagitatam à medicamento ad exitumque paratam retineri, unde natura somno stupida agitata medicamento humoribus magnam facultatum omnium patitur detrimentum. Movent quidem serotinæ illæ leniores pilule humores, sed non promovent, ideoque obstructo hærent affixa canali. Sin validior medicina solutiva fuerit, multò citius disturbat coctionem secumque in penitissima corporis loca cruda illa & semicocta rapit, tumultumque excitat & incommoda plura multum corpori noitura.

Defraudatur hinc homogenio suo, & alibili succo ex assumpto cibo corpori accrescendo, unde postero die virium potius defectus, quam instauratio speranda. Liquet quoque ex priscorum Romanorum diatandi sive cibandi ratione, quod noctem quieti ciboque assumendo & domando viribusq; reparandis destinarent, hinc de die parcius prandebant, cœnabant verò largius, unde

Horatius

Multaq; de magna superessent fercula cœna.

Et Martial.

Dives & ex omni posita est instructa macello.

Cœna tibi.

Quanquam non diffiniam jam, utrum cœna, an prandium largius esse debeat, sive quod idem, noctu, an verò de die coctio melior fortiorq; sit, tractarunt hoc argumentum plures pluribus, hoc saltem, si felicius de die quam nocte cibi in ventriculo elaboratio procedit, quæro, qui fiat, quod is, qui insomnem noctem agit, aut aliquot saltem horis sive curis sive alio aliquo impedimento somnus interrumpitur, matutino tempore non deponat alvum aut ægrius, prout alias natura sueverat. sed vel flatu tantum emittat, alvusq; vel totum sæpe diem maneat sicca? Secus si tranquillam & non irrequietam noctem habuerit. Insuper ex *Hipp. clarea. l. II. Aph. XXIX. & Aph. X. l. IV.* quod per morbi initia constantibus scil. adhuc viribus auxilia administranda sint. Morbi initium rectè in adhuc valentibus matutino tempore posse comparari facile mihi patior persuaderi, tunc enim homo resumptis ex ritè elaborato cibo per somnum viribus fortior alacriorq; est, quam sub hesperi ortum, ubi diei curis & laboribus dissolutum & enervatum corpus totum sæpe languet: Quis ergo tum afflictis viribus spiritibusq; diurno motu exhaustis novam afflictionem addere medicamentisq; agitare, quod quiescere unice amat, ex usu esse censebit? omninò rectè *Horat.*

Temporibus medicina valet data tempore prosunt,

Et data non apto tempore vina nocent.

Et si vera sunt, ut sunt verissima, quæ idem habet in satyris:

- - - nam variæ res

Ut noceant homini credas,

- - - si simul assis

- Miscueris elixa, simul conchyliis turdis,

Dulcia se in bilem vertent stomachoq; tumultum

Lenta feret pituita.

Si hæc, inquam vera sunt, de diversarum naturarum alimentis uno pastu ingestis, quid dicemus, de pilulis istis serotinis cibo toto genere repugnantibus? Confirmat hanc opinionem *P. Æginet. l. VII. de re medica c. IV.* Qui *Aloen*, inquit, *vesperi exhibent, nocent, corrumpit enim alimentum.* Et hinc forsitan est, quod *Cardanus lib. I. de san. tuend. c. XLI.* dixit, *Aloen Ventriculo infensissimam esse, obq; usum ejus importunum Mesuem Arabem medicum milenosq; alios ejus vestigia calcantes immaturè obiisse,* alias hoc Cardano non concedendum, & ob abusum aut alios fortè errores usus alicujus rei non tollendus. Verissimum quoque & hoc est, pilulas scil. vespertere motum habere motui alimentorum assumptorum è diametro contrarium: nam naturâ exteriore officina deserta internum tantum meditat opus, in profundiores usque serpens medullas, Chylusque ex cibo progenitus ad sanguinis officinam Cor scil. properat ultimum tandem complementum perfectionis suæ ibi accepturus; Contra verò pilulæ istæ serotinæ ad interiores intestinorum recessus ipsum amandant, & ne ad cor eat, faciunt. Quilibet dein & in se ipso facile animadvertit, quam noxium corpori sit, si vel per publica negotia, vel alias rationes onus-

stima

stam alvum contra naturam remorari necessum sit : quid putas autem, Lector, quando alto somno sopitum corpus quasiq; ἀναίδην non sentit medicamento aculeos egredi stimulantis, nonne retentum id diutius vicinis visceribus bellum indicit vimque infert? Propterea ex *Arist. Vill. Physicor. Summa mentis imbecillitas est, quarere rationem, & sensum, fortissimum rerum indicem, neglectui habere.* Utque huic παρακατασσει tandem finis sit, adducam saltem in testimonium *Avicennam & Hipp. ille Fen. IV. prim. Doctr. V. cap. V. prout, superius notatum: Hic dicit lib. IV. Aph. XV. quotiescunq; majorem ciendi & vacuandiq; vim a veratro requiris, corpus move: sin inhibendum sit & sistendum, somnum inito neque moveto.* Si veratri, cujus vis purgandi vehementer admodum est, somno sistitur, atque coercetur, quidni & Pilularum ἐκκοπρωτικῶν aliorumque lenientium? Non omnino tamen serotinorum medicamentorum lenientium, ut & digestivorum, ut vocant, usus improbandus, praesertim cum vel hora una ante cenam, vel quinq; aut sex a cena horis primoq; somno absoluto exhibentur, tum praesertim, quando altero vel postridie purgare corpus voles, ἔρπον enim corpora primum facere oportet ex *Hipp. decreto, quam purges, & tum multum commodi digestiva corpori praestant, quod hic ad digitum recensere loci non urget commoditas.* Unicum saltem addo: Si in Eccoproticis ejusmodi medicinis tam cautè procedendum, annon cautius multò vespertino tempore fortiorum ut pilul. cephalicar. aliorumque specificè purgantium usus ineundus? secus licet sit in actu laborantibus ubi nonnunquam ἐξ ἀνάγκης ob majus urgens recta medendi methodus invertitur.

De auxiliis praeservantibus lenitivis plus satis, erit in sequentibus calamus strictior. Ad Excreta pertinet & sudor. In pestis praeservatione ne simus nimii in sudore profundendo, cavendum sedulo est, sicuti plurimi in peste nostra magno suo malo sunt experti, qui hanc regulam non observarunt, immoderatus enim labefactat corpus universum impensè. Est praeterea & in sudoribus ciendis hominis natura & constitutio consideranda. Quibuscunq; Epar aut lien calidus & humidus est, si ve salubriter degant, si ve agrotent, in quavis ex causa sudores facile erumpunt. Contra quibus Epar aut lien emarcuit, aut scirrhus obduruit, aut vehementer est obstructus, ut sit in hydropse, icteritia, καχεξία, iis sudor difficile aut arte elici, aut naturà propelli potest. Ioel Tom. I. Pract. pag. CCXXVI. Cum fixa in humoribus, praesertim crassioribus morbi causa est, sudores ita solvendo non sunt. Ballon. definit. med. p. LII. Obesi non temerè sudoriferis macerandi, pinguedo enim nimia eorum obstat, quo minus per eam sudoris materia ad ambitum corporis propelli queat. Contra graciles, frigidi, cutem mollem laxamq; habentes humoresq; aquosos & tenuibus succis abundantes ad sudorem maximè sunt habiles Vid. *Sidius l. XI. de Curat. gener.* Spleneticis, scorbuticis apprimè conducunt sudorifera medicamenta, imò, inquit *Sennert.* & experientia hoc ipsum comprobat, plus saepe sudationibus in istis efficitur, quam vel purgantibus vel aliis medicinis. Tempore pestis praeservandi gratià qui multum sudarunt, hoc effecerunt, ut corpora sua laxiora reddiderint effaminarintque, calidis sudorificis temperiem immutaverint & destruxerint, pororum cutis apertione veneno externo fenestras aperuerint viresque multum fregerint, quibus tamen servandis augendisque potius multum studebimus, errati exempla Observ. suppeditabunt.

Venaesectionem quidam pro praeservatione planè rejiciunt, alii in profundendo sanguine nimis sunt profusi, nec modum nec mensuram observantes. Peccatur utrobique. In sanguineis, plethoricis, sanguinisque per sectam venam effusioni assuetis nihil omnino obest sanguinis demptio, imò prodest multum, hanc enim omissa, vah, quam gravia symptomata in peste correptis, accedente postea fermento pestilenti, apparent, facies praerubore insufflatur, rubent oculi, cordis coangustatio magna, haemorrhagia ἀνώθεν καὶ καθώθεν, σύμμιξις, deliria sursum rapto sanguine, alia. Nec tamen plus spei ponas in phlebotomia, quam ex arte & docto σοχασμῶ liceat

ceat consequi, circumspicere hic & prudenter consideratis viribus & hominum naturis, nec facile fluctuante animo in syrtes appuleris. Nec Fonticulos excitare, aut excitatos apertos servare, inutile est, per eos enim natura humores superfluos & excrementitios amandat ad partes ignobiliores. Planè ut in civitate seditionem moturi ex ea quantocius removendi, eosque spargi per provincias, & externo bello illigari, pars consilij paci, sit consulente Tac. III. Histor. Pariter humores, qui vel à purgante aut sudorifero remanent indomiti per inusta ulcuscula aliò vocandi, retrahendi, intercipiendi, si quò non oportet, vergant, ut hoc modo mali scaturigo exhauriatur. Hinc nemo non medicorum eos ad præservandam pestem plurimum commendat. M. Aur. Severinus Neopolitanus l. de Efficaci medicina c. IV. p. CCLI. In peste Veneta, anno M D LXXV. dicit cauteriorum usum fuisse celebratissimum. Et Kircherus de Peste sect. III. c. IV. p. XIV. hæc habet: Cauteria præpotens esse ad vitandam pestem remedium omnes ferè fantur Gal. sectatores, ita quidem, ut quæ Mercurialis de Peste Veneta, id Ego de Romana, quantum ex medicorum fide dignorum relatione mihi innotuit, asseverare queam, nullum huiusmodi signatum natura spiraculis peste indasum fuisse, nisi forsannonnullos dissolutioris Vita & Epicuri de grege porcos. Et in MS. meis à Cl. D. Iacobo Febrizio Archiatro Regio Dano, Præceptore quondam meo Venerando vñ εν ἀγίοις reperio: Neutiquam silentio tegendus fonticulorum in peste usus, utpote, quibus omnium optimè corpus ab ichorosis & putridis humiditatibus facillimè pestifera infectioni fomitem substernentibus, expurgari queat. Nemo tamen dicit Sennertus l. IV. de Febribus c. V. p. CCCXXX. Velim in iis solis aut præcipuè, neglectis Alexipharmacis, spem securitatis collocet. Tanta enim vis & efficacia est huius Veneni, ut pura quoque & munda corpora invadere possit. Nec cuivis, non habito respectu ad corpus, ponendæ fontanellæ: Si corpus, inquit Horat. Augen. de Peste l. III. c. XXV. habeat parum carnis, siccum sit, sine excrementis, non autor essem, ut cauteria administrarentur.

Neογάμοις & φιλοάγγοις infestissima est pestis, ideoque pestilenti constitutione prudenter admodum à prudenti Magistratu nuptiales festivitates imò & ipsæ copulationes prohibentur, ne serpenti malo fòres amplientur.

Imò ipsa συνουσία matrimonialis ob hoc debet esse rara admodum & pauca, immoderata enim Veng, si quid aliud, cerebrum & ventriculū debilitat, quorum tamen robur firmare omni ingenio anniti decet. Multū etiam calidi innati perit homini præpoperà & nimia venere utenti, unde Arist. de Long. & brev. Vita c. V. ὀρενλικὰ & πολὺπερμα brevi senescere scribit. Et Avicenna lib. III. Fen. X. Tr. I. c. II. Coitus evacuat de substantia spiritus rem plurimam propter delectationem, & propter illud, qui plus delectantur, plus sunt cadentes in debilitatem. Imò ex Venere nimia quandoque inflammari jecur tradit Ioel lib. V. Pr. p. II. In affectibus cerebri omninò ab ea abstinendum, quia ab omnibus antiquis proditum est dicit Mont. Conf. de M. Part. p. m. XXXV. præcipuè ab Hippocrate, Venerem nihil aliud esse quàm brevem Epilepsiam. Et cum valde siccet & frigefaciat, liquet adolescentibus & juvenibus eam minus convenire, ut qui ad corporum suorum incrementum calido & humido egent. Cumque, Bacchus pariter & Venus Adolescentum juvenumque perniciēs sit pestilentissima, frequentissima, illis ipsis summè vitanda, ideoque nobilis juvenus

Compedibus venerem, vincis constringe Lyæum,

Ne te muneribus lædat uterque suis.

Venerem apud Germanos antiquos valde fuisse feram ex Tac. & Casare de bello Gall. est videre: qui impuberes diutissime manserunt, maximam inter juos laudem ferunt: Intra annum & XX. famina notitiam habuisse in turpissimis habent rebus, prout hoc citat ὁ πένυ Conringius in de corpor. Germanicorum habitus antiqui ac novi causis Dissert. p. XXX. Et aureus planè,

planè est sermo, quem ibidem ex Aristot. allegat, quiq̃ue maximè meretur huc poni. ἐστὶ δ' οὖν τῶν νέων συνδυασμὸς φαῦλος πρὸς τεκνοποιίαν (loquitur ibi de optima Republ. constituenda, in qua adolescentum connubia liberorum imbecillitate damnavit) ἐν γὰρ πᾶσι ζώοις ἀτελὴν τε τῶν νέων ἔγγονα καὶ δηλυτόκα μᾶλλον καὶ μικρὰ τὴν μορφήν. ὥς ἀνακαίον ταυτὸ τοῦτο συμβαίνειν καὶ ἐπὶ τῶν ἀνθρώπων. Τεκμήριον δ', ἐν ὅσῃς γὰρ τῶν πόλεων ἐπιχωρεύει τὸ νέους συζευγνύειν καὶ νέας, ἀτελεῖς καὶ μικροὶ τὰ σώματά ἐστιν: Est autem Adolescentulorum conjunctio ad liberorum procreationem inepta. Nam in omnibus animantibus adolescentium fetus imperfecti sunt, & fœminæ eduntur potius, quàm mares, & brevi corporis figura: quare nescessariò hoc idem etiam in hominibus evenit. Cui rei hoc argumento est, quod in quibuscunque civitatibus hoc in more positum est, ut adolescentes cum puellis adolescentulis matrimonio jungantur, imperfectis & brevibus corporibus præditi sint.

In Amuletis nemo certæ quicquam spei sibi imaginetur, siue sit superstitiosum illud Paracelsi Zenexeton, siue ex Arsenico aut Mercurio conflatum: experienciâ enim constat, hæc supra cordis regionem, donec incaluerint, gestata, multum damni corpori dedisse: Contra nescitur quosdam horum appensione liberos à peste mansisse. Eadem ferè sentire licet de fœtidis malèq̃ue olentibus vaporibus mephyti sua nares nostras ferientibus, aliisq̃; odoribus naturæ nostræ minus gratis, ut enim gaudet, inquit Severin. de recond. Abscess. natura, spiritalis vitalisq̃; præcordiorum natura puro limpidosq̃; aëris attractu, sic tetro & co inquinato tristatur. Et Athenæus lib. XV. Despnos. c. XIV. maximam sanitati partem, dicit, odores cerebro utiles & salutares effugere, fœtoremque omnem, ut cerebro nocere mentemq̃; perturbare, ita cordis Spiritus ladere, fœtoremq̃; proferre statuit Cl. Sebiz. & Proverb. Salamon, cap. XXVII. legimus, cor unguentis bonisq̃; odoribus delectari. Nec abludit ab horum sententia Galen. dum VIII. de compos. medicamentor. Κατὰ τόπον inquit: Quemadmodum odorata corroborant, ita subvertere Ventriculū solent graveolentia. Et sanè per quod pestis propagatur, per idem ea non pellitur, at per fœtida, sordida putredinemq̃; testantia propagatur, Ergò non pellitur, ergò supervacuum eorum usus, imò noxiū, utur quibusdam abominabili suo fœtore talia mirè placeant.

Præservandi ratio longiq̃; excurrit quàm decuit fortè, nec tamen singulatim omnia recensui, factū id ab aliis innumeris, à quibz id, quod deest hisce, petere abunde licet. Nunc βραχύως καὶ αὐτοχέτως de Curatione. Imprimis verò hoc tenendum, cum verum indicans nullum habeamus, quod vel purgationem, vel vomitum, vel phlebotomiam propriè & primò indicet, ab hisce curationem non esse auspicandam, debet tamen universale esse remedium, quod hosti universo corpori insidianti opponatur, quod non aliud à tam multis seculis, teste experienciâ, esse comperimus, quàm sudoriferum. In hujus autem usurpatione non cunctandum, ne ἐξ ὀλίγου τὰ πολλὰ oriantur, quæ in bellis & motibus civilibus, quæ cito consilio carent, consequi dicit Thucydides, sed quanto celerius in usum trahendum vel etiam Celsi monitu l. III. c. VII. Quò celerius ejusmodi tempestates corripiunt, eò maturius auxilia, etiam cum quadam temeritate, rapienda sunt, & malum nascentis facile opprimitur, in veteratū fit robustius, dicebat Cic. l. V. Philipp. nemoq̃; celerius opprimitur, quàm qui nihil timet, Vellei consilio lib. XI. Χερνίζειν verò in affectibus periculosis, κακὸν esse dicunt Hippocr. f. IV. Alph. X. Et in Epistola ad Cratevam scripta sequentia apprimè huc facientia leguntur verba: Τέχνης μὲν γὰρ πάσης ἀλλότριον ἀναβολή: ἰντεικῆς δὲ καὶ πάνν, ἐν ᾗ ψυχῆς κίνδυνος ἢ ὑπέρεστις. Ab omni quidem arte aliena res est dilatio, sed maximè à medicina, in qua est dilatio animæ periculum. Et alibi Hippocr. Occasionem curationis animam vocat. Aliàs dum Roma consulitur, Saguntum expugnatur. Nec semel saltem, sed pro re nata quater, quinquies, prout morbus & ægri conditio id postulabit. Si remittunt pulsus & symptomata graviora, abstinere à sudore urgendo amplius, totusque in id incumbere, ut veris & legitimis Alexipharmacis vitæ arcem

arcem ab hoste defendas, refrigerantibus internecinum calorem oppugnes viresque refocilles. Si alvus durior, potest initio morbi Clyster, cui nonnihil Alexipharmacorum inditum sit, applicari, vel suppositorium, præsertim in iis, qui corporis sentinam præservantibus lenitivis haut eluerunt, & ubi certæ magnæque putredinis notæ animadvertuntur. Symptomatibus potes mederi modo, qui præscribitur à plurimis, habito semper respectu ad id, quod magis urget, an morbus, causa, vel symptoma velit prius sui curationem. Elapsis quinque vel sex diebus benigno aliquo medicamine, ut passulis & prunis laxativis, Cassia, Tamarind. Manna, syrupis lenientibus corruptos humores è corpore tutò potes tollere ter quaterve alvum movendo, ne iterum coeant isti bellumque instaurent: Observatum enim plurimos peste superatâ obiisse postea, quod non deturbârint è corpore humores vitiosos à veneno relictos, atque ita corruptos, ut corrigi amplius, aut in naturæ commodum cedere non potuerint. In pueris præservandis & curandis semper respiciendum ad vermes est, mirum tamen, quod fætus plurimi immaturi prodierint, lumbrici verò nulli, quantum mihi notatum, etiamsi pleraque alexipharmaca istis adversa esse compertas, soleantque iidem aliàs in mitioribus febribus exire sæpè. In phlebotomando hoc observa, si putredo magna, ita ut periculum à putredine (pestilens enim putrida longè gravior urgentiorque est) ferè æquet magnitudinem pestilentis malignitatis, æstus multus sit, plethora, sive ad vires sive ad vasa, & præpoperè citaris, consuetaque aliqua sanguinis vacuatio suppressa sit, tutò partem sanguinis demere potes, ut natura parte oneris levata hosti alacrior fortiorque obvenire possit, si desunt enarrata signa & requisita, fuge τὸν φλεβοτόμον. Ita in quibusdam secui venam, in quibusdam non, & ut verum fatear, tam sæpè (imò sæpius) fefellit votum incisa vena, quàm sæpè auxilii quicquam attulerit. Cautè itaque & prudenter te hîc geras oportet. In sudorificis non possum, non summè laudare & pro primis habere Bolum armen. Terr. sigillat. filesiacam stringensem, quàm bene fecerint hæc duo, quàmque profuerint multis, præsertim si tantillum camphoræ addas, pariter præservando quàm curando, superstitem plurimi mecum testari possunt. Præferrem Ego ejusmodi mixta cum Aceto calend. Fl. Tunic. Vini, Bezoart. aut aquis bezoardicis novis istis Tincturis, Elixiriis, mixturis, quæ aliàs gloriôsè satis ac magniloquo encomio pluribus commendantur, cùm adhuc vis istorum in peste nondum sit probata aut comperta. Vim Theriacalem Bolo armen. attribuit admirabilem Crato Conf. XV. p. LI. vide sis & Epistolam ejusdem CXXX. Chymica remedia, quæ hîc multi crepant, ut non sunt omninò rejicienda, (stultus sit, qui hoc tentet) ita non temerè & indiscriminatim abs quovis recipienda, nisi constet, quis eorum sit Autor, aut noveris eorum materiam, si χειροτεχνίας & πυροτεχνίας particeps fieri non datur. Certè Secreta, quæ hîc plurimi vaninloquidori & Nugipolyloquides, aut, ut Cl. Greg. Horst. in Observ. suis eos vocat, Argenti Exterebronides & fastuosi Midæ, ostentant, ridenda sæpius sunt, quàm admiranda, præterquam enim quod medicamenta occultare & arcana ea habere inhumana sit invidia, & nec divinis, nec civilibus, nec gentium legibus concessa, ut loquitur, Tentzelius in præfatione sua ἐξηγήσεως chymiatricæ. Et remedia, naturæ munera, non ostendere, & in arcanis habere non decet, perfidia atq; invidentia crimine manifesto Alex. Bened. Aph. l. I. c. I. Præclare sanè, Scribon. Larg. Invidentia crimen cum omnibus animantibus indiditum esse debet, tum præcipuè medicis: in quibus nisi plenus misericordie & humanitatis animus est, secundum ipsius professionis voluntatem omnibus DIS indiditum esse debent. Et ἀλλότριον, inquit, Suidas, φιλοσόφων τὸ βασιλεύειν καὶ φιδνεῖν, οἷς (προσέκει) τὸ κοινωρεῖν πρὸς πάντων ἀεδόνως: Alienum à philosophis celare disciplinas & invidere, quos omnia liberaliter communicare decet. Etiam cum ad libellam sive stateram ponderantur, nullius ferè ponderis sunt, quorumq; Autorum, si scrinia excutiendi facultas se sistat fortè, aut occasio, inquit, Cl. Meibom. in jur. jurand. Hipp. commentario, mera saltè deprehendas aliorum inventa, ac remedia in vulgus etiam nota, quæ si tollas,

Aut

Aut si forte suas repetitum veneris olim
 Grex avium plumas
 nihil invenias reliqui, prater jejunam maciem,
 Aut apinas tricasq; & si quid vilius istis
 quibus eruditiorum choro

— Deplumis moveat cornicula risum.

Ut non incongruè applicari istis possint verba *Cunai* l. 7. de *Repul. Hebraor. c. XXIV. Tenet ple-*
rosq; amabilis insania, & favet sibi atq; plaudit imprudens temeritas. Aniles ineptias tradimus
indicem accipimusq; non incauti hercle, sed scientes & inter seria. Ratio autem quare tanto-
 pere laudem terras istas pingues, nec non & alia unctiosa sive sulphurea, imò & nitrum à sulphure
 fixum redditum, procul dubio non est alia, quàm quod pingvia ista sedent sistantq; ζέον istam
 à veneno in humoribus & sanguine excitatam, quem istorum operandi modum acutè acutis-
 simus *Fracastorius de Sympathia & Antipath. cap. ultimo docet inquit: Duo precipue concur-*
runt, quum fervor exundans sit, alterum est excessus caloris & vaporum copia brevi facta, alte-
rum est obsistentia ferventis rei, si corpulentior sit, multum enim extenditur, & in magnas am-
pullas prius, quàm scindatur, propter quod & dupliciter etiam compefcitur exundantia illa, uno
modo, si calorem & vapores frangas, qui extenduntur, quod sit injectis frigidis, ut aqua: Alio mo-
do, si ipsum obsistens ita præpares, ut extendi in magnas ampullas non possit, quod faciunt unctu-
osa injecta, dividuntur enim ipsa ad minimas & non ultra divisibiles partes, qua intermixta parti-
b; corpulenti humidi prohibent extensionem amplam fieri: extensio enim rarefactio quadam est,
rarefieri autem non possunt minima unctiosi, tum quod minima sunt, tum quod tenacis mistionis:
quare cum undiq; interposita intermixtaq; sint obsistenti, faciunt, ut nec ipsum obsistens recipere
extensionem possit, nisi parvam, & per parvas ampullas factam: quare exundantia compefcitur,
& fervor sit, per ampullas crebras & parvas: Hucusq; Fracastorius. Cùm verò tenacis misti-
 onis sint istiusmodi pingves terre, lentore suo citatiorem humorum sanguinisq; (ut obsisten-
 tium) motum inhihent, spiritus uniunt, & disaggregationem prohibent, ut loquitur *Bayrus*, vene-
 niq; ita vim frangunt. Et esse in illis terris singularem facultatem cogendi in unum locum
 malignitatem impressam humoribus naturamq; ad expulsionem adjuvare testatur etiam
Epist. CXXX. Scholtzj. Mixtio autem istorum cum acidis optima est, hæc enim incidunt humo-
 res, rarefaciunt ad sudoremq; juxta cum illis disponunt, & acida ex se alexipharmacam vim
 habent, ut de *Aceto* testatur *Cl. Barth. Hist. anat. Cent. IV. Obs. XIII.* Præstat tamen & Cam-
 phoram admiscere interdum in iis, qui non valde nauscant, nec caput infirmum habent. Hinc
 cum fructu exhibentur *Spir. Theriac. camphorat. Mixt. f. And. Elix. Pestil. Croll. item salia*
plantarum, & alia quæ ex his artis beneficio componuntur. In profundendo sudore modus sit,
 Alexipharmacum confortans exhibendum viresq; aliqua ex parte dissolutæ contrahendæ ite-
 rum & refocillandæ. In protrahendis altè adhuc delitescantibus Bubonibus rarò bene cessit ap-
 positio magnæ cucurbitulæ, præsertim in partibus ligamentosis ut sunt in inguinib; & sub axillis,
 sapius profuit *Empl. Diachyl. simpl. & compositum cum portione Empl. Basil. aut de Meliloto*
mixtum cum Ol. Scorpion. aut Elix. pest. Croll. malaxatum, quibusdam vesicatorium super
ipsum bubonem certam medelam attulit.

Carbanculorum cura, qui non per modum ἀθροισμῷ ἢ συγχρίσεως, ἢ πρυμάλισμοῦ, sed per
 modum κείσεως erumpunt, non multum variat à reliquorum furunculorum curatione, qui vel
 τέρμηθοι vel Δοθίνες dicuntur Græcis, hoc saltem observato, ut semper admisceas unguentis

& Empl. quæ peculiariter pesti adversantur, dolores demulceas, circumquæ carbunculum defensivum Empl. ponas, fortia & acria attrahentia vites. Nec multum opis colloces in loci affecti scarificatione, mitius secum agi pestulant omninò carbunculi, quàm ut ingemines dolores, sæpe ex se sanescunt, si superficiales sunt, nonnunquam altè exedunt carnem, quam citò facias abscedere à sana carnis portiuncula, expleasquæ ulceris cavum, ut artis est. In Gangrænis pestilentialibus omnis vertenda cura ad expellendum est, fortiterquæ, quando per vires licet, sudor movendus, cùm enim & aliàs extra pestilentem affectionem in omni Gangræna quasi venenatus humor sit, ne is ad superiora sive interiora repat summo laborandum est opere & ingenio.

Sat prata biberunt: Retrahendus tandem calamus est, qui limites propòitos, fateor, multum transgressus est, nec tamen omnia, quæ dicenda forent, accurratè notavit, tam enim varias induit formas Pestis, nunc pacem nunc bellum præ se ferens, itaque exercuit medicos defatigavitquæ, ut quò se verterent sæpe nescirent, adeo ut vel Apolline vel Æsculapio fuisset opus, ex quibus medici discere potuissent *properantem sistere mortem*. Et mehercules digna res. Pestis est aut affectus, in quo vires suas exerceat cujusque indoles, eruditiquæ ad illum cognoscendum ingenium suum advocare debent quàm maximè, ut tandem aliquando tam diræ luis *penitus causas tentare latentes* queamus. Quibusdam interna obsidebantur exanthematibus, hinc planctus, & clamor lethalis: Huic signum *Δαυιδάδες* nullum, alii certus intentabatur interitus, hic præter spem convalescebat, ille nemine advertente ibat ad plures: Sic *quem dies vidit veniens superbum, hunc dies vidit fugiens jacentem ex Sen. Tragic.* Et noctem fieri optabant plurimi *tadio lucis, idem de Tranquill. anim. c. l.* Hinc sanabantur agritudines interdum, ut dicebat *Averrh. lib. VII. colliget cap. XXXI. quibus nec medicus, nec natura videbantur sufficere ad curam*, eodem ferè modo, quo aliquando in rebus naturalibus fiunt monstra, sæpequæ dissolvit natura nodum arti medicæ indissolubilem.

Tu, Lector Favorabilis & Candide, hisce vale *ἐπὶ μῦθον*, & si quem ex istis *ἀνολογέσις* positis perceperis fructum, plausuquæ secundo exceperis (uti spero nullum quicquam jacturæ legendis hisce facturum, nisi fortè aut indoctior sit, quàm ut intelligat, aut doctior, quàm ut egeat, aut negligentior, quàm ut euret, aut morosior, quàm ut perferat, quibus hominum generibus hæc non elaborantur, Vives in Comm. ad Aug. de C. D. p. 439.) pro fænore magno id mihi reputavero, & calcaris instar ad alias non minus raras Observationes edendas habebò benevolum animum tuum: sin, laudaveris saltem studium meum, quod etiam in periculosissima & molestissima pestilenti praxi Tibi gratificari lubens voluit. Magna eloquentia esse debet, quæ invitis placeat, & est aliqua laus, magnis excidisse ausubus *inq. arduis voluisse sat est.* E Musæo meo, quod est Brunsvigæ, Anno Æræ salutis M DC LXIII.



OBSERVATIONES MEDICÆ

DE

PESTE BRUN- SVICENSI

ANNI M. DC. LVII.

OBSERV. I.

Scripturus de Peste Observationes quasdam ope- *V. Febr.*
ræ me facturum pretium spero, si paulò magis ex alto sermonis ini-
tia arcessero, & ne quid præterisse videar, ab ipsis incunabulis, &
dum in infantia ea est, eam descripsero, quod fiet quinque priori-
bus Observationibus, & hoc Lectori, qui pestem nunquam vidit, multo
minus curavit, ex usu plurimum fore certus sum, satius quippe est pestilen-
tem ejusmodi frugem in semine suppressere, quàm adultam demetere
mensum. & quando undiquaque contagione ardent omnia, incendioque
pestilenti comburuntur obvia quæque, facile à quovis hospes jam admis-
sus potest nosci. V. Febr. vocor ad ægram mulierem, cujus symptomata
erant sequentia. Cordis anxietas, calor multus continuus, vigiliæ, alvus
pignor. Explorato pulsu facile conijcere erat continua ipsam laborare,
sed ex qua causâ proxima, non ita constabat. Statim præscribo pulve-
rem aperientem vesperi sumendum ex ℥ss Crem. Tart. & gr. V. Tart. Vi-
triol. Manè Bolum laxantem ℥ Flor. Cass. nov. tract. ℥iij. Elect. dia-
cathol. ℥ij. pulv. rhabarb. opt. ℥j. pulv. laxativ. veget. gr. V. Essent. Cort.
Citr. sicc. gr. VI. nitri præparati gran. iij. cum sacch. alb. q. s. F. Bolus,
moderatè operatus est hic bolus, & talia, qualia oportebat, eduxit. Ve-
rùm tantum abfuit; ut cessaverit Cordis angustia, ut etiam aucta visa sit
cum incremento sitis, quibus occursum fuit Julapio ex Aq. è s. Acetos.
Borrag. ana ℥ss. Tinctur. rosar. ℥ij. Conf. Alkerm. ℥j. Syr. Acetos. Citr.
rub. id, ana ℥ss. Spir. Vitriol. parum. Sed indies magis magisque pro-
A dente

dente sese malignitate VII. Febr. sudoriferum hoc præscripsi ℥. Semin.
 Napi ℥i℥. Citr. ℥j. Aq. è s. Cardbened. ℥ij. F. Emulsio dulcoranda sacch.
 perlato. VIII. Electuarii usus proficius fore visus fuit ejusmodi ℥.
 Conserv. ros. provinc. Acetosell. ana ℥j Condit. rad. Cichor. Enulæ ana
 ℥ij. Confect. Alkerm. Terr. sigillat. C. C. ust. præparati ana ℥℥. Rob. rib.
 ℥℥. Spir. Vitriol. par. Syr. è s. Berber. q. s. F. Elect. Item Epithema, ℥
 Specier. pro Epithem. Cord. ℥j. Aq. Flor. Borrâg. Meliss. rosar. ana ℥j.
 M. Acetum nolui huic addere propter vigilias. IX. Febr. ℥. Pulv. Bez.
 Sennert. ℥j. Gos. ii gr. V. cum aq. Scorzonet. sumendus. X. ℥. Aq.
 è s. scabios. Fl. Borrâg. Fragor. ana ℥ij. diascord. Fracastor. ℥ij. Julep.
 Violat. ℥j. Conf. Alkerm. ℥j. Spir. Vitriol. q. s. ad grat. acidit. Cum
 malignitas nondum planè superata videretur sitisque adhuc urgeret, seq.
 ordinatum XII. h. ℥. Radic. Scorzonet. ℥℥. Pom. Citri in taleol. con-
 cis. numer. j. sacchar. alb. ℥ij. Coq. in Aq. commun. ad mediet. Colat.
 ℥ij℥. add. rob. rib. ℥ij℥. Essent. Cort. Citr. sicc. ℥j. M. Hæc potio suas
 meruit laudes, ideoque iterata ejus præparatio est. XV. Jam in lecto
 sedere erecta cæperat, & tum persistendum in confortantibus alteranti-
 busque fuit. ℥. Conserv. ros. rubr. Vitriol. ℥j. Acetosell. Fl. Borrâgin.
 ana ℥℥. condit. Cort. Citr. rad. Cichor. ana ℥ij. Spec. diamb. ℥℥. Syr.
 Acetof. Citr. q. s. F. Elect. Ut tandem reliquias humorum corruptorum
 è corpore eliminarem, sequenti usa est: ℥. Aq. è s. Acetof. ℥j. Elect.
 lenit. DD ℥ij. Crem. Tart. ℥j. pulv. lax. veget. gr. V. Aqu. Fl. Citr. ℥j. M.
 F. Haustulus. Advertant hîc medici juniores, in morborum declinatio-
 ne nunquam fortiter esse purgandum, ne vel diarrhæam vel alium flu-
 xum nequiores concites. Et ita finis salutaris huic curationi est impo-
 situs. Sciendum autem mulierem hanc hæreditati ex morte agnatorum
 ad se devolutæ dividundæ multum interfuisse, eâ postmodum in ædes suas
 deportatâ non multo post ægrotâsse, Agnati ad unum omnes in illa do-
 mo, nescio, quo morbi genere, erant extincti, nec enim à quoquam me-
 dicorum curabantur, & in domum hanc, uti loquebatur fama, illata e-
 rant utensilia quadam ex urbe Bremenfi, quæ tum peste premebatur.
 Hinc sparsim clanculumque irrepsit in totam urbem nostram nemine ad-
 vertente pestilens virus, quo postea tot millia miserè perierunt.

OBSERV. II.

VIII.
 Mart.

Matre pristino sanitatis vigori reddita VIII. Filiam ejus XV. anno-
 rum incescit calor multus præternaturalis cum magna diarrhæa
 & virium dejectione. Vocor, saltem, ut sitim restringam, petit,
 utitur decocto Hord. cum C. C. fact. ℥℥. Syr. de ros. sicc. ℥ij℥.
 Spec.

Spec. cord. temperat. Conf. Alkerm. ad \mathfrak{Dj} β . Spir. Vitrioli modicum.
 IV. Mart. nocte vigesies deiecit, de seq. Elect. sumit, \mathcal{L} . Conf. ros. rubr.
 Vitriol. Acetof. ana \mathfrak{Zj} . Bol. armen. aq. rosar. pręparat. \mathfrak{Zj} . spec. diarrh.
 Abbat. pulv. sem. plantag. ad \mathfrak{Dj} . Theriac. recent. \mathfrak{Dij} . Cum Syr. Acetof.
 Citr. F. Elect. X. Mart. adhuc alvus multum fluebat, nec enim constri-
 gere eam initio conducit, *qualiscunque enim in morbis malignis excretio sit,*
tamen non semper damnanda est, inquit Ballon. l. I. Epid. & Ephem. p. XLIX.
 universum corpus rubris punctulis ad modum petechiarum deturpaba-
 tur, pulsus celer & magnus magnam humorum ebullitionem sanguinis-
 que effervescentiam arguebat. Hęc certissima erant malignę febris ar-
 gumenta, verum de peste nulla adhuc suspicio, quia nec bubo, nec car-
 bunculus, inseparabiles ferę verę pestis Abscessus, apparebat, febris ta-
 men pestilens revera erat, hoc die sequens potiuncula pręscripta est \mathcal{L} .
 Aq. ę s. Cardbened. \mathfrak{Ziiij} . C. C. ust. margarit. pręparat. ana \mathfrak{Dj} . diascord.
 Fracastor. \mathfrak{Zj} . Conf. Alkerm. $\mathfrak{Z}\beta$. Syr. ę suco Cardbened. Essent. Citr.
 liquid. ana $\mathfrak{Z}\beta$. M. XI. Mart. Cum Fauces calore siccisq; fuliginibus
 exurerentur in rimasq; dehiscerent, seq. ordinatum \mathcal{L} . Mucilag. sem.
 psyll. fact. cum Aq. portulac. Aq. ros. plantag. ana q. s. \mathfrak{Zj} . diamor. $\mathfrak{Z}\beta$.
 lapid. Prunell. \mathfrak{Dj} . Syr. de ros. sicc. \mathfrak{Zij} . M. Febre symptomatibusq; ma-
 gnā partem remisissis Analeptics & Julapio sequenti peracta omnis cura-
 tio est \mathcal{L} . Aq. ę s. Acetof. Cardbened. scabios. Borrāg. ana \mathfrak{Ziiij} . Vin. Gra-
 nator. \mathfrak{Zj} . succ. Citr. express. $\mathfrak{Z}\beta$. Syr. Acetof. Citr. ę s. Berb. ana \mathfrak{Ziiij} .
 Spir. rosar. \mathfrak{Zj} . M. Atque ita & hęc orci faucibus erepta est,

OBSERV. III.

PRope Arcem Danquerodam decumbunt liberi omnes in quodam XII. Mart.
 vili Tugurio satis acutę, sed propter egestatem rerumq; inopiam
 medicus non adhibetur. Tandem a vicino, opem utferam pro-
 pter Deum, rogatus intro angustas ædes sordidasq; invenio qua-
 tuor partim in scamno cubantes, alios jacentes in terra, verum superave-
 rant ferę morbi vim omnes, unus periculosius adhuc laborare videbatur,
 inciderat ab acuto morbo in sanguinis sputum & magnum alvi fluxum,
 quem adhibitis idoneis medicamentis per Dei gratiam etiam brevi resti-
 tui. Ex istis omnibus unus mortuus est, reliqui servati in Septembrem
 usque sunt incolumes, quo tandem omnes cum Matre solo Patre super-
 stite ipsissimā extincti sunt peste. Sanę accidit aliquoties, ut nonnulli
 bis peste correpti bis victores evaserint, hinc cordatiores facti intrepidę
 loca infecta adire, cum infectis conversari liberę, nil amplius pestem me-
 tus

tuere : tertium verò iterum veneni vim experti victas dedere manus. Ii, qui periculosum hoc pestilentialium syrtium æquor semel enavigaverunt feliciter, cumque infectis conversari amant, hoc maximè teneant, ut leni pharmaco relictos, à pestilenti febre & imperfecta crisi humores leniter educant corpusque à reliquiis putredinis mudent, lege *Aphorismi XXI. Hipp. sect. I.* tunc minus periculi ipsis erit à recidiva contagiosa, modò non temerario ausu & lucri faciundi ergò sese prostituunt, operamque suam ægrotis sat carè venditent, hoc qui faciunt, plerumque audaciæ suæ pænas morte luunt.

OBSERV. IV.

XXIV.
Mart.

ECce jam clariora latentis veneni indicia. Vir cum uxore inopinatò corripitur cordis anxietate, capitis dolore absque prægresso horrore, pulsu parum à naturali rithmo declinante. Curant me vocari, purgatur herus, heram autem in superiore tabulato cubantem non videbam. Altera die secatur vena utrique, obambulant adhuc per vices, augetur cordis compressio sive coangustatio heri, heræ non item. Curo utrumque ut malignâ laborantem. Tertio die ostendit mihi maritus in utroque inguine parvum tumorem, (bubo erat) remittit angustia cordis, in uxore nihil observo. Ambigebatur de Peste, & certè suspicio non levis erat, occultabatur tamen omni ingenio, brevi restituuntur. Attende hîc saltem, quomodo per gradus ierit eundoque vires acquisiverit, uti de Fama canit *Virgil. l. IV. Aneid.* Pestis valentissimas. Eodem planè modo decrevit postmodum remisitque paulatim de vigore pristino tempore autumnali.

OBSERV. V.

XXIIX.
Mart.

VOcor ad Fabrum fenestrarium curandum, offendo ipsum sedentem in scamno caligis indutum, præ imbecillitate tamen nunc incubitus se reclinantem, nunc se erigentem, explorato pulsu febrem deprehendo mitiorem, de cordis anxietate conquerebatur, siti & alvi constipatione, cætera videbatur sanus. De doloribus vel capitis, vel alterius membri, uti & de bubone & carbunculo, quantum mihi ex relatione innotescebat, nec vola nec vestigium. Conicio ipsum continuâ putridâ laborare, verum admodum falsus sum, subdolè enim mecum agebant, nec detegebant nudè omnia, quæ tamen scire & è re ægroti erat & medici: Optimè enim medetur, cui optima notitia, & quis telis
suis,

*suis, inquit alicubi Cl. Tulpius Consul & medicus Amstelredamensis, attinget, quem non conspicit, scopum? Et Andabatarum certè pugnat more, qui cum ignoto luctatur morbo. Verùm num studiò aut inscitè ita egerint, relinquam in medio. Præscribo statim laxans paratu facilè ex Infus. purg. Zvelff. ℥j β. Elect. diacathol. ℥ij. pulv. rhabarb. ℥j. Camphor. gr. j. Aq. Cinam. cum aq. Cordial. ℥β. M. ab alvi depositione bibebat potiu-
 culam refrigerantem, & meliori loco res ejus esse visæ sunt. Altero die nihil pestilentis suspicans continuo usum alterantium confortantium-
 que, ad meridiem animi deliquium patitur, porrigitur seq. ℥. Theriac. de Citro ℥ij. Aq. Theriac. Fern. ℥j. Syr. Cort. Citr. ℥j. Tinct. Corallor. ℥β. M. non omittuntur interim julapia. Circa sextam vespertinam ite-
 rum ipsum visitans omnia in pejus ruere interitumque minitari video, os meum ipsius ori ferè jungebam ad submissa ejus verba percipienda, nec enim loqui articulatè & sonorâ voce poterat amplius, aërem crassum ex lecti commotione haurio omnium securus. Descendenti mihi de Co-
 chlea occurrit uxor significans in altero lumbo & poplite maculam eleva-
 tam ipsum habere ex purpureo livescentem, horresco ad verbum, ut etiam ultimi pedum articuli senserint subitam istam animi consternationem, subsequente nocte morbus ipsi finem vitæ facit. Uti quis confitetur sua errata, ita ab iisdem absolvitur. Nihil mihi de Peste suspicionem move-
 bat, utpote de qua altum in universa civitate erat silentium, maligni ta-
 men quid subesse facilè erat conjicere. Scribo tum temporis ad Cl. Herm. Conerdingium Archiatrum Wolferbytanum. (Ut qui doctorum homi-
 num, præsertim ὁμοτεχνῶν elegantiorum amicitiam & benevolentiam plurimi facio.) his verbis: *Si hic affectus non est ipsa pestis, saltem valde congener ipsi est, nemo tamen vel Medicorum vel hominum vulgarium pe-
 nitus id cogitabat. Posset hæc mihi quis movere litem acriterque ex-
 probrare, quod initio erraverim, ipsamque morbi speciem non perfectè in hoc ægroto apprehenderim, atque adeò hinc facilè cavillandi & alios medicos occasionem adipisci. Verum enim verò, etsi non negandus meus iste error, quem potius ingenuè fateor, tamen optatò traham hîc in consortium Galenum ipsum, qui lib. II. c. V. de loc. aff. Coli dolorem, quo laborabat, primum pro nephritico habuisse apertè fatetur. Et Ego, inquit idem lib. VIII. M. M. c. III. nec in omnibus ægrotantibus fateor exactè me sci-
 re primo die affectum, nec ullam diariam febrem me fugere. Et certè homi-
 nes sunt medici, & hinc nihil humani à se alienum putare debent. Hippo-
 crat. lib. de veteri medicina ait, Καὶν ἐγὼ τούτον τὸν ἰντρὸν ἰσχυρῶς ἐπαι-
 νέοιμι, τὸν σμικρὸν ἀμαρτάνοντα. Τὸ δ' ἀκριβὲς ὀλιγάκις ἐπὶ καλιδεῖν,*
 A 3 Ger.*

Certè cum Ego Medicum vehementer laudârim, qui leviter delinquat, cum exacta certitudo rara sit conspecta. Adeò

Multa tegit sacro involucro Natura, nec ullis

Fas est scire quidem mortalibus omnia.

Interim Medicus diligenter observare debet monitum Hippocr. l. VI. Epid. s. II. t. L. ut in morbis ad hoc se exerceat, quo vel prosit, vel saltem non ledat nihilq. omiserit eorum, quæ ex arte faciendæ erant, quo sensu etiam Bocchoris Egyptiorum antiquissimus Legislator lege latâ absolvebat medicos à culpa, si sacri Codicis normam, id est, medendi methodum & normam longi temporis usu firmatam & ab optimis artificibus in curandis agris observassent accurate, uti videre est apud Diodor. Sicul. lib. I. c. LXXXII. Nolo tamen istis patrocinari medicis, qui vel uno alterove in Academiis absoluto anno illotis, quod dicitur, manibus sacram hanc artem invadunt, & masculè sæpe occidunt, qui suæ se concredunt curæ, sive altâ ignorantia, sive temeritate id peragant facinus. Quo ex numero certè non sunt eximendi, quibus à fornacum carbonumque Chemicorum pulvere fumoque manus adhuc parum nigrent, & tamen mox experientissimi practici audiunt. His omnibus meritò legem scripsit Ulpian. dum inquit, *Quicquid medicus per imperitiâ commisit, imputari ipsi omnino debet, nec prætextu humane fragilitatis delictum decipientis in periculo innoxium esse L. Illicitas. VI §. Sicuti D. de Officio Præsidis. Imperitiâ enim culpa annumeratur L. Si servus, XXVII. §. si calicem. XIIX. D. ad L. Aquilam.*

OBSERV. VI.

Circa hæc tempora puella XIV. præter propter annorum mittitur à Parentibus allatum cerevisiam, quæ suspensa hedera vendibilis erat in vicinia, ibidem, nescio quam ob causam, vapulat, colophòq; fortius impacto humi prostermitur, domum rediens malè habet, paucos post dies moritur. Vocatur in jus, qui colaphum impegerat, diu sub Judice lis est. Jubeor à Magistratu istuc ire cum Deputatis & Chirurgis duobus ad penitus perscrutandum locum affectum, & si fieri posset, proximam mortis causam. Consideratis, quæ extra Cranium sunt & collum partibus, invenimus aurem dextram, collum ad humerum usque colore alieno fædata, hunc ex contusione alicujus venulæ provenire esseque sanguinem extravasatum initio judicavimus, verum raso capite nihil invenimus, cui sugillatio ejusmodi potuisset adscribi. Itaque interiora Cranei fuerunt adeunda, secumimus, quæ sivimus sedulo, an in remotiori aliquo recessu delitesceret aliquid sanguinis coagulati, sed omnia in naturali statu deprehendimus, nec vel guttulam sanguinis extra Vas ibi conspexeris,

xeris. ulterius non quæſivimus, nec attrinebat. A peste, quicquid hujus fuit, fuisse, subsequens dies satis docuit.

OBSERV. VII.

Nunc fractis claustris compedibusque solutis in publicum prorumpit magno conatu pestilens virus malitiamque, quâ hætenus malitiosè ex occulto aliquibus fuit infestum, in apicum profert, classicum canit, omnibusque & singulis universæ civitatis incolis apertum bellum indicit, Sartorisque alicujus (cujus Cæsar cognomen) domum tam superbè & atrociter invadit, ut infecerit, prostraverit, mortique dederit omnes, Parentes, liberos, famulos famulasque minimâ filiâ in vivis relicta, sed & quæ satis truculenter à pestilentia diu fuit vexata. Primum liberi corripuntur, meam opem & operam implorat Parens, præscribitur sudoriferum sequens ℥. Aq. Bezoart. Fischer. ℥j. Theriac. de Citr. ℥ij. Terr. Sigillat. ℥ss. mixt. simp. ℥ss. Syr. è s. Cardened. ℥j ss. M. sequenti die mortem obit, reliqui præservatoria jubentur sumere. Brevis dein ipse Sartor inficitur, petunt accessum meum, recusor, religio enim mihi erat præsentissimo me periculo objicere & exinde fortè, si non corpore, saltem veste contractum venenum ad meos & alios, quos tum plures curabam, deportare, atque ita disseminare malum, quod omni arte potius inhibere oportebat; nec enim eo tempore sacramento obstrictus medicinam faciebam, & ut fatear, quod res est, magnum mihi jam incusserat metum & terrorem nova illa & truculenta bestia, ut istuc ire à me impetrare planè non potuerim, ideoque aliquot dies absens curo. Postea alius vocatur Medicus, λαιδρός, qui sat temerè & lubens eò se confert multa pollicitans, sed omnis frustra locatur opera, & intra unam aleramque hebdomadam omnes, ut dixi, perierunt pestis sævitia. IX. April.

OBSERV. VIII.

Gliscebat per hæc tempora malum, & per plateas, pestem in civitate esse, rumor spargebatur, tunc cautius quisque se gerebat, multiq; præmunire se à tam feroci, horrido, fatalique hoste satagantes consilium auxiliumque meum efflagitarunt, quibus multa præscripsi, uni hoc, alteri aliud, inter illa, quæ tuta & experta reperi, primas facile tenent sequentia: ℥. Aloës rosat. aut Violat. ℥ij. Rhabarb. opt. aq. Cinam. aspers. (interdum sine aq. cavendo caliditatem.) ℥i V. Sulph. stillat. Nitr. præparat. ana ℥j. Myrrh. Croc. ad ℥ss. Conserv. rosar. rubr. aut Violar. ℥V. Sacch. albis, in Aq. Scord. aut aliqua theriacali dissolu-
ti

ti ℥iij. F. Morfuli pond. ℥ss. bis in septimana sumendi : interdum diacryd. & aliquid Camphoræ addebatur, prout videbatur hominis constitutio id requirere & ejus conditio. Testor fidem & conscientiam meam, neminem illorum, qui horum Morf. usum sibi fecerunt familiarem, vel peste infectum, vel diem suum, quod Ego sciami, licet diligentius in id inquisiverim, obiisse. Diebus interjectis singulo mane in usu mihi erat mixtura sequens. ℥. Decoct. C. C. vel Scorzonæ, vel utriusque simul, ℥ss. Aq. è s. Acetof. ℥iij. Aqu. Theriac. Fern. Acet. nuc. sudorif. ana ℥j. Oxyfacch s. Syr. Atetof Citr. ad ℥j. Essent. Citr. liquid. ℥ss. Essent. Acetof. ℥j. Bol. armen. aq. ros. præparat. Terr. sigillat. ad ℥ss. C. C. ust. præparat. ℥j. Conf. Alkerm. mixt. s. And. ana ℥j. Bis in die de hac sumebatur, mane tribus horis ante prandium, vespere unâ hora ante cibum sumendum, dosis qualibet vice 3. Cochlearia, & hæc potio adhuc à multis, qui eam sumperunt, magnopere deprædicatur, & formulam sive descriptionem istius bene custodiunt. Hisce subjungebam Pulverem suffumigatorium, qui *Pencero* adscribitur, ejus compositio talis est : ℥. *Vitrioli ungar. vel Goslariens.* ℥j. *Nitri puri* ℥ij. *Alumin. myrrh. ana* ℥j. qui si vel cum Acet. simpl. vel rosat. vel Flor. Tunic. vel alio convenienti in tegulam vel lapidem coctum candefactum inspergitur, optimum & non infuavem de se fumum spargit omnibus domus angulis rimisque se insinuanturum vestiumque plicas pervasurum. Et nescio sanè, utrum quid nobilius ejusmodi suffumigio pestis tempore possit usurpari meâ saltem sententiâ. Hisce succedunt & Sulphur, accensum, & Calx viva in conclavi suspensa vel posita, & aqua frigidâ aspersa, & certè non ultimam merentur laudem.

O B S E R V. I X.

XX. Maj. **I**psâ Pentecostes hebdomadâ Matrona quædam cum suo marito extra portam exspatiatur paululum recreandi se ergo, in locum. qui nobis dicitur *die Masch*/ ubi Cives nostri quotannis eâ ipsâ septimanâ magno numero convenientes bombardarum, nonnunquam & Tormentorum majorum explosione ad metam directâ infinitâ spectantium multitudine sese exercent. Et ecce, dum illuc ire contendit, retrospiciens stante pede sequi se videt inopinatò virum, cujus domicilium infectum dicebatur, statim terrore percita domum properat, pestis veneno se afflatam clamitat, meq; acciri jubet. Ego è Convivio, quod quidam ex Dnn. Coss. in quadam valli parte instruxerant, advolans deprehendo ipsam in hypocaufto ambulantem, tristem & sibi malè esse conquerentem, præscribebantur expellentia, Cordialia &c. In eodem conclavi unâ sedebat & annosa ejus

jus ancilla, proclivitatem in vomitum incusans, præmonui hunc ipsum etiam pestis nuncium non rarò esse, contra asseverabat illa sæpiculè sibi tale quid evenire, & nihil portenti illud portendere, petere se saltem, ut naturæ motum promoveam vomitumque procurem. Annuente & confirman-
te herâ rem ita se habere, præscribo vomitorium mite, quo assumpto
ἀνὰ καὶ τὴν noctem diemque purgata in aliud conclave secedere jube-
tur, ibique morti simillima aliquot dies detinetur, delirat, bubo in ingui-
ne erumpit, necessaria ibidem ipsi subministrantur. Heram invisens &
ipsius ancillæ curam habeo ita flagitante & urgente herâ. Verùm hæc
sursum deorsumque purgata post pauculos dies melius habet & convale-
scit, (sic fortuita remedia aliis interdum sunt efficaciora) heræ vero par-
vus tumor ad costas nothas obnascitur vix perceptibilis, quiq; nulla arte
ad exteriorum corporis habitum poterat protrahi, illa tandem nullo gra-
viori symptomate afflicta placidâ morte defungitur tanta cum animi
constantia & alacritate, ut sexum ferè superaret.

OBSERV. X.

Alia juvenis uxor nihil dolorum sentiens, nec quicquam in corpore *XII. Jun.*
pestilentis, oculis quod potuisset usurpari, animadvertens, conque-
rebatur de anxietate saltim quadam circa cor, quam ex sola forti
imaginatione contraxisse se firmiter asseverabat: Lectum semper re-
jiciebat, incompositè jacebat & irrequietè, quod malum est ex Hyppocr.
non poterat induci, ut crederet contagione pestilenti se esse infectam, hinc
medicamenta ægrè, & non nisi multis precibus viri adstantiumque sume-
bat, quam tamen vel unicum aut alterum Sudoriferum & Alexipharma-
cum debito usurpatum modo potuisse servare dixisses. Inculpati erat
temperamenti, ideoque in vitiosos humores venenum non poterat agere
& sæviora accidentia excitare, febris erat mitis & Ephemeræ similis, eo-
que faciliùs cessisset sudoriferis. Falleris tamen hîc, medice, non rarò
symptomatum febrisque lenitate, quod natura jam victa oneri succumbit
tumultumque resistendo cedere impotens est, imò plerumque pestis eò per-
nitiosior est, quando vel nulli bubones vel anthraces in corporis
habitu erumpunt, tunc enim in spiritibus potius &
tenuiore sanguinis parte residere pe-
stilens virus credendum
est.

XVII. Jun.

OBSERV. XI.

QUædam mœroribus tabescens, timoribusq; ita anxiosa erat, ut ad pestis nomen etiam inhorresceret, visâque muliere, quæ populum ad indictiva funera (Tacita funera per certè pauca fuerunt, siue acerba, siue immatura ea fuerint, quibus iusta persoluta non sint, exceptis iis, quibus Civitatis jus nondum obtigerat. Nec ullus unquam noctu tumbæ illatus est, licet antiquum hoc sit, & tutius de nocte sepeliantur defuncti peste, quod tunc minus exhalationum cadavera reddant, populusque non ita frequens in vicis obambulet.) sollicitabat, præ cordis anxietate in terram pene cadebat, & in re tam trepida cum *T. Hostilio templum pallori pavoriq; votura* credebatur, nec aliud illa meditabatur quam certam mortem, procul tamen adhuc à domûs limine stantem, quæ etiam, ut & pestis, habitaculum ipsius non salutavit. Cordialibus, Elix. propr. Par. & pestilentialibus pilulis Ruffi præservabatur, quam tamen jurâsles non potuisse servari, domus suffumigiis pura manebat. Quomodo hæc vim contagii evaserit, dubitaveris fortè, cum Medici omnes statuunt, verissimumque sit, Terrore & metu nihil esse pestilentius. Causam quidam dicunt esse quod, qui timent, semper frigidiores spiritus sanguinemque habeant. Possum sanctè affirmare, sæpe sapius mihi tale quid evenisse insperatò, unde animus repentè obstupesceret, sine ullo tamen (pro quo Deo sospitatori meo indefinens debetur gratiarum actio) sanitatis incommodo.

XIX. Jun.

OBSERV. XII.

ADOLESCENTI cuidam scholastico plurima in corpore *ἐξαιθήματα*, & ulcuscula purpurea nigricantiaque oboriebantur instar scabiei alicujus, absque ullis aliis symptomatibus. Mihi hoc suspectum valde erat, illi contra strenuè nitenti cæteraque se sanissimum affirmanti præscribo purgans, quod septies sollicitavit alvum, à quo morbus nec melior nec deterior factus est, tamen paulatim adhibito unguento evanescere ista *Ἀποθήματα*, quæ capitis aliqualis dolor comitabatur. Carbunculos pestilenciales fuisse probabile admodum mihi fiebat, quia pestis seminariùm jam tum in civitate sparsum noveram, & ferè uno eodemque tempore prodibant ulcuscula illa, tum quod soror ipsius post paucos dies bubone corripiebatur pestilenti, quo etiam lecto detinebatur, quem meis ipse manibus contrectavi, adhibitisque unguentis & Emplastris perfectè sanavi, uti & alios quam plurimos, Chirurgis suam

ope-

operam initio ægrotis denegantibus, donec Magistratus quendam mercede conductum præficeret laborantibus, qui tamen non diu in humanis fuit, sicuti post peculiari observatione patebit.

OBSERV. XIII.

XX. Jun.

QUædam puella IX. aut X. annorum correpta peste continuis vomitibus molestabatur, & de maximis cordis angustiis conquerebatur, à confortantibus sistentibusque enormem illum vomendi conatum pejus habebat, adeo ut nec externè nec internè vomitum coercentia præscribere potuerimus debuerimusque, solis odoriferis ad plures dies sustentata est, post mente capta Fatis cessit. Notes obiter, quod heic non pars illa principalissima corporis, quæ Cor adpellatur propriè, indigitetur, supràque Διάφραγμα intra pulmones conditur, incessabili & interrupto systoles & diastoles motu palpitat, fonsque est vitæ & caloris; sed intelligitur hic os ventriculi superius, quod veteres Cor appellavêre, ut vel ex Gal. comment. super Aph. Hippocr. s. IV. Aph. L XV. palam est. Paucos esse servatos, quibus vomitus sit imperatus, certissimum mihi est, adeo sanè primis digitorum articulis vomitoria attingenda in pestis curatione: Cum enim initio nescias, quò vergat natura, aut ubi imprimis lateat recondita vis veneni, ἀλόως agis, cum excitas id, quod satius fuerit quiescere, nec in tua potestate est sistere, quod ad motum imprudenter excitasti. Ideoque hic magnâ circumspeditione opus est, ne incidas in Scyllam, dum satagis vitare Charybdim. Statuunt medici (dicat hoc & ratio, & experientia confirmat) quartâ, immò, dico Ego, & primâ & secundâ, aliàs

Elleborum frustra, cum jam cutis agra tumebit,

Poscentem videas, venienti occurrere morbo.

ab invasionis horâ sudorifera esse exhibenda, quâdo ergo vomitoria? Præterea sæpe ipsum ægrum invasionis hora latet, ut qui in somno corripuntur expergetique jam bubonem habent, quale infra exemplum proponetur, aut qui semper dormiunt, nec quicquam in corpore erumpit. Si criticus est motus sive vomitus, nunquam sistendus, nî modum excedat: quia verò in Peste verâ crisin rarissimè deprehendas expectesve, raroq; natura ἀρτίως expellat materiam morbificam in peste, & quibus hoc obtingit, bene cum illis agitur, sed sæpius orgasmus est materiæ præ copia, cautè quæso agas, ne præcipites ægrum in laqueos inextricabiles: Morbus enim sic

Exsuperat magis egrescitq; medendo.

Nec Pests vomitum indicat propriè & per se, sicuti nec venæsectionem

aut purgationem. utpote quæ non plenitudinis excessu verum pravitate nos oppugnet. ἢν μὲν ὅσα δέι καθαίρεσθαι, καθαίρονται, συμφέροι, ἢν δὲ μὴ, τουναντίον, ex Hippocr. sect. I. Aph. II. *Sitalia, qualia oportet, purgantur, bene est sin minus, contrarium evenit.* Cum ventriculus impurus est, aut inibi fortè pestiferum virus residet, nonnunquam conducit vomitus juxta Aph. XX. §. I. Ἄ δέι ἄγειν, ὅκου ἂν μάλιστα ρέσῃ, ταύτη ἄγειν, ἄλλ' τῶν συμφερόντων χωρίων. Ast, uti jam monui, magnâ circumspeditione & firmo τοχασμῶ hic opus est, ne noceas illi, cui veneras auxilio.

OBSERV. XIV.

XXVIII.
Jun.

Medicus urbis nostræ primarius & Senior, Amicus meus honorandus, ab aliquot annis malè habet ob Cardialgiam, uti ajebat, sæpè sæpiùs ipsum affligentem, quam plerumque vomitu sedabat, aut saltem mitigabat, imò opinabatur maleficio se illaqueatnm, quàm opinionem animo suo evelli vix patiebatur. Is iterum consueto morbo irretitur vesperi, vomit, plures clysteres domestici & paratu faciles injiciuntur, sed sine fructu. Itaque cum hâc via non procedit medela, aliam ingreditur, & vomitu vomitum curaturus Tart. Emetici gr. ij. assumit, pejus habet, horâ noctis prima me accersiri jubet, invenio ipsum periculosius quàm aliàs decumbentem cum maxima anxietate, Clysterem præscribo iterum, operatur, sed res ejus inde haut meliores evadunt. Mane circa horam quintam iterum vocor, ad volo, auctam video cordis anxietatem, propterea jubeo confici ipso annuente Aquam cordialem cum carminantibus & Anodyno Cordiali, quod opium ingreditur, verum nec sedatur angustia cordis, nec sistitur vomendi conatus, ideoque ipse assuetæ curæ insistens vomitum iterum digitis proritabat, ultimo tandem materia nigricans evomitur, circa octavam moritur. Metuo valde, ne pestilens virus se associaverit huic affectui, cùm postea omnes ejus superstites paucis hebdomadis interjectis eo fuerint infecti, quidam etiam mortui, uti in sequentibus notabitur.

OBSERV. XV.

XXIX.
Jun.

Fæmina constantis ætatis, frigidi sicci temperamenti corporisq̃ue non impuri, conqueri incipit de nausea cum capitis dolore. Vocatus Enema statim injici jubeo, circa vesperam sudoriferum sumit. Manè melius habens de alvi stipticitate saltim sollicita est, illamq̃ue
ut

ut solvam, obnixè petit. Cùm nondum omninò constaret contagiosa lue illam teneri, petitioni illius satisfacturus præscribo pulverem laxativum ex crem. Tart. ꝯj. Fec. rad. Aron. ꝯss. diacryd. Sulphur. Camphor. ana gr. j. bis operatus est cum ἐνφωρία, bihorio à medicamento operatione in utroque inguine bubo erumpit nullo gravi symptomate stipatus, applico Empl. diachyl. s. & de Meliloto cum ol. scorpion. vel etiam Elix. pestilentiali Croll. malaxatum, sed neuter ad maturitatem pervenit, brevè integrè convaluit. Multoties usus sum hoc Empl. felicissimè, emollit, maturat, discutit: & licet Unguenta & Emplastra quodammodo obstruere cutis poros videantur, tamen quia emolliendi, digerendi & discutiendi vim obtinent, & quando calidè inunguntur, non obsunt. Per certò sæpe, immò ferè semper, ὀρθώδους & recti consultissima natura magno hominis bono ad glandulas sive adenes, carnes puta humidissimas, inguinales & alias protrudit materiam pestilentem, unde bubo pestifer emergit, Ille ipse Bubo (uti & Carbunculus sive Anthrax) non semper in humidum ulcusculum degenerat, sed sæpe siccatur & per se evanescere consuevit, aut, quod & Hippocrati notatum III. Epidem. §. XXIV. ad quam putredinis diversitatem respexisse videtur Gal. in III. comment. ad eundem locum, abire in putredinem à pure diversam. Quando enim materia vel pauca est, vel persudores uberes aliò versa, fit, ut suo quasi nutrimento privatus tumor augeri primò desinat, mox calore partis nativo, adde & medicamento externi, discutiatur & in auras exolvatur. Interim nil vetat processu temporis pro materiis crassioribus educendis in usum flectere benigna cathartica.

OBSERV. XVI.

PRægnantes ocyùs frequentiusq; peste solere aliis corripì neminè put. XXX. Jun. to ambigere, cùm corpora habeant pravis humoribus referta, eosq; ad putrescendum valde dispositos. Interim tamen & hoc verum, mille licet, tum sui, tum fatus concepti ratione, sint obnoxia periculis & mutationibus, quod gravissima quandoque etiam perpestæ fuerint illaeso fatu. Ita quædam duodecies purgata incolumi fatu, hydropica fuit. Ballon. l. II. Epid. & Ephemerid. p. CCLXV. Cuidam sanguis multus fluxit ex utero, credebamus aborturam, tamen ad iustum pariendi tempus fatus utero gestatus est. Puella gravida fetum abactura totis sexaginta diebus Euphorbii ꝯj. quotidie assumpsit, nullo tamen profectu. Henric. ab Heer Obs. XIV. p. CLXXII. etiam cyclamini radices in sinum pudoris adexit p. CLXXIX. Plura hîc compilare exempla nil attinet, id, quod sequitur satis declarat,

B 3 quid

quid prægnans sustinere possit, & certè meretur hic Casus observari diligenti-
 simè. Cujusdam jura docti Uxor septem menses gravida malè ha-
 bet, me & obstetricem curat accersiri. Convenimus ambo, deprehendi-
 mus carbunculum purpureum in inani parte lateris sinistri in musculo
 obliquè descendente. Præscripta sunt Alexipharmaca, Confortantia, Cly-
 steres, sudare non poterat, nec id obstinatè fuit urgendum, *ιδρωτὶνὰ*
 enim & menses movent, & urinam, quod hic propter fatum grandiuscu-
 lum tentare fas haut erat. Analeptics, Alexipharmacis temperatis, fa-
 tumque respicientibus medicamentis res omnis peragi postulabat, donec
Ἀνθραξ ad maturitatem pervenit, quod satis diu protractum est tempus,
 & ad tantam amplitudinem venit, ut volâ manûs obtegi ferè nequiret,
 tamq; profundus erat, ut pollicem abscondidisses in ipsius cavitate, dixis-
 sesque penetrâsse ad ipsum peritonæum. Accidentia multa aderant, &
 summa virium prostratio, nunc lipothymia, vigilię pertinaces, alvi obstru-
 ctio frequens, nunc deglutitionis impotentia, & quando deglutire cupie-
 bat, dolor à ventriculo per totum oesophagum quasi percipiebatur, à fu-
 liginibus siccis acribusq; inductus. Non semel mehercules pro deplorata
 illam judicavimus, debito tamen tempore sanum enixa fatum est. Mi-
 rum quod non intrârit ipsum uterum venenum, ejeceritq; non reluctan-
 tem tenellum fatum, quod in aliis pluribus animadvertere contigit. Sta-
 tuendum quod potentior veneni vis ad musculum illum à natura mor-
 borum medicatrice fuerit protrusa, nec enim bubonem ullum experta est,
 sed febrim intensam, quæ multum negotii nobis faceflebat. Clysteres
 purgantes & refrigerantes omnium optimam attulisse visi sunt opem.
 Atq; ita tandem Numinis benignitate feliciter periculosam hanc enaviga-
 vit Charybdim, quæ ab omnibus certo certius credebatur pessum itura.

OBSERV. XVII.

Circa diem Joann. Baptistæ quidam juris peritus periculum, quod o-
 mnibus imminebat, evitaturus hinc Hannoveram curru vehitur, in
 itinere nonnihil malè caput habere, dum Hannoveræ est, illico con-
 sultit CL. Busmannum Medicum ibidem, qui conspecto ægroto au-
 ditoque unde esset advectus peste ipsum laborare pronunciat, nec sibi ex
 mandato Serenissimi Principis integrum medicam ipsi adhibere manum,
 propterea statim ad nos redit, in inguine enascitur bubo, suppuratur, cu-
 ratur tribus septimanis feliciter & pristinam valetudinem brevi recepit.
 Quod hic corpus suum semper purum à pravis humoribus servaverat, hu-
 jus nunc fructum tulit non mehercule panitendum.

OBSERV. XVIII.

Quodam die, cum nondum invaluerat pestis, dabaturque spatium *III. Julii.*
 animi recreandi ergò tantisper expatiari, cum filio meo extra por-
 tam pedem pono etiam hoc sine, ut ab Aucupe aviculas quasdam
 emerem, in hypocausto meo ut circumvolitarent, alisque suis aë-
 rem verberando istum purificarent, utque ex ipsarum vel malè vel bene
 esse aëris dispositionem & puritatem æstimarem. Fores dum pulso ac-
 currens puella patrem domi esse negat, ille in tabulato decumbens mor-
 bum celat, auditoque quid vellem, dicebat, se nullas nunc habere aves,
 cras se velle eas inescare, & si quas caperet, mihi venditurum. Altero die
 iterum istuc eo sciscitatum de captura avium, & ecce bonum Aucupem
 vitâ functum in domûs area arcæ suæ ferali inclusum offendo non sine ani-
 mi magnâ consternatione, mitto aves, nec ulterius ad ædes ejus me con-
 fero. Hic pridie cæperat ægrotare ex accepto nuntio, quod medicus,
 quo cum familiariter vixerat, graviter decumberet, leviter horruit cum
 aliquali capitis dolore appetitûsque imminutione, manè, quo ipsum hu-
 jus rei inscius adibam, pulverem pyrium, quantum ad bombardæ explo-
 sionem sufficit, cum aceto sumplerat, non sudavit inde, potius inflatus
 venter, nec ἀνάθει nec κατὰθει sese exonerare potuit, donec tandem
 vomitus allevationem attulit, superato hoc accidente eodem die abit in
 rus munia sua expediturus, vesperi pejus habet, in corporis habitu nihil
 apparet, ipsâ nocte mortem cum vita commutat. Dum maritus in fere-
 tro est, incipit ægrotare & marita carbunculo in carpi flexore primo seu
 externo sinistri brachii exorto, & in collo, bubone autem magno adenosas
 inguinis partes occupante, qui ad maturitatem non pervenit, quod mi-
 reris, propter magnam protuberantiam, sequitur infecta mariti exequias.
 Sequenti die à re forinsecus accedente perterrefit, incipit varia sibi imagi-
 nari, delirare, fit maniaca deliriis adeo efferis, ut discurreret extra domum
 pernici cursu, sepesque hinc inde saltibus superaverit, postero die quie-
 tior est & paulatim ad se rediens integrè restituitur omnium adhuc bene
 memor.

OBSERV. XIX.

Filiolus meus lactens incipit segniùs ore apprehendere matris papillas *V. Jul.*
Hocce pios illi concessum munus in usus
 die Veneris, & nonnihil pallere, macula aut tumor in corpore nul-
 lus, die Solis convulsivis corripitur motibus adhuc nihil quicquam
 exterius apparente, circa tertiam pomeridianam

Ex-

Expirabat eas, modò quas acceperat, auras

mortuo lumbi & dorsum statim fœdantur multis amplis maculis instar sugillatorum. Num Pests ipsi vitæ abruperit filum, incertum, quia & aliis Epilepsiâ aut Apoplexiâ extinctis cutem maculis deturpari scimus. Ex vehementi enim ipsorum lucta & motu concussivo facilè aliquid tenuioris sanguinis in cutem potest protrudi, quod post mortem livescit aut nigret calore vitali & temperante evanido, relicto saltim ad tempus calore mixti, qui etiam post mortem in cadavere, usque dum putrere incipit, superstes est. Atque ita brevitate vitæ superavit incommoda, quæ allatura fortè erat insequens ætas.

OBSERV. XX.

V. Jul.

BU bones non semper suppurari, sed discuti sæpe, jam tum monitum. Hinc etiam difficulter quandoque admittunt attrahentia, πεπληγὴ & ἐκπυητικὰ, & demens sit, qui hoc obstinatè tenter, satius enim discutientibus uti & per ἀδύλον διαπνοήν evacuantibus, quam istis Chirurgicis inhiare auxiliis, & diutius urentibus inhærere remediis, affricus blandus, Vesicatorium, & Empl. diachyl. s. & compos. cum parte quadam meliloti, cui nonnihil de Theriaca sit admixtum, & cum ol. Scorpion malaxatum tepidèque applicatum, apprimè valet & expertum est remedium, sive maturationem sive discussionem spectes, nec adeo extimescenda ab Emplasticeis pororum cutis occlusio, quod leniter fricando bubonem potest præcaveri uno alteroque foramine in panno emplastri materia oblito relicto. Fœmina Sola à peste in domo sua reliqua (mariti liberorumque animabus ad cœlestia gaudia avocatis) gravissimè peste corripitur, vomitus multus, bubo sub axilla sinistra mediocris, alvi obstipatio, oris notabilis siccitas. Octavo morbi die accedebat, aliàs non observatus, latus rubor flavescens in facie, pectore, brachio sinistro, dorso, dolorem nullum præter quendam pruritus inferens, sensim panni linei confricatione post aliquot dies evanuit. Hujus bubo ad maturitatem perducì minimè poterat, sed cum tempore tandem naturæ & medicamentorum prædictorum ope discussus est, alvus clysteribus multis servabatur aperta. Vomitus compescuit hic pulvis ℞. Lign. Aloes, santal. alb. Cort. Citr. Mastich. semin. portulac. Coriandr. ana ℥j. Oris siccitas tanta fuit fauciumque angustia, ut cum magno labore & difficillimè deglutiret anginamque minaretur.

Adhuc sana vivit.

O B-

OBSERV. XXI.

Alius, qui sacra tractat, uxor ad octavum jam mensem gravida non *VI. Julii.*
 tam notabili peste affecta erat, uti prior, potius ob animi, quod li-
 beri ancillaque graviter pestiferâ lue decumbebant, mærorem me-
 tumque pestis ægrotare videbatur domestica munia ad duos dies
 bene procurans. Illa lecto cum sese commisisset, valde opem meam implo-
 rat, satis apertè sibi vaticinans se imminens haud evasurum periculum,
 non tam ob contractam pestem, quam, quod utero gerebat, onus. Cor-
 repta medicamenta nihil omninò profuerunt, propterea ad fatum mor-
 tuum saltim expellendum omnis adhibebatur opera & labor, non negle-
 ctis interim Cordialibus, Alexipharmacis, sed frustra fiebant omnia, nec
 enim poterat ejici octimestris fatus etiam validissimis *ἐκβολαίσις* sive
φθορίσις, ultimo tandem vitæ articulo non tam naturæ quàm morbi vi
 exanimis in lucem protrusus est. In toto corpore nihil pestilentis erat,
 ita animi mollities & trepidatio concluderat omne venenum, traxeratque
 calidior uterus internecinum ad se hospitem. Sic multa in peste fieri
 contraria advertas.

OBSERV. XXII.

Speramus semper meliora, si carbunculus aut bubo citò erumpit ma- *VII. Julii.*
 turèque maturitatem adipiscitur: fallimur tamen hoc prognostico
 non rarò egregiè, quando vel imperfecta est Crisis, vel symptomaticè
 potius movetur materia, & non omne, quod corpus infecerat, exter-
 minatur venenum, vel externa aliqua impediens adveniat causa, quæ vel
 remeare cogat, quod certum cursum tenuerat, virus, vel intus latentis la-
 bis motum ulteriorem tardet. Scholastico XX. prope annos nato bubo
 in inguine sinistro oritur magnus, sat maturè coquitur tum vigore natu-
 ræ tum arte, ferroque aperitur ex voto, multa spes hinc ægroto & Chirur-
 go. Procedente tempore multum æstuat, lecto continere se nolebat,
 hinc inde discurrebat, sudore frigido corpus madebat *ὀλέτρια* hæce-
 rant, & tunc primùm vocor. Cubile ipsius ventis æërique, qui tum forte
 frigidiusculus erat & pluviosus, nocturno pariter & diurno patebat, unde
 exituro veneno via præcludebatur, & portio pestiferi contagii, quæ par-
 tim in bubone jam confederat, partim eò cursum suum directura spera-
 batur, mutato recto tramite ad cerebrum retrò ivit, spiritus ibi turbavit,
 tumultuque concitato aliena loqui ipsam adegit, desperata videbantur
 omnia, bubo in ipsum usque autumnum apertus mansit, nec poterat ci-
 tius consolidari ullâ ope. Ita refractarii sæpè sunt pestilentes bubones
 C æger-

ægerque toto eo tempore dubia valetudine fuit, tandem medicamentis Alexipharmacis alterantibus laxantibusque integrè convaluit.

VII. Jul.

OBSERV. XXIII.

Πολύμορφος est Pectis modò hujus, illius modò affectus speciem mentiens, & nisi ceteri morbi eo tempore filerent, jures hoc aut illo affectu decessisse homines, qui tamen ipsissimâ peste sunt extincti. Famulus cujusdam mercatoris acutissimis dentium doloribus tantùm non examinatur. Hera, ut satis provida est & sagax, me vocari curat, primo intuitu nihil præter tumidam malam dextram observo, verùm accuratiùs exploranti mihi occurrit pulsus celerior, appetitus liquidi quàm solidi intensior, alvus obstructa. Quibus suspectis signis excitatus sequentem sudoriferam potiunculam ordinavi ℞. Aq. è s. Cardbened. Aq. Nuc. diaph. Acet. nuc. sudorif. ana ℥j. Syr. Scord. ℥ss. Bol. armen. Terr. sigill. Elix. pest. Croll. ana ℥ss. M. sit in duas doses. Postea bibit mixturam sequentem ℞. Decoct. C. C. crud. clauso vase fact. ℥vj. Spir. lign. sassafr. ℥iij. Succ. Citr. Rob. Berb. Rib. ana ℥ss. Julep. ros. ℥j. Spir. Sulphur. acid. ℥j. Exteriùs applicabat Empl. diachyl. s. de Melilot. ana ℥ij. Theriac. ℥ss. malax. cum Ol. scorpion. Hisce & nonnullis aliis domesticis remediis discussus est intolerabilis ille dolor, & tumor paulatim evanuit.

VII. Jul.

OBSERV. XXIV.

CAcochymici, & qui diætam non observant, corpusque pluribus excrementiis humoribus refertum habent, & in diem vivunt, majus aliis. quorum corpora pura sunt, & ad regulam vivunt, periculum incurrunt, est tamen, & hic, sicuti alibi, consuetudini quid tribuendum. Gravidæ præ aliis abundant superfluis, tum ex retentis, quæ aliàs stato naturæ cursu excernuntur, tum quod non temerè illas purgaveris, venam secueris, adque sudorem illas compuleris, ideòq; huic concipiendæ fomiti omnium optimè expositæ experiuntur virus pestilens citius aliis, & ad unam ferè omnes eo extinguuntur. Fæmina dimidio Gestationis tempore peste inficitur, bubone in inguine excitato, sumit pulverem Bezoart. cum aq. nuc. sudorif. & spir. lign. sassafr. parum sudat, confortatur Julapio, prospicitur buboni, altero vel tertio die abortit, lochia ad placitum procedunt, non ἀθρόως, ut in aliis ad eundem modum decumbentibus observatum, bubo non maturatur, nec discutitur, reliquimus illum naturæ elaborandum, atque ita illam dimisimus. Dum aliquan-

quando multò tempore pòst ædes ipsius prætereo, vocat me, adque se ut paululum divertam petit, tunc narrabat mihi Apostema suum sponte ruptum multum purulentæ ichorosæque materiæ profudisse, ipsa sanavit illud. Alteri primiparæ, quæ abortum fecerat copiosius lochia fluunt, à partu melius habebat, meque subridens tanquam periculo omni decolato dimisit. Cum circa vesperam iterum ipsam in viso, ἀφρων eam invenio, facies rubebat & inflata erat, lochia stabant, & vi morbi sursum raptâ ipsa eadem hora ipsi vitæ finem adferebant. De utero gerentibus cumque morbo quopiam acuto conflitantibus egregius est Aphor. Hipp. XXXI, V. γυναῖκι ἐν γαστρὶ ἐχούσῃ ὑπὸ τίνος τῶν ὀξέων νοσημάτων ληθῆναι, θανάσιμον.

OBSERV. XXV.

Virgo *plenis nubilis annis* nullo alio symptomate laborabat quàm vigiliis, & vomitu, cum facie tumidiuscula rubente. *IX. Jul.* Venæ sectio huic haud dubiè profuisset, si maturè consulisset medicum, vomitum compescere in nostra non erat potestate nec somnum conciliare, quarto aut quinto die cum vomitu ipsam animam evomit. Sequenti medicamento per horas aliquot stetit vomitus, sed postea vehementius repetiit, quod priore quiete neglexerat. ʒ Conserv. ros. rubr. Vitriol. Acetosell. è toto Citr. Meliss. ana ʒβ. Diacyton. s. Specieb. ʒiij. pulv. rad. Torment. ʒβ. Extr. Angelic. ʒi. Syr. Acetosit. Citr. q. s. F. Elect. Nolui validiora adhibere adstringentia, quia vires adhuc constabant, & in tali vomitu sæpius naturæ robur & conatus expectandus. Nulla evacuatio, etiamsi sit merè symptomatica hîc temerè cohibenda: Interdum enim symptomaticæ istæ evacuationes per accidens naturam juvant, materiam peccantem minuendo, virtutemque vitalem suffocatam quodammodo liberando.

OBSERV. XXVI.

Quædam ulcusculum habebat in extremitate pollicis admodum dolens, chirurgus ex arte illud tractabat, domestica munia illa adhuc obibat, nec quicquam præsentis mali metuebat, præterquam quod valde erat timida & de grassanti peste anxia. Suspensos nos habebat animi, utrum vera pestis esset, præscribo tamen quæ contra pestem facerent, atque illam dimitto. Post decem quatuordecimve dies demum ipsius fortè præteriens, cum vocor ad filiam ejus lethaler de-

C 2

cum-

cumbentem parotide pestilentiali, unâ invenio & ipsam Matrem agonizantem cum bubone sub axilla, de quo antea, cum pollicis ulcusculum curabatur, ne verbum audiebatur. Num hæc recidiva erat? Credo. Aut de novo peste infecta est, cum ædes ipsius jam multum contraxissent contagii? nec hoc inconueniens.

OBSERV. XXVII.

XII. Jul.

Fæmina pleni habitus πολύαιμος ætatisque ἀκμὴν vix attingens, horrore corripitur, parum sudat, nec enim se tegi propter æstuationem patiebatur, post sudorem nihil melius habet, angustia erat circa cor & æstus maximus, rubor circa faciem multus, ut igne accensa videretur, alvus segnior suppositorio sollicitabatur ad opus suum peragendum. Quâ de causâ V.S. sit dilata & neglecta non possum recordari, nec enim queo omnium meminisse, quæ annotare me vetabat innumerus ægrotantium numerus. Non poterat sedari medicamentis calor iste uberrimus etiam frigidissimis, quæ mixtim aut alternatim cum Alexipharmacis exhibebantur. Quarto quintoque primùm die bubo in inguine erupit & menstrua fluunt, æstu nihil imminuto, sequenti die aliena loquitur, deliriumque mensibus cursum suum continuantibus increscit, somnus omnis abest, septimo die abiit ad plures. Absque dubio huic profuisset apertio venæ maturè celebrata & laxans aliquod, plenitudine enim onerata vires seriùs expulerunt, quod sibi erat oneri, cuique postea ferendo erant impares.

OBSERV. XXVIII.

XV. Jul.

Vir sexagenario major, publicæ qui etiam præerat rei, vesperi sanus, uti credebat, cubitum se confert, obdormiscit, mediâ nocte horrore pestilentiali expergiscit. Illâ horripilatione è somno excitatus, quod ad manus erat, sumit medicamentum sudoriferum, sudat, declinante nocte advocor, deprehendo intensum calorem, pulsum vehementem & celerem. Ordinatum est refrigerans & confortans, iterumque sudor imperatur. Discedo. Circa nonam matutinam revertens ἀφρων ferè ipsum & vix perceptibilia loqui invenio, bubo in inguine parvus protuberabat indolens, neque manus neque pes suum faciebant officium, altè spirabat sed absque stertore. Altero die abiit è vita. Ipso adhuc vivente cœpit etiam malè habere & ipsius uxor annis haut minor, bubonem in inguine habebat, levius tamen pestilenti contagio tacta videbatur ob gravio-

viorum symptomatum absentiam, evasuraque credebatur, verum quod naturam abhorrebat à medicina, post paucos dies secuta prædecessorem maritum est.

OBSERV. XXIX.

XV. Jul.

Mater, & filia XVI. annos, unam ægrotant, illa gravius, mitius hæc, saltem quoad accidentia, decumbit, mater bubonem in inguine dextro habet, filia nec carbonem nec bubonem, hæc quietior est, nisi quod ultimo vitæ die stragula rejiciebat sibi imposita, mente non constabat, nec ad interrogata respondebat, tertio die moritur. Mater valde æstuat, hinc inde corpus volutat, somnum non videt per aliquot dies, plurimus calor adest, delirat. Ex bubone venenum vesicatorio satagemus evocare, nec male cessit, suppuratur tandem, meliusque in dies habet & reconvalescit, quæ propter inquietudinem ne guttulam sudoris profuderat.

OBSERV. XXX.

XVI. Jul.

Consulis cujusdam filia horrorem patitur cum aliquali capitis dolore, statim assumpto sudorifero sudorem prolicit, à sudore calor increscit capitisque dolor, iterum sudat & corroborantem potiunculam bibit. Altero die parvus sub mammilla dextra apparet carbunculus ad costas spurias, fit ulcusculum non profundum, quod biduum ichore flavo stillabat, remittit febris, curatur Carbunculus absque ullius chirurgi ope & manu Empl. & unguentis cum Theriac. & ol. scorpion. mixtis. Brevi restituitur integræ sanitati, nec ullus alius ex liberis, quæ plures inibi erant, inficitur, uti quoque nullus ex omnibus domesticis. Singularis dei gratia erat, quæ huic familiæ ita salutariter prospexit & benignè, quod an alteri præterea contigerit nostro illo calamitoso tempore, ignoro.

OBSERV. XXXI.

XVII. Jul.

Mulier L. prope annorum queritur de angustia Cordis, (os ventriculi intellige) ructibus, obæsi erat corporis & obnoxia aliis affectibus uterinis. Ad quam eum visito, offendo eam sine stragulo operiente corpus jacentem, difficulterque anhelantem, aliis rectissimæ erat mentis & impeditè loquebatur. Remedia pesti contrariantia & sudorifera præscribere dum laboro, illa obstinatè reclamat sibi nihil

C;

cum

cum peste, nec ullo modo se peste decumbere, saltem antiquum & consue-
tum uteri affectum hanc sibi molestiam creare, nec velle nec posse se mo-
vendo sudori sese componere, petere se tantum uterina.

Quid facias illi? jubeas miseram esse libenter.

Annuo tamen, interim contagi dicata præscribo. Altero vel tertio die
moritur. Tanti est in arduis joculari & optimis consiliis reluctari. Illius
filia, quæ eodem tempore laborabat, plurimis parvis carbonibus in su-
perioribus corporis partibus pectore & mammis defædata erat, vigila-
bat, delirabat, eodem, ni fallor, die cum matre morte defungitur.

OBSERV. XXXII.

XVII. Jul.

Puer sex aut septem annorum extra portam cum Matre ite vulsum li-
num, curru in urbem adferendum, petit se imponi fasciculis lini in
curru positus, ut fieri consuevit, annuunt, non longè curru vehitur,
& ecce repente obmutescit, insueto membrorum motu corripitur,
membra hinc inde jactat, aperto ore jacet elinguis, post biduum, nî fallit
me calculus, redit ad se immemor omnium, quæ contigerant. For-
san ex Lino virulenti, & nescio quid maligni, spirante hoc contraxit mali. Ve-
rùm cum nihil nisi pestis esset, quo te cunque vertebas, & hic ut pestilen-
tiâ correptus tractabatur, optato sanè eventu,

OBSERV. XXXIII.

XIX. Jul.

Adolescens Scholasticus corripitur carbunculo sub axilla sinistra
satis magno, curatur primùm operâ Chirurgi, interdum è lecto
surgens in musæum suum nullo graviore symptomate stipatus se
confert, certo credens morbum omnem jam debellatum. Verùm
cum curatio ex voto minus succederet, Chirurgumque ulterius sive con-
siliū sive juvandi studium deficeret, itum ad me est. Conspecto ægroto
ulcus sub axilla admodum sordidum & amplum deprehendo, curationem
ob arteriarum, venarum, nervorum, ligamentorumque concursus vix
admissurum, æstuabat æger, præ dolore multo somnum non capiebat,
motis sudoribus catharticoque blando dato melius habere visus est: ve-
rùm cum ulcus *κακονθές* altius longiusque instar canceri alicujus serperet
in dies, in pejus omnia ruerunt, tandemque decrepantibus viribus decre-
vit & ipsius vita unàque cum viribus ipsam amisit animam. Ab initio
rectè tractatus potuisset servari.

OB-

Viri optimi & Docti uxor corripitur peste & multum æstuante calore, illico accersor, pulverem expellentem Cordialem sumere ipsam jubeo ex Pulv. Bez. Senn. ℥ss. Magist. C. C. ocul. 69. nitr. perlat. ana ℥ss. (nitrum perlatum egregium medicamentum est in peste,) M. dividatur in part. æq. ij. sumatur cum aq. è s. Acetos. Cardbened. Aurant. Aq. Theriac. Fern. de qua mistura etiam bibit. Pejus habet, præscribitur altero die seq. pulvis ℥. Magist. C. C. ℥j. Smaragd. præparat. gr. V. nitr. perlat. ℥ss. item hæc aq. ℥. Aq. è s. Acetos. Cardbened. ana ℥ij. Cordial. frigid. ℥j. Cinam. diaborr. ℥j. man. Christ. perlat. ℥j. A cujus sumptione remisit in celeritate & magnitudine nonnihil pulsus, quem dum extremis digitorum apicibus exploro, datâ opera avertio faciem, & reclinato corpore carpum ipsius tango, nolebam enim crassum fætidumque & incongruum odorem pædoremque ex lecti commotione confertim exhalantem sciens naribus excipere. Verum, quod mireris, hoc corporis mei positu tantum efficio, ut me repudiato Collegam meum, qui tum primum advenerat, accersiri me inscio curaverit, culpam in me omnem rejiciens tanquam tergum ipsi obvertissem, vel, ut verius efferam, posteriora, (sit honos verbo) atque ita minus magnificè vel honorificè ipsam tractâssem. Egregia mehercules gratia pro tam fideli & periculi plena præstita opera, fortè nondum mens recta constitit ipsi, ut vacillat plerumque ex peste ægrotantibus recta ratio. Sed quod nolim præteriri, non opus erat, novo medico, cum fracta jam major vis morbi esset, revera que jam declinaret morbus atque ægra sanescere inciperet, prout etiam adhuc bene valet. Ita sæpe solent prima sordere, cum majora meliora que sperantur, (quâ sententia Q. Curtius affectuum lenit symptomata) sed argumentum recti est, Seneca judicio, displicuisse malis & contemptum ipsum contempsisse. Quid si hîc ut olim Mediolani, sicut testatur Septal. Animad. & cant. l. V. p. CXXX. lege cautum fuisset, ne tempore pestis primis quatuor diebus medici arteriarum pulsus pertangerent? Etest Simon Pauli medicus Regius Danicus & Professor Hafniæ Præceptor olim meus colendissimus in παρηβάσει sua in ea sententia, quod manus pedesque magis quam aliæ artuum partes excrementis tertiæ coctionis secundum naturæ aut circulationis motum scateant semperque ferè madeant, imò corrumpi circa has partes facilius humores: Hinc non expedire medicis, ut malignâ febris laborantium manus diutius contrectent, nisi sponte suâ contagio velint infici. Donativo sive fostro me honorârunt, ut vel hoc nomine, quod ipsis exprobre, non habeam. Nec medicus gratis, sed condigna mercede præstita

mederi tenetur, Joh. Harprecht, in Comment. ad Instit. Disp. XII. in supplement. Lit. h. Tum, quia nemo suis stipendiis militare cogitur, maxime divitibus. Gloss. in cap. I. verbo inferas, distinct. LXXXIII. Specul. in rubr. de Salar. §. postremo loco, IV. n. II. vers. quia sit infirmus. Tum, quia & Ictus justum consilium & patrocinium licite vendere potest, nec gratis consulere aut postulare compellitur. Can. Non licet. L XIX. caus. XI. q. III. Speckhan. Cent. I. q. XXXIII. Verum sciat hic quilibet, Medico, quam medicus, non rei, quam communicat, sed opera, quam locat, pretium solvi: salus enim hominis nullo beneficio pensatur, inquit, Amm. Marcellin. lib. XIV. Et audi, quam eleganter loquatur in hanc rem Seneca l. VI. de beneficiis c. XV. Emis à medico rem inestimabilem, vitam ac valetudinem bonam, à bonarum artium praeceptore studia liberalia & animi cultum. Itaque his non rei pretium, sed opera solvitur, quod deserviunt, quod à rebus suis avocati nobis vacant, mercedem non meriti, sed occupationis suae ferunt. Et doctrinam, de civili sapientia intelligebat, quod etiam merito referas operam medicam, pretio nummario aestimari non posse dicebat Ulpian. l. I. §. V. d. de extraord. cognit.

OBSERV. XXXV.

XXI. Jul.

Cum jam per plures plateas malum disseminatum esset, vir quidam primarius & clarus ex paterna cura duos ex puellis suis extra portam aëris liberioris & purioris captandi ergo monialium committit curæ, ut sint securiores ab infectione. Non diu ibi subsistunt sanæ, verum major natu de capitis dolore conquesta reportatur ad lares paternos, altero die sub utroque inguine in musculo, qui Triceps Anatomicis audit, sibi dolere dicit, contemplamur locum parvumque tumorem ibi palparamus, alitè tamen adhuc latitantem, præscribuntur, quæ à tenello corpore bibi poterant, extusque ad evocandum quædam calide applicantur, dein itum ad vesicatoria est, quæ manifestum auxilium attulisse visa sunt. Ejusmodi etiam vesicatoria tumentis loco imposuisse in Peste Philippum Ingrassiam legimus in ejus opere de Peste part. IV. c. XXVIII. pro ut eum citat M. A. Severin. de Effic. medic. p. m. CCLIII. Post applicatum Empl. diachyl. cum aliqua portione de Meliloto mixtum cum. ol. Scorpion. vel Elix. pest. Croll. felicissime succedit brevi que convaluit, sic uti & sororcula ejus, quæ brevi post simili modo decubuit, nec minus feliciter divinâ annuente gratiâ paucis restituitur integræ valetudini.

OB.

OBSERV. XXXVI.

XXI. Jul.

Virgo quædam statim ab invasione continuò vigilat, delirat per aliquot dies, nec quicquam vel Anthracum vel bubonum erumpit, illi sudorifera omnia in casum offerebantur, nec tuto ὑπνωτικά ferebat, tertio vel quarto primum die vetula, quæ ipsi ministrabat, in inguine bubonem fortè conspicit, quietior fit, ἀγρυπνία tamen illi valde molesta adhuc erat, iterum delirium increscit, paulo post carbo oboritur in brachio, mente aliquot dies non constat, dein paullatim adhibitis medicamentis alterantibus expellentibusque ad se redit, quam omnes non semel morti certæ addixerant. Medicamenta somnum conciliantia sistere vel figere spiritus, & quasi torpidos reddere stuporemque inducere in confesso est, ideoque iis abstinere debet medicus, ubi expellere animus est. Cum vero sudorem interdum soleant movere, præsertim opium, quod ἰδρωτικὸν est, cujusque ratione potius fieri, si quid singulariter præstet in peste Theriaca, existimat Zvelser. in Animadv. p. CCXXXII. quàm ratione insignis virtutis alexipharmacæ, etiam initio turgente materiâ quandoq; cum fructu administrantur, tunc scilicet ubi rectâ medendi methodo progredi non licet, ut in deliriis & vigiliis efferis, verùm paucâ quantitate & admixtis alexipharmacis, uti Ego non semel in peste hac sum expertus. Ita meminit cujusdā pomi somniferi Ioh. Ludovic. Gottfriedt in Histor. Antipodum p.m. CLI. cujus succi unica gutta sæpe triduanum somnum inducit, quo finito ad hypercatharsin ferè usq; purgat.

OBSERV. XXXVII.

XXIV. Jul.

Ancilla quædam leviter horruit cùm levi capitis dolore, carbunculi tres in crure oriuntur, hera anxia statim artis nostræ fidem implorat, consiliumque meum expetit, svadeo, ut post sudorem saphena incidatur, ex præscripto peracta res est: altero die pejus habet, sudat iterum ex voto, tunc plures in media corporis regione proveniunt carbunculi, confortatur medicamentis alteraturque, per aliquot dies malè admodum habet, evadit tandem. Eodem tempore & alia ancilla in prioris vicinia laborat acutè satis, carbunculos & bubones habet, mox eadem vena scinditur, succedit phrenitis, vigiliæ continuæ, ad plusculos dies lethaliter decumbit, & pro deplo-
rata habetur, restituitur.

D

OB-

MArita ejusdam civis triginta septimanas gravidâ primipara dolore capitis affigitur, artusque omnes tremunt, præscribitur à Suppositorii operatione sudoriferum, quod ex voto cedebat, postea cordialia Alexipharmaca porriguntur, dolorem sentit in inguine, apponitur Empl. magneticum Salæ, de bubone nihil vel tangitur vel videtur, vires enim imbecillæ protrudere ipsum non valebant, tertio manè factum excuscit vivum decem præterpropter hebdomadis præpoperum. Statim à fatus exclusione optimè habens latabunda & subridens me ad se visitantem porrectâ manu excipit, pulsus multum remiserat, ita ut omnes omnia in vado esse læti crediderimus, à meridie omnibus spectantibus nihilque tale opinantibus inopinatò æternum obdormiscit, absque ullo aliquo dato sui abcessûs signo. Heic *παρεχθήσειν* paululum libet, & inquirere, utrum ipsum venenum causans abortum penetraverit ad uterum ipsumque fatum? Et videtur omninò affirmandum, cum Agens & Patiens mutuò se tangere debeant, aut certâ saltem distantia affici mutuò. Sed per quas vias eò devenit? & per vasa umbilicalia, & per lacteos ramos à *Pecqueti Receptaculo*, vel, quod idem, à *Glandulis lacteis Bartholini*, vel *Sacco Chylifero oriundos*: præprimis verò per innumerabiles ramos lacteos ab *Excellentissimo Antonio Deussingio Gröningensi* per ligamenta uteri latos, ad ipsa cornua totumque uteri corpus decurrentes in catella feta primùm observatos. Dum verò receptum intra corpus venenum sentit uterus, insurgit ad id expellendum, fatus lacescit, imò nonnihil fortè veneni grandior jam factus simul cum alimento ore, vel per umbilicalia vasa accipiens adjuvat istum motum, atque ita symptomaticè expellitur. Neque hoc, Fætum scilicet in utero etiam ore ali, *ἐν τῷ ἀδυνάτῳ* est, uti patebit ex subsequentiū Autorum testimoniis, quæ in hujus aut illius gratiam adducere fortè me non pœnitebit operæ. Et pluribus hoc argumenti genus profecutus est *Cl. Bartholinus cap. X. de Lact. Thoracis*, & prolixa Epistolâ ad *Joh. Daniele Horstium Archiatrum Darmstadinum*. Imò notatum Harveio est, uterum propterea gravidationis tempore plurimis scatere vasis, quod per sola umbilicalia vasa haud nutriretur fætus, statuitque expressis verbis posse succum illum nutritiû per arterias uterinas delatum non minus commode in uterum destillare, atque serum per arterias emulgentes in renes delabatur Nec abludit ab hac sententia *Hippocr.*, cujus sententiam ab interpretibus hætenus neglectam scribit *Bartholinus*, is enim lib. de nat. Pueri dicit, *Lac in uterum confluere ad Embryonis nutritionem idque attrahi in utero per os Embryonis.* Et lib. de Carn. sive Prin-

Principiis compressis labris ex utero matris tum alimentum sugere, tum etiam spiritum, quia pueri cum in lucem prodeunt, stercus in intestinis habere conspiciuntur, & simulac in lucem editi sunt, tum homines, tum pecora, id iis per ventrem secedit. Atqui neque stercus haberet, nisi in utero sugeret, neque ut primum puer natus est, ubera sugere nosset, nisi in utero suxisset: Quanquam, an hæc genuina Hippocr. scripta sint, maximè dubitetur, imo planè negatur. Quo argumento etiam usi videntur Democritus & Epicurus, ut Plutarchus lib. V. de Placitis Phil. c. XVI. testatur, dum utero ubera quadam affinxerunt. Non tamen credam Democritum, qui sui seculi maximus fuit Philosophus, quemque Hippocr. in Epist. ad eundem *Ἀριστον φιλόσοφος καὶ λόγιος ἐρμηνεύτην*, & subtilissimus Seneca nat. quæst. l. VII. c. III. Subtilissimum antiquorum omnium nominant, vera ubera utero, famâ & quantitate nostris in pectore positis respondentia, affinxisse, sed potius per ubera intelligenda esse Acetabula, Cotyledones vel papillas, quæ sunt vasorum uterinorum oscula in uterum hiascentia. Modum suctionis in nuper natis omnium optimè exprimit Harveius Anglicanum illud sidus Exerc. XXIX. his verbis: *Non enim recens natus infans papillam labiis comprimens sugit, ut nos, sed quasi deglutire vellet, totam in fauces usq; attrahit, linguæque ac palati auxilio, tanquam manducando lac emulget.* Ulterius pro nutritione per os militat quoque, quod omnium primum os apertum conspiciatur cæteris meatibus clausis, uti non semel in Peste in abortibus notavi, & nuper in immaturo fætu excluso, cujus os satis amplè diduci poterat, exactè mihi observatum. imò narravit mihi obstetrix se apertum os vidisse in Embryone vix dimidium digitum longo. Et quod apertæ ad fætum dentur viæ docere nos potest *fætus is, ad quem expellendum mater Crocum quadrante dimidio ante partum assumpserat, quiq; totus crocreus in hanc vitam descendit*, uti exemplum huius rei narrat Henr. ab Heer in Spadacrene c. XIV. Non dissimile quid videre est in Heurni l. II. meth. ad Praxin cap. XIV. Hisce addendus vitulus nondum in lucem editus gramen digiti longitudine in ore habens à Carthesio visus. Non immeritò annumeraveris his Vagitum uterinum, licet portentosis istum fortè adjudices, qualem hîc Brunsvigæ non diu ante Pestem hanc, quam describo, se distinctè audisse in proprio utero narravit Sutoris cujusdam uxor, quæ etiam nû in vivis est, sed fætus iste in lucem debito tempore editus non diu fuit superstes. Bina huius Vagitus exempla habuit etiam Bartholinus haud diu ante bellum Dano-Suecicum, quanquam nec Ego cum illo hunc naturæ ostentis tribuam, sed naturalibus causis, ut Centuria I. Observ. I. multis probat. Infantis verò, cujus meminit Lud. Vives, in comment. ad Augustin. de Civ. Dei l. III. c. ult.

p.m.CCIV. Vocem in utero articulatam edentis clamantisq. IO. triumphe,
Cosf. Roman. Q. Fabio Max. & M. Metello, exemplum merito referas ad
prodigia. Sed diutius his immorari fortè sit hominis frustra studiosi, plu-
ra de hac materia legere qui amat, adeat Anatomicos. Καὶ μὲν ταῦτα
ἐν παρόδῳ.

OBSERV. XXXIX.

XXVI. Jul.

UT in muliebrem sexum maximè tyrannus fuit pestis, ita vix repere-
ris ejus vafritiem indolemque tam multifariam in viris ac in mulie-
ribus. Fæminis quandoque antevertit menses, naturæ tempus
non exspectando, aliis fluentes tardat. Virgo XVII. annorum do-
loribus capitis infestatur, menstrua secundum consuetum naturæ cursum
& legem currentia sistuntur, comatosæ instar jacet, nec vel acri supposito-
rio vel Clystere aut aliis ad discutiendum somnum excogitatis remediis
expergefit, facies fit cadaverosa, altero die vomit, tertio profundiore ad-
huc somno oppressa ad beatorum sedes delata est. Potius ex mensium
repentino regressu sive statione rubere, & quasi ex calore tumidæ debuif-
sent apparere genæ, ut multoties tum tempore notatum. Credo & men-
sibus repentè objectum repagulum, & vim veneni narcoticam comatosam
attulisse affectionem, calor verò natus à veneno suppressus sui præsen-
tiam in exterioribus membris non potuit præbere.

OBSERV. XL.

XXVI. Jul.

Non nemo pharmaceuticen edoctus peste corripitur absque mayo-
ris momenti symptomatibus, ideoque levem illam judicans sibi ipsi
medicinam faciebat, ignorans protheum pestem esse, scireque clan-
culum calorem nostrum atterere, exque insidiis cor nostrum, ar-
cem vitæ sanguinisque fontem & officinam invadere, & pulso exinde calo-
re simul animam exire jubere. Idem hic expertus est, falsus enim sympto-
matum lenitate ita viribus exhaustus fuit, ut præ totius imbecillitate nec
bubonem in inguine dextro latentem protrudere potis fuerit, nec fugere
lethalia mortis spicula, altero enim à quo ipsum invisi die, fatis ceslit.

OBSERV. XLI.

XXVII. Jul.

FErè iisdem, levi scil. capitis dolore, horrore & extremorum lasitudi-
ne, corripitur accidentibus, quæ tamen vires non ita conterebant,
Aurifaber. Percussa uxor veneni latere aliquid haut frustra suspi-
cans citò ad me accurrit, sibi opem ut feram, summopere petens.

Post

Post operationem ordinati suppositorii præscriptum sudoriferum sumit, à quo sudat per integrum diem & ultra, absque jactura virium. Circa vespèram iterum ipsum invisitò, adhuc sudore tantum non diffluit, dico, non decere ita strenuè sudare, ne simul cum sudore & animam profunderet. Patiens bono animo me esse jubebat, sibi nihil virium inde decedere, nolleque se naturam à laudabili opere avocare, saltem sitim multum negotii sibi facessere, ad quam restinguendam petebat remedium. Do Julapium, cui semper de sudorifero aliquo nonnihil erat immixtum, cum Spir. Vitriol. aut mixt. s. And. Altero die cutis adhuc madebat, sanumque se esse prædicabat. Sudor hunc sanabat, & inculpara corporis constitutio, quâ etiamnum bene vivit.

OBSERV. XLII.

XXVII.

Jul.

Secretarius urbis nostræ eximius, & emeritus ferè, profundiore obruitur somno, à quo non poterat excitari, vel acri clystere, vel capillorum vellicatione, vel alio quovis ingenio, non stertebat, nec Apoplexia erat, nonnunquam enim ad tactum clamoremve sonum, haut intelligibilem tamen, dabat. cætera Apoplectico simillimus, excrementis alvi lectum commaculabat, nec oculos aperiebat, nisi ad vehementem acclamationem, in tertium diem ita jacebat, tandem nullo mortis dato signo in senio jam constitutus naturæ debitum persolvit. Notes hîc obiter, quod *August. lib. XII. de Civit. Dei cap. XV.* videatur phrasin hanc sive hujusmodi loquendi morem impugnare; statuit enim ipsam nobis corporis mortem non lege naturæ, quâ nullam homini mortem Deus fecit, sed merito inflictam esse peccati, argumenti rationem putat esse hanc, quod homo, si non peccasset, non fuisset moriturus. Huic sententiæ consentit *B. Thom. Aquinas*, & cum eo plurimi alii, aliis aliter sentientibus. *Lud. Vives in Comment. ad cap. I. hujus libri* sententiam suam suspendit, dum inquit; *Equidem quid factum sit, magno nostro malo nemo ignorat: quid fuisset, nescio an vel ipsi Adam ostensum fuit, quanto minus nobis misellis.*

OBSERV. XLIII.

XXVII.

Jul.

Vidua quinquagenariâ major multos experitur ructus, abdominisque distensionem cum aliquali corporis lassitudine, oscitatione frequenti & debilitate, non credens à pestilenti contagio se tactam uterinos saltem flatus, quibus aliàs obnoxia erat, incusabat, quam opinionem animo suo tenaciter inhærentem vix sibi eripi patiebatur, hinc

aversabatur pestilentialia medicamenta, & saltem, quæ uteri flatulentiam corrigerent, sibi præscribi petebat, ipsa quoque domestica in hunc usum docta adhibebat remedia. Altero, aut, nime fallit calculus, tertio demum die pustulam in sura accipit purpuream, dico pestilentem carbunculum esse, credit, ἀγρυπνία. succedit & appetitiæ prostratio, tuncque verè ægrota- re se primum animadvertens admittebat sudorifica Alexipharmaca, ve- rùm ulterius nihil è corpore præter carbonem istum exhibat, ideoq; accer- sito chirurgus internis quoque & externis debitè administratis curatur integrè, sed cum magno labore & periculo vitæ, ultra XIV. dies lecto affixa tene- batur.

XXVII.
Jul.

OBSERV. XLIV.

Quidam Cerevisiarum coctor, homo pauper & egenus, ἄνθρωπος ἀβίος Luciano, Herodoto verò in *Vita Homeri* ἀπόρος dictus, quā primum sensit sibi malè esse, cum aceto sumit pulverem pyriū, quantum ad explosionem mediocris bombardæ sufficit, (hunc pulverem plurimi non sine fructu usurparunt) sudat egregiè, absterfo sudore percipit in inguine & sub axilla bubonem, porrecto pulvere cordiali dataque, cum admo- dum sitiret, refrigerante potione brevi pristinam recuperavit vitæ incolumitatem. Apposita emplastra abscessus maturare inque pus vertere mi- nimè potuerunt, sed sensim per ἀδύλον διαπνοήν evanuerunt isti,

XXVIII.
Julii.

OBSERV. XLV.

Arithmeticus, nec rei architectonicæ imperitus, in urbis aggere operariis prospiciens aurā blanda tepente nesciens quam mephy- tim advehente perflatur, statim domum properat meumque curat implorari auxilium. Invenio ipsum primo morbi accursu extre- mè languidum, sudore symptomatiko è partib. superioribus erumpente viribusque continuò dilabentibus. Bubo jam erupturus propter suc- cumbentem oneri naturam impossibile nobis erat protrahere, vixque in tertium diem emigraturam animam morari poteramus.

XXX. Jul.

OBSERV. XLVI.

Juvenis XXVI. annorum εὐσαρκός & εὐεχτικός, &, si ex externis iudices lineamentis, optimā sanitate præditus (latet tamen sæpius sub tali pingui culo corporis habitu viscerum κακοπραγία &

& labes) horrore corripitur & levi capitis dolore insequente plurimo & continuo vomitu eorum omnium, quæ assiduebat, inquietudo, ἀγρυπνία, altero, aut ni fallor, ipso invasionis die urina nigricans excernebatur, quam mater ipsi adstans in vitro urinario eminus monstrabat, cominus enim tempore pestis urinam inspicere periculo non caret, & tales urinae tum viris, tum mulieribus pessimæ sunt, lib. II. Progn. §. XXIX. Huic omnia medicamenta tum externa tum interna in casum adhibebantur, tanta enim & tam cita erat humorum corruptio, ut omnem etiam optimè excogitatorum remediorum vim eluderet, atque succedente fluxu colliquativo tertio die corporis sui sarcinâ depositâ etiam hujus vitæ usuram deposuerit. Mirum, si hujus viscera tam bene constituta fuissent, prout externus præ se ferebat habitus, unde tam subita humorum ista corruptio & fluxus colliquativus, pessimusque urinae color nativi ignis extinctionem indicans, certè impurum corpus erat & κακοχυμικόν. Verùm dices: si viscera malè vel in substantia vel in intemperie, cum, vel sine materia, affecta fuissent, unde pinguiculus corporis habitus, εὐσπαρσία floridusque color, quæ omnia à puriore sunt sanguine, talis enim in externis solet apparere color, quales intus humores sunt. Constat ex hæcenus rei medicæ Scriptoribus triplicem sive tres solemnes in corporibus nostris celebrari coctiones: prima fit in ventriculo, cui in ore præparatur cibus: altera in Epate, tertia in partibus extremis, venis, arteriis habituque corporis. Hinc celebre illud axioma medicum: Erratum primæ coctionis non corrigi in secunda, nec hujus in tertia, hoc axioma notum est etiam non medicis, creditumque hæcenus firmiter. Verùm cum hodie longè alia sit facies rei medicæ, præsertim Anatomicæ, seu potius Physiologicæ, quæ eò sedulâ, accuratâ, & frequenti dissectione corporum processit, ut vix amplior ad ipsam accessus sperandus, liquet sanè dogma illud non usque quaque verum, cùm nec omnis, nec semper, imò minima Chyli portio ad Epate meet, ut dilucidè apparet ex Anatomia, præsertim ab iis instituta, qui ex accurata & toties repetita sectione hodie clarent. Corruit igitur omnis illa hypothesis, & omne illud, quod super ipsa struitur, nimirum hærente vitio in visceribus naturalibus, impossibile esse bonum & laudabilem corporis habitum ex suppeditato vitioso ratione originis, sive in ventriculo sive Epate, contractæ alimento pronasce: Et bene constitutis visceribus non posse non semper adesse εὐσπαρσίαν corpusque εὐχρόον.

Nonnunquam & sæpissimè ita licet argumentari, at non semper, & concedamus ita diversimode coqui & præparari in corporis alimoniam assum-

assumptum alimentum, non tamen vel sequitur hinc omnes subcutaneas affectiones, ut scabiem, ulcera, &c. semper (licet interdum & sæpe hoc fiat) à prava viscerum διαθήσει aut vasorum obstructionibus oriri, tollique non posse his non prospectis, uti multi practicum magnum errant errorem, sæpèque in ejusmodi malis corrigendis hallucinantur, dum scabiosos suos multis vexant modis, purgando toties scilicet, obstructiones solvendo, temperiem viscerum corrigendo, sudando & quicquid non moliendo in innocuis visceribus corrigendis, cum potius omnis ad cutem vertenda sit opera, etiam vel ex ipsorum mente. Si enim coctio quædam fit in cute subtusque eam, ut revera fit, & omnis coctio perficiatur beneficio ignis nativi, partisque, in qua fit, bona constitutione & temperatura, sequitur omnino, si cutis & subjecti muscoli laborent intemperie quadam, calor cutis sit justo debilior, aut excedat naturalem constitutionem, anastomoses arteriarum venarumque capillarium obstruantur, cutisque facultas alteratrix depravetur, adeo ut, qui bonus sanguis in partem influit, is statim in eum humorem convertatur, quo pars est vitiata, secundum Heurn. in Comment. Aphor. Hipp. sect. III. Aph. XX. quod tunc sanguis subcutaneus ventilatione prohibita reddatur impurus, quodque cutis alimentum proprium in naturam suam non possit convertere, si hoc fiat per nudam sanguinis alterationem, si per excrementorum sequestrationem. Hinc malam fieri in cute coctionem, vitiosam partium ipsarum extimarum nutritionem, excrementa in & sub cute collecta non debite expurgari, ferescere, & corrumpi, quæ retenta non possunt non variis modis cutem deturpare omnisque generis in ea affectus procreare salvis penitus visceribus naturalibus & sanguine eò appulso laudabili. Interim omnino fatendum cum Hoffmanno Comment. in Gal. de Us. part. XIV. VII. no M. IV. quod Cutis luat peccata viscerum omnis generis excrementa (quandiu pollent facultate expultrice) ad illum deponentium. Quæ sit, quæso, quod oves sæpe præpingues sint & ἐνσώφραι, quarum tamen Epar siccum visitur, hydatibus & calculis refertum? Et quæ sit, quod multis detrahatur sanguis laudabilis colorque corporis bonus sit, quibus tamen viscera fere sunt putria? Contra illa laudabilis & sanguis & corporis color est, quibus viscera sanissima? Eleganter in hanc rem commentatus est Thevart. in

Annot. suis ad Ballon. Epid.
& Ephem.

OBSERV. XLVII.

I. Aug.

Operarius quidam laborat peste, bubonem habet, aliquot dies decumbit, melius postea habet, surgit, obambulat, ex improvise phrenitide corripitur, vigiliis diuturnis, parietes perfodit, & ne violenter homines invadat, vimque ipsis inferat, à quibusdam militibus custoditur. Tunc primum meum petitur consilium, præscribo internè & externè soporifera, placidior fit, altero die moritur. Non vidi hominem, forsan non discussum satis venenum fuit, & versum ad caput phrenitidem excitavit lethalem.

OBSERV. XLIIIX.

II. Aug.

Fæmina gravida. quæ VII. Julii periculose decumbebat, abortumque patiebatur, post absolutam curationem retinuit bubonem in inguine in hunc usque diem. Dum fortè ædes ipsius prætereo, vocor, monstrabat mihi bubonem sponte maturatum profundentemque magnam affatim puris copiam, præscriptis, quæ apertum servarent abstergerentque illum, brevi integrè convaluit, etiamnum optimè vivens. Dissipatis partibus tenuioribus, sive per sudorifera sive per topica discutientia, multis longo tempore ejusmodi tumores remanserunt absque omni malignitate, quæ postmodum de novo coctionem sive naturâ sive arte facile admiserunt.

OBSERV. XLIX.

II. Aug.

Vir sanguineus, in ipsa ætatis ἀκμή constitutus, corripitur doloribus capitis, lassitudine & torpore quasi omnium membrorum, adhuc obambulat, nec lecto fixus tenetur, in tertium usque diem, in inguine bubo conspicitur, ab alio curatur, post tertium diem secatur vena increfcit morbus, ita ut lecto se committere necessum habuerit, tunc & Ego in consilium adhibeor, culpant venæ sectionem, quæ in has angustias ipsum coniecisset, sequentibus diebus anthraces erumpunt in diversis partibus, etiam ipso pene, tres hebdomadas periculose laborat, mens semper constabat, elapso illo spatio ambiguum hoc tandem feliciter enavigat æquor, quo submersa miserè jam viderat

sui pignora chara thori,

unico saltim filio charybdim hanc ad tempus evitato, qui cum in aliud domicilium, à peste adhuc purum, ne & hæc unici gaudii scintilla extingue-

E

guc.

gueretur, ire consultum videretur, ibi in ipsam scyllam postea incidit, uti patebit observatione CXIIX.

OBSERV. L.

III. Aug.

Quinque plus minus annorum puella multum dormit, in Vertice carbunculus erumpit multam saniem profundens, nunquam laudabile pus conspicitur. Pone aurem sinistram rubra oritur macula oblonga parum elevata, Parotis erat. (Parotides admodum paucae fuerunt & rarae.) Protrusa paululum parotide discutitur somnus, levius videtur aegrotare, inopinatò tamen leges subit fatales. Quod Parotis glandularum retrò aures inflammatio sit, notius est, quàm ut multis id inculcare sit necessum. Hippocr. VI. Epid. Comment. V. t. I. vocat ἐπάρματα. Celsus, latinus ille Hippocrates, dicit eam Abscessus esse genus l. VI. c. XVI. Holler. de compos. medicamentor. sec. loc. p. m. LXXI. statuit esse Abscessus glandularum, sed auribus saepe numero pestilentes. Pareus l. V. c. X. sua Chirurgia dicit, Parotides esse à natura eo loco conditas, ut materiam virulentam & malignam cerebri robore depulsam excipiant, venis & nervis eò loci diffusis: & lib. VII. c. III. cerebri Emunctoria nominat. Quod in capitis dolore cum sopore nonnunquam parotis protrudatur dudù nos docuit Hippocr. I. Prorrh. sine: Ἐν κεφαλᾷ γῆν κῶμα καὶ κώφωσις παρ' οὗς τι ἐξερύγεται, in capitis dolore sopor & surditas secundum aurem quideructat. Praesagia Parotidum multa habet Hippocr. variis in locis, in Prorrh. Coac. Progn. libris Epidemior. In Prorrh. ita loquitur: Tumores circa aures maxime ex acutis in febribus ardentibus fiunt, si morbum non solvant neque maturent, aut ex naribus sanguis fluat, vel urine deponant sedimentum crassum, moriuntur. In Coac. Quibus tumores circa aures facti non suppurantur in ardente febre, hi non valde servantur. Plura de Parotidibus qui avet legere adeat M. Aur. Severinum incomparabilem Medico-Chirurgum Neapolitanum in verè aureo suo libro de recondita Abscess. natura, & de Effic. medicina.

OBSERV. LI.

III. Aug.

Postridie eodem affectu afficitur ipsius puellae Mater, tibia carbunculo notatur, & inguen alterum bubone. Primo die ad medicamenta bene habet, ut spes esset reconvalescentiae. Postridie labuntur vires, λεπθυμίαι succedunt, stragula non poterat ferre, delira loquitur, vomit, carbunculus ad nigredinem vergit, moritur.

OB-

OBSERV. LII.

IV. Aug.

Altero morbi uxoris die incipit etiam malè habere & maritus, de-
que brachii dolorosa & difficili motione multum conqueritur, ni-
hil tamen tactu deprehenditur vel visu. Subesse bubonem brevi
sui præsentiam manifestaturum non poterat sibi imaginari. Alte-
ro die bubo apparet multum negotii facessens in brachio, nec enim ma-
turationem nec discussionem admittebat, hinc multus dolor ad brachii
motum, continuo lecto non inhærebat, nec volebat, etiam jussus, ut re-
ctius medicamentis uti potuisset, verum ob animi partim ex repentino
uxoris filiaque obitu, domesticorumque adhuc decumbentium calami-
tate mærorem, partim ob dolores acerbos certo se loco continere non
poterat, brachium erat inflammatum, & si pestis non sæviisset, verum ery-
sipelas esse judicasset. Sensim tandem evanuit bubo, pristinaque resti-
tutus est incolumitati.

OBSERV. LIII.

V. Aug.

Puella XIV. annorū, ἐρώτων adhuc ἀμύητος, quam *Hesiod.* ἐρ-
γων β. describit, ὅυπ᾽ ἔργ' εἰδυῖα πολυχευσὺς Ἀφροδίτης,
lethargo obruitur, vix poterat excitari, saltem ut unam alteramve
præscripti medicamenti portionem sumeret, momento relabebatur in
somnum profundissimum, lectum commaculabat, bubonem in inguine
gerebat, omnis medela frustra adhibebatur & cura, nulloque ingenio so-
mnus dispelli poterat, ideoque Deo & naturæ committebatur. Adjace-
bat ipsi ancilla, quæ non ita periculosè decumbere visa est, illa priori or-
dinata medicamenta libenter sumebat, verum brevi mortem oppetiit,
quam ipsa puella præstò stantem operientemque clausis oculis neglexit,
ipsiusque spicula Dei beneficio elusit quidem hæc vice, verum integram
non recepit sanitatem, sed languida & in statu neutro annum vixit, postea
pectoralis morbo oppressa ex hac maiorum Iliade erepta est.

OBSERV. LIV.

V. Aug.

Juvenis robustus pistor malè habet, primum domestica experitur re-
media, altero die vocor in auxilium, præ calore anhelantem offendo
ipsum cum insigni faciei rubore somniique vacuitate, secatur vena, al-
vus obstructa est, suppositorium, Clysteris usu propter continuum &
inordinatum motum prohibito, applicatur, nihilo melius habet, sed hinc
inde in lecto se versat, calor increfcebat, corpus ad genua procidebat.

cubitus figura erat, quam semper in malis ducit *Hippocr.* Hic robori suo
fusus initio monitis se non accommodabat; Et mirum, quod largiter per
sectam venam effuso sanguine nec calor, nec color remiserint, forte te-
nuior sanguis accensus per phlogosin quandam exteriora petiit continui-
tatem fovente καύματι in alta putredine latente, quam tum nec eva-
cuare, nec quovis modo removeere poteramus.

OBSERV. LV.

VI. Aug.

Primarii cujusdam civis, cujus Obs. XLIX. memini, servus, quan-
do sensit se tactum contagio, citissimo pede & indefinente cursu ex-
urbe se proripit, & ad proximum pagum civicae ditionis ab urbe no-
stra octo stadiis, sive passibus, aut ad minimum uno lapide distantem
tendit, à cujus incolis, ex delirante inconstantiq; sermone, ipsum pe-
ste laborare, suspicantibus, cum repelleretur, haud segnius tardiusve re-
greditur vel potius recurrit, quàm eò iverat. Appropinquantem portæ
milites nostri præsidarii ingressu prohibent dicentes, se, exiisse ipsum,
ignorare; verùm instanter ingressum sollicitans intromittitur, & curren-
do lassus morboq; lecto se committit. Mox plurimi Carbunculi erum-
punt in brachiis, femoribus, dorso & aliis particulis, majorem tamen par-
tem dextri lateris, ut plures non viderim in uno subjecto toto hoc tempo-
re, appetitus ferè integer persistebat. Hic ægrotus aliquoties horrorem
mihi incusfit non levem. cum enim indies herum ipsius, dominam & libe-
ros inviserem ægrotantes, sæpe inopinatò ipsum in domus area nudè se-
dentem levi lineo panno ab altero saltem latere tectum offendi, altero
latere planè nudus erat, ibidemq; ulcera sordida & profunda ex carbun-
culis nata mundabat obligabatq; Chirurgus, quo posito, & qua corpo-
ris figura spectrum præsentabat ipsumq; Lazarum fædis ulceribus sca-
tentem. Satagens cursu isto abigere conceptum virus excusfit id omne
in exteriores partes, quod inde facile colligere est, quod edendi deside-
rium vix imminutum fuit, nec de alio aliquo symptomate conquestus est
sanusq; brevi evasit. Illud tamen currendi studium & conatus, aliis nil
profuit, sed attulit exitium potius, ut patebit in sequentibus.

OBSERV. LVI.

VII. Aug.

Vir Juvenis uxoratus optimæ constitutionis & robustæ corripitur
carbunculo ad mammam sinistram magno, ægrè maturatur & vix
longo tempore mortificata caro abscedit, dolor multus aderat, &
virum defectus, evadit tandem. Contra ipsius uxor duos menses
gra-

grávida non ita viribus dejiciebatur, cum tamen tres carbunculos in abdomine & quartum ad mammam dextram habuerit, qui aperti postea sponte sanati sunt, quatuor bubones in inguine & sub axillis latebant, qui naturæ ope discussi omnes sunt, nec incommodum ullum uterus inde sensit, cum tamen ex *Galení similí lib. IV. Aph. Hippocr. I.* nondum firmatus Embryo levi occasione ejiciatur.

OBSERV. LVII.

CIvis, cujus conjux & aliquot liberi peste extincti erant, cum in alterum diem jam decubisset, me curat accersiri, cum ingredior ædes hujus, eas satis spatiosas ventisque perflabiles invenio, unde mihi multum gratulor. Verum dum ægrotantem mihi ostendi postulo, ducor ab ejus agnata (quæ & ipsa peste laboraverat, carbunculumque adhuc in crure, unde claudicabat, sordidis linteis obligatum habebat, quæq; calce suâ nares meas, dum scalas ascendendo præibat, ferè feriebat) in cubile tenebrosum, in quo vix erectus, cum tamen procera staturæ non sim, stare poteram: offendo illum valde anhelantem & anxiosum, quærebatur multum sibi dolere inguen alterum, non potui inspicere locum affectum ob denegatam luminis externi usuram. Fortè retrospecti-
VII. Ang.
ens duos alios in opaco illo & incongruo cubili decumbentes video, de quibus nullum, cum vocabar, fiebat verbum, maturo abitum, cumque altero die ipsum inviso descendit in aream suspicans, quod res erat, me aversari ipsius lectum, contrecto inguen dolens, bubonemque parvum admodum altèque latentem observo, apponitur emplastrum attractivum, nil proficitur, vires sensibilibiter decrescunt, propter cordis anxietatem sudor nullus poterat evocari, circa vesperam moritur, atque ita universa domus inhabitatoribus suis privatur, & ad unum omnes Charontis cymbæ inferuntur. Cum quærerem cur non in alio magis luminoso tabulato ipsi lectum stravissent, respondent hoc ideo factum, ne tota domus, & præcipuè inferior ejus pars veneno inficeretur, existimantes venenum non deorsum sed potius sursum tendere. Quod utique verum est, si sibi relinquitur venenum, quia tenue & leve est, facileque ad aëris motum sursum fertur: verum cum admiscetur corpori cuidam, nil obstat, quin deorsum vergat.

OBSERV. LIIIX.

VII. Aug.

Quidam Organista corpori suo ægrè esse sentiens extra portam, nova quæ vocatur, exspatiatur, sive discussurus, quod clam, sive inscius, conceperat virus, vel animi mæstitiam aëris mutatione temperaturus. Ibi cubans ægrius habet, paulatimque altius se in-
finuando contagium vires ejus sensibilibiter incipit atterere, ita ut pedibus suis diffidens ab aliis domum reduci opus habuerit. Quod miserum spectaculum cum videt fortè quidam Senior ex Coss. nostris, *ἄνθρωπος ἐν ἀγίοις*, ita terrore percellitur miserabili noti sibi viri incessu, misericordiâque tanta afficitur, ut continuò tremere membra ejus, linguâ tremula loqueretur, & præ lacrymis vix verbum proferre quiret, omnes hunc eadem labe etiam inquinatum putabant. Dum adsto huic medicamentaq; salutaria præscribo, citò vocor ad dictum Organistam, quò cum venio, offendo illius artus omnes tremulo motu agitari, linguâ balbutiente vix animi sensa efferri, carbunculum in pectore & bubonem sub axilla, neutro tamen salutare de sese signum præbente, vigilæ aderant, & vires sensibilibiter collabebantur, tertio die moritur. Inconsultò sanè hic & intemperativè otium suum in exspatiandi studium vertebat bonam partem veneno jam oppressus, nec novi quenquam, qui vel citissimo cursu, vel alio modo in liberiore aëre se exercendo conceptum virus dispulerit inhærentiaque pestis spicula ejecerit manente animâ, excepto unico illo, cujus Obs. LV. meminimus, qui tamen ægerrimè & quasi miraculo periculosum hoc syrtium æquor enavigavit feliciter.

OBSERV. LIX.

VII. Aug.

Filia octo aut novem annorum peste laborat, curatur sedulò, ita ut pestem superâsse non dubitaretur, languida tamen manet cum *ἀσπικία* & tussi indefatigabili, *ἀτρεφία* succedit insuperabilis cum multo sputo, febris lenta, ut veram phthisin dixisses, abstergentibus humectantibusque secundum *Hippoc. Aph. XVI. s. I.* intus & extus res agitur, nil proficitur, fluxu alvi tentatur, tertiâ aut quartâ hebdomada moritur.

Hujus interiora procul dubio ita corrupta veneno fuerunt & à naturali temperie dejecta, ut in integrum ea restituere extra artem putes.

OB-

OBSERV. LX.

VIII. Aug.

VIdua anus duri & compacti habitus, & cujus *de meliore luto finxerat* *præcordia Titan*, decumbit bubone sub axilla sinistra parvo, non multum angitur eo, saltem de dolore brachii conqueritur & aliquali cordis compressione, solis alterantibus venenumque pestiferum peculiariter respicientibus sanatur, cum ne gutta sudoris præ corii densitate posset elici. Contra Filius in prima juventute constitutus tam citò viribus exsolvitur, faciesque omnem nitorem amittit, ut nec tertium diem supervixerit. Ita idem diversimodè agit venenum pro corporis constitutione & suâ ipsius naturâ.

OBSERV. LXI.

IX. Aug.

JUvenis inculpatâ sanitate corporisque robore eximius, cum messis hoc tempore fruges demeterentur in horreaque deveherentur, de dorso siue vertebrarum ejus, nescio quâ dislocatione, ex nimis alta fasciculorum in sublime siue altiore contignationem porrectione orta, conquerens omnem ad dorso repositionem curam dirigit, & ni fallor, pedibus dorsum suum calcari, ut nonnullis in more positum scimus, permittit. Cum nec sic malum mitesceret, multò minus concepta labes infringere, actutum vocor, invenio ipsum in magna cordis anxietate, seque in lecto hinc inde indefinenter motitantem. Examinatis examinandis peste ipsum laborare pronuncio intrepidè, quo pronunciato omnes adstantes consternebantur, rati actum esse de ipsius salute, quod nimis diu protraxissent veram veri morbi medelam, se miserè falsos esse ipsius confessione. In corpore nihil vel Abscessuum vel macularum notabatur, suppressa erant omnia. Huic absque dubio venæsectio & sudatio initio maximè ex usu fuissent, ut natura oneris parte levata facilius reliquas noxas potuisset expellere, nunc autem eam secare nefas duxi, tum propter virium exolutionem subitam anxietudinemque, tum propter perpetuam inquietudinem & motum irrequietum, tertio die fatis cessit.

OBSERV. LXII.

IX. Aug.

NOn semel observavi, Pueros peste correptos simul Epilepsiâ tentari, quorum quosdam evasisse periculum, quosdam autem ipso insultu extinctos novi. Hoc discrimen notes, medice; Cum initio statim comitem nanciscitur concepta labes Epilepsiam, non tam

funestum signum est, ac quæ protracto morbo insurgit: hæc quantum Ego recordor, semper lethalis est, illa ut plurimum terminatur ad salutem. Num, qui primum statim invadit epilepticus insultus motu suo concussivo determinat conceptum virus disjicitque? Contra qui procedente tempore succedit interitum affert venenoso halitu sive vapore cerebrum feriente altiusque jam corpori insinuato, qui que ob longiorem in corpore moram viribus ægri fractis ægrè se hospitio suo ejici patitur. Puer I V. annorum non ita periculosè ægrotare putatur, carbunculum habet & bubonem, propinantur, quæ teneræ ætati præscribi poterant, suppositorium adhibetur, altero die epilepticus fit, tertio manè expirat.

OBSERV. LXIII.

X. Aug.

Rerum esculentarum, & quæ his subserviunt, mercator cum multo vitæ discrimine decumbit, somnus profundus per multos dies, carbunculi plurimi in corpore hinc inde sparsi, bubones, quasi ἀναιδης est, nihil loquitur, rerumque omnium immemor. Pro deplorato habitus est ab omnibus, verum longiore decubitu (per aliquot enim septimanas ægrotavit, & vix verbum protulit) tandem evasit intentatum periculum. Eodem tempore & ejus ancilla laborat graviter, tumultuatur dies noctesque, canit, vociferatur, delira & facit, & loquitur, bibit multum, moritur. Marito nondum planè restituto de ingenti capitis dolore & nausea conqueritur ejus uxor, parvum sub axilla tumorem nanciscitur, multum & continuò sudat, non arte, sed naturâ & vi morbi, & tantum non diffuit sudore, verum eo nihil juvatur, angustia cordis indies increfcit, tertio die ad exitum vitæ vocatur.

OBSERV. LXIV.

X. Aug.

Maritus Juvenis bubonem in inguine dextro habet, carbunculum in pectore, altero die & penis eodem notatur. Anthrax in cole ipsi nobisque multum facescit negotii, majorque ipsi inde dolor succrevit, in pectore, qui erat, sponte evanescebat, bubo vero tardè maturitatem adeptus est & sanationem. Hoc singulare erat, eruptis carbunculo & bubone in pectore non cessavit vehementer instare morbi vis & sævitia, conspecto verò in glande virili parvulo tuberculo, cuius eschara tanquam pyrotico inusta videbatur, illico urgentiora remifere symptomata, lectoque relicto reliquam curam obambulando peragi facile sustinebat. Ita tantillum vel humoris vel vaporis corrupti tam sæva potest

potest inducere symptomata, imo mortem ipsam. Ita sæpe parva pustula in labio integrè solvit intermittentem febrem, quæ alias remediis etiam artificosè exhibitis cedere recusat.

OBSERV. LXV.

XI. Aug.

Mulier, ex stoicorum familia, familiarem ipsi nimis auri sacram famem si excipis, oriunda, omnibus liberis peste extinctis unicum adhuc filium superstitem, juvenem robustum, domo suâ infectâ, ut servetur, jubet exire, fratrisque ædes veneno adhuc intactas petere. Dicto audiens filius, elapsis paucis diebus (sive quod attulerit venenum ex propriis ædibus, sive quod primum infectus fuerit, prius tamen probabilius) in istis puris ædibus somno opprimitur tam profundo, ut XIII. hujus primum excitatus sit. Est ejusmodi somnus funestus sæpe secundum Hippocr. s. II. Aph. I. Ἐν ᾧ νοσήματι ὕπνος πόνον ποιεῖ, θανάσιμον. Expergefactus de inguinis dolore queritur, ibique bubo conspicitur tangiturque, iterum obdormiscit, alvus planè obstipata est, propterea Clysterem injicere erat animus, verum cum id sentiret etiam somno occupatus, continuo corpus datâ operâolvebat, ideoque ab incæpto desistere cogebamur, multû agitabatur ventriculus singultu, quæ in talibus morbis malum pronunciat Hippocr. s. V. Aph. III. de aliis gravioribus symptomatibus planè liber. Sequenti die narium succedit hæmorrhagia tam larga, ut nullo ingenio potuerit vel sisti vel coerceri effrænis sanguis: à veneno enim intus quasi concluso ex insolenti somno, sanguis erat corruptus fibrisque suis, quibus quasi stamine robur & consistentiam suam habet, orbatus crescebat, & quâ data porta ruebat effundebaturque. Potuit & acrimoniam sanguis ex biliosa evaporatione, quâ ora venarum arteriarumque aperuit, acquisivisse. Facilitabat hunc fluxum etiam sanguinis abundantia, quæ pravitati juncta potissima hujus funestæ hæmorrhagiæ erat causa. Num hîc ναυσίωσις φλεβῶν Hippocr. dicta locum habet? Fortè huic venæ apertio, cum plenitudine ad vasa sanguis peccaret, initio multum profuisset, verum videtur ἀλόγως καὶ ἀμεθόδως hæc celebrari, corpus ubi alto somno sopitum jacet, ob sanguinem impetuosius fluentem secabatur tamen, ast nullo com-
modo, cum sanguine enim & ipsam effudit animam hæres aliâs magnarum opum unic-
cus futurus.

F

OB-

OBSERV. LXVI.

XI. Aug.

Somnus & Vigilia utraque modum excedentia malum portendunt, inquit Hippocr. s. II. Aph. III. qui Aphorismus toties hoc tempore veritatem nobis exhibuit. Juvenis viginti præter propter annorum prioris cognatus itidem longo somno detinetur, sed non gravi, (Gal. hic distinguit inter somnum gravem & longum, ille, qui difficilem habet expergefactionem, hic, qui solum tempore excedit modum naturæ convenientem, & nondum habet difficilem expergefactionem. Ut prior, nonnunquam aperit oculorum valvulas adque interrogata respondet, jactatur valde, delira loquitur, in inguine bubo est, statim initio vena tunditur, nil proficimus, mens non redit integrè, nec bubo ad maturitatem tendit. Cur huic nares non stillant sanguine sicuti suo cognato? Num tanta non fuit humorum & sanguinis corruptio? Num venæsectio temporius adhibita sanguinem stitit? nihil tamen remisere symptomata sectâ venâ, delirium somnus non sedavit, & id malum ex Hippocr. sententia sect. II. Aph. XII. XV. hujus moritur magno parentibus suis post se relicto desiderio.

OBSERV. LXVII.

XI. Aug.

Ad mulierem constantis ætatis vocor tertio vel quarto ab invasione die, invenio ipsam anhelantem, facies rubebat, mens minimè vacillabat, de summo calore & cordis anxietate conquerebatur, erecta adhuc in lecto sedebat, nec ullum aliud grave accidens passa erat, ipsa eadem nocte moritur. Ita sui cuique mores fingunt fortunam, medicamentorumque vel neglectu, vel tardiore usurpatione multi admiserunt in præcordia hostem, quem postea ejiciendi potestas vel nulla vel certè ambigua fuit. Huic venæsectio sine dubio maximè profuisset, quanquam enim primariò non indicetur sanguinis missio, ubi tamen plethora est, & sanguinis abundantia, impetuosiusque sursum rapitur, sæpe cum fructu in principio eam adhibitam observatum: Verùm prudenti εὐτοχία hic opus est, aliàs præstat ἀπέχθειν.

OBSERV. LXIIX.

XI. Aug.

Puella quatuordecim annos nata leviter tangitur hoc malo, manus pedesque instar veræ scabiei parum humidæ infestantur. Generosiora medicamenta, cum omnia pacata essent, nolui præscribere, ne irritarem crabrones, temperatiora sudorifera laudabilem effectum for-

fortiebantur, & alterantia frigidiora, quia multum sitiebat, non sine fructu assumebat. Tertio die veros carbunculos in pectore accipit & brachiis nulla graviora secum adferentes accidentia, quàm inextinguibilem sitim, aliud nil patitur, quod memorare multum attineret, post XIV. dies primum convalescit.

OBSERV. LXIX.

CHirurgi cujusdam famulus robustus notatur bubone in inguine magno, dormit aliquot dies, plurimus calor adest, quod mirum, citius enim vigilias inducit, mittitur sanguis, à longo somno delirat, maturatur abscessus, rumpiturque, post quartam septimanam ad consolidationem pervenit, ægerque liberatur. *XI. Aug.* In eisdem ædibus eodem tempore tres liberi masculi laborant, omnes corpora sua plurimis livescentibus maculis instar petechiarum funestarum defædata habebant, major natu etiam carbunculum in fronte gerebat, ante mortem mutato livore maculæ rubræ evasere pulicum moribus haud absimiles. Contrarium tamen fieri oportuisset, siquidem lividus color caloris naturalis ferè victi indicium, rubor vero vincentis est. An evanido colore livido rubræ maculæ de novo per fermentationem denuò excitatam productæ sunt? credo.

OBSERV. LXX.

Matronæ constantem ætatem egressæ Filia natu major carbonem accipit in dextro brachio, quo admodum torquetur doloremque urentem sentit in parte obfessa, multæ adsunt profundæ putredinis notæ, æstuat, supprimitur alvus, quæ tamen supposito in dito facile solvebatur, ægræ mentis argumenta nulla, maximum, & quod brachii dolorem obscurabat, erat cordis anxietas & compressio, exprimebat quidem coangustatum Cor largè sudorem ex partibus superioribus, sed is, ut sudor particularis, pro malo semper habetur, in morbis præsertim malignis & contagiosis. Moritur. *XII. Aug.*

OBSERV. LXXI.

PUella VI. vel VII. annorum supra humerum dextrum, ubi clavícula est, parvum tumorem rubentem & ad tactum dolentem habebat, non admodum acutè ægrotabat, convulsivis motibus agitabatur, ad pauculos dies superstes est. Uno autem atque altero ante obitum *XII. Aug.*

die relicto humero juxta aurem se contrahens tumor veram parotidem
 οἰδῆμα παρὰ τὸ ὠτα Hippoc. vocatam efficiebat. Ambigas hic, utrum
 bubo fuerit hic tumor & ἀπόπληξις, an vero carbo: escharam, quæ ab
 adusto humore est, non habebat, quæ tamen distinguuntur ab aliis pe-
 stilentibus tumoribus carbunculi, nec bubo videbatur esse, quia isti in lo-
 cis adenosus erumpunt & emunctoriis, neutrum in humero reperire est.
 Verum quidem est, ut plurimum imò ferè semper istis in locis bubones
 conspici, quandoque tamen & aliis partibus erumpere non semel pesti-
 lenti hoc tempore observavi, uti postea monstrabitur.

XII. Aug.

OBSERV. LXXII.

Vir sexagenario major obesus corripitur eodem hoc malo, statim
 ἀφρονος fit & ἀκίνητος, trunci instar jacet & fulmine tacti, non
 stertebat, sudabat, sed non criticè, exprimebatur sudor ex oppres-
 sione spirituum vitalium denegatoque liberiore aëris inspiratu &
 expiratu. Ita Apoplectici sæpe sudant propter altam respirationem
 commeatuque sanguinis spirituumque in arteriis carotidibus obstru-
 cto. Hic hujus Cui causa fuit narcotica veneni vis spiritus animales
 torpidos & ad actiones sensuum ac motuum ineptos reddens: Quid si
 huic in ætatis declinatione secta fuisset vena? ut in senibus apoplecticis
 non sine ratione facitamus: ἐς τὰ γὰρ ἑσχατά νοσήματα αἱ ἑσχαταί γε-
 γρηται ἐς ἀεθεῖν κέκμηται. Hippocr. s. I. Aph. VI. Præcipitâs
 ægrum in præsentissimum periculum, quod etiam ex neglecta venæse-
 ctione non effugit, insequente enim nocte nil nobis proficientibus diro
 morbo succumbere coactus est. Vires huic Seni non constabant, nec ad
 dispellendum superandumque venenum sufficiebant, nihilque fecisset me-
 dicus aliud, nisi, ut, nobile aliàs remedium, apud vulgus diffamâsset, licet,
 qui ex artis præscripto & methodo curat, hoc non debeat curare, sed op-
 ponere potius illud Capi vacci, (si recte memini) qui, cum venam ægro-
 to secari jussisset, & adstantes dicerent, domine Doctor, æger morietur, re-
 spondit, moriatur ergo secundum artem.

XII. Aug.

OBSERV. LXXIII.

Juveni robusto viginti trium annorum erupit cum horrore sub axilla
 sinistra bubo, satis protuberat, mox & ad colli dextram partem similis
 tumor parum dolens exsurgit, qui subjectas partes, musculos, tendi-
 nes & adjacentia vasa tam arcte radicibus suis complectitur, ut ad latus
 ca-

caput movere aut inclinare ipsi fuerit ἀδύνατον : constans tamen juvenis & intrepido animo mæstos solabatur parentes morbumque fortiter tolerabat, paucis medicamentis laqueum fauces sibi præclusurum disci- dit, collumque constrictum ex eo extraxit. Contra ipsius forori ex par- vo carbunculo in pectore enato maximum vitæ periculum oboriebatur, lethaliter decumbit ad aliquot dies, multo tamen tandem labore evadit.

OBSERV. LXXIV.

Civis cujusdam domus contagio inficitur, ex domesticisque non ne- mo tumulo infertur, quo perculsus maritus uxorem juvenculam, quam nuper duxerat, à se dimittit, ad paternasque ædes ut se reci- piat ad tempus, quò effugeret latè cæteroquin se diffundens conta- gium, ex utriusque consensu consultum visum est. Illa paululum subsi- stens apud parentes incipit ægrotare ex peste, vel in propriis, quibus a- bierat, ædibus, vel in paterno domicilio concepta, bubonemque in in- guine sentit. Maritus, ad cuius aures cùm pervenisset de ægrotante uxore rumor, ita visitatum eam quæsitumque quomodo valeat : Socer pro- priorem ad ægram ipsi denegat accessum, quem & ipse tum præsens disua- deo. Ille ad uxorem haud admissus hinc inde habito sermone mæstu- domum se confert, ac postridie eodem corripitur serpente malo : Sta- tim vocor à Socero ipsi continuò adstante, valde æstuantem secatur vena brachii, suppositorium intruditur, sudat, clyster injicitur, nihilo melius habet, nec bubo nec anthrax in corpore erat tertio die moritur. Uxor harum rerum omnisque domesticæ ignara miseriæ, non rescivit maritum vel decumbere, vel periclitari, multò minus ipsum sibi longum valedixisse. Postea verò, cum extra periculum esse videretur, mariti obitus ipsi patefactus est, laboravitque & ista inguinali bubone ad aliquot septima- nas, antequam solidaretur. Ita divulsi sunt altero alterius fortis nescio, quos non ita pridem solemni actu conjunctos conspexeramus.

XIII. Aug.

OBSERV. LXXV.

Honestæ matrona duabus à sumpto prandio horis vomitu tentatur citra manifestam causam, inde magno terrore territa insueto isto motu, quod sciebat plerosque, qui peste corriperentur, vomere, omnes suas ancillas mittit in plateas me quæsitum, atque ut con- festim ad se veniam sollicitatum. Illæ in tam ampla civitate me non of- fendunt, sed cùm fortè transeo ædes cujusdam civis adhuc viventis in ve-

XIV. Aug.

teri pago sive vico (ut vocamus) ante fores sedentis, is nunciat me anxie
quaesitum ab hujus illiusve ancillis, efflagitasseque illas multum, ut illi-
co ad domum suam inviserem, heram enim suam agrotare. Statim pe-
dem a proposito curriculo retrahens decumbentem ipsam invenio & vo-
mentem, deportatur in aliud conclave a mariti lectisternio sejunctum,
prescribuntur quae ex usu fore judicabantur, etiam optime sudat, altero
die melius habet, dicit tamen se palpare in inguine bubonem, contrecto
locum, nil tango, discussio terrore sedatoque vomitu & falso concepta
imaginatione nihil sinistri aut pestilentis quid passa est. Ille vomitus
non a peste, sed quod utero conceperat, proveniebat, illa autem, se ute-
ro gerere, ignorabat, sequente hyeme pulchram enixa est puellam,

XIV. Aug.

OBSERV. LXXVI.

HEræ cujusdam primariæ pedissequa incipit agrotare, porrigitur ab
hera, quod praesto erat, medicamentum ad proliciendum sudorem,
sudat, bubonem accipit in inguine cum virium magna prostratio-
ne, tempus menstruum instare credebatur, imò nonnihil isto-
rum se patefecerat consuetâ via, verum natura naturalis evacuandorum
mensium viæ oblita excitat tam pertinacem narium hæmorrhagiam, ut
nulla arte potuerit sisti, ita omnis sanguis eò laxatis habenis retractoque
repagulo iturus videbatur. Erat alias valde obnoxia fluxui narium san-
guineo, mensibus nihilominus statò tempore, sed parcius, prodeunti-
bus, hinc natura facilius suctum istunc cursum vi morbi adacta repetiit.
Tertio die naturæ concedit.

XV. Aug.

OBSERV. LXXVII.

CUjusdam Tabellarii uxor in hortum suburbanum expatiebatur, sive
animi recreandi ergò, sive carpendi fructus causâ: reversa domum
malè sibi esse sentit, caputque sibi valde dolere. Ad eam accedens
carbunculum in fronte conspicio supra oculum sinistrum, pronun-
cio peste ipsam laborare, ista contraibat dicens se vespâ sive apis spiculo
ibi punctam. Verum non dimovebat me a concepta prolataque sen-
tentia, quam postea ipsa ipsiusque ægritudo satis confirmarunt. multum
enim laboris & curâ difficilem causatus est parvus iste carbo, vixque trium
vel quatuor septimanarum spatio sanationem recepit, nec agræ toto illo
tempore è lecto surgere unquam concessit. Iisdem diebus Filia ejus minor
quatuordecim aëos nata decubuit bubone in inguine oborto, qui ope me-
di-

dicamentorum & naturæ viribus discutiebatur absumebaturque, nares sanguinem fundebant cum *εὐφορία* & non *ἀσπώσ*, ut in aliis vidimus, ideoque gravioribus symptomatibus libera facile superavit morbum. Hisce duabus paulatim vires recolligentibus obruitur eodem malo altera natu major filia, quæ ipsis fideliter ministraverat, bubonem in collo accipit, quo brevi suffocata miserè perit.

OBSERV. LXXIIX.

XV. Aug.

ANcilla virago corripitur bubone in inguine & anthrace in femore, mediocriter ægrotabat sine ulla mentis alienatione, sine vomitu, sine ullo graviore symptomate, interim nec anthrax nec bubo maturitatem recipere apti videbantur, die, qui præcedebat mortem, alter in altero erumpit inguine bubo, cum maximo dolore & ejulatu miserando, quem sequebatur mensium præter ordinem & naturalem fluendi modum eruptio, hanc brevi excipiebat mors ipsa.

OBSERV. LXXIX.

XV. Aug.

Viri, cujus Obs. LVII memini, unicus adhuc superstes filius à Tutoribus bono consilio, & intentione laudabili ablegatur extra portam, ibique non longè ab urbe habitantibus committitur, ut in aëre viveret & liberiore & puriore, securiorque à præsentis esset veneno. Verùm haud diu ibi moratur sanus sed virus in ædibus paternis fortè conceptum sese mox ibi exserit, excitatque bubonem in collo, & parotidem pone aurem sinistram, καύμα circa ventriculum magnum est, alvus dura, vigiliæ, brevi moritur. Ita tota hæreditas obvenit patris defuncti fratri, egeno viro. Citius debuisset fugere hostem juxta illud, citò, longè, tardè. Nec iis, qui diutius in aliquo loco infecto sine noxa sunt commorati, consultum est, ut deinde subito locum mutant, & se in salubriorem aërem conferant. Notandum insuper præter contagium dari quoque dispositionem internam ad pestem citius contrahendam, quodque, qui ejusdem cum infectis sunt naturæ ac temperamenti, ab iis facile inficiantur.

OBSERV. LXXX.

XVI. Aug.

Vir juvenis magno aqualiculo onustus extra urbem cum obequitat, siue animi laxandi ergò, siue negotiorum suorum expediundorum gratiâ, vesperi domum rediens de abdominis molestiis queritur, & cibum præter morem averfatur, omnem mali causam in equum

suc-

succussorium, & motum illum ventri suo valde molestum rejiciens. Vereor autem valde, ut veram sui decubitus causam allegaverit, quod familiare multis fuit, nescio, quam causam morbi sui prætere, ne fortè statim contagio correpti dicerentur, verùm irreparabili sæpe vitæ suæ damno. Sumit primùm domestica remedia, quibus plurimi erant instructi, altero die medicus accersitus quædam præscribit, tertio die secatur vena, omnia ruunt in deterius, nec quicquam de anthracibus vel bubonibus conspicitur. XVI. Aug. qui solis erat dies, summo manè ego vocor, invenio ipsum præ anxietate Cordis mirè se gerentem, scrotum ipsius pueri caput magnitudine æquare conspiciebatur cum purpurascens rubedine gangrænam minitante, quo colore colorata etiam erant femora, altè spirabat, variè corpus jactabat, nec ullum vel locum, vel figuram, vel formam ullam decubitus sui nanciscebatur, ubi vel tantillum potuerit quiescere. Talis incertus decubitus dicitur Hippocr. ῥιπτασμός, βλησπισμός in Sileno, ἀλυσμός in Prognostico, alibi aliter. Ἀλυσμόν autem duplicem facit ex Hippocr. Ballon. lib. defin. medic. Ναυτίωδην alteram, alteram ἀνέμετον. Hic erat ἀνέμετος, unde Hippocr. ἀνέμετος ἀσώδεις dicuntur, cum vi morbi malignâ ita affectus est æger, ut ignoret, quo situ corpus collocare debeat: Ἀλύκη etiam Gorrao dicitur, verum causam tantum in humorem orificio ventriculi certo modo infestum tunicisque ventriculi impactum rejicit. Voce Ἀλύκη utitur etiam Hipp. Aph. LVI. sect. VII. Galeno dicitur sui displicentia, sui que tædium. Paucis à visitatione mea horis moritur.

XVI. Aug.

OBSERV. LXXXI.

SOrores duæ ambæ viris aptæ eodem tempore laborant, bubones habent & carbunculos; multum dormiebant, expergefactæ non loquebantur, nec de doloribus aut molestia ulla conquerebantur, altera ferè immota aliquot dies jacebat, utriusque res deploratæ videbantur, multo tamen labore & diutina medela ambæ pristinam recuperant sanitatem, quâ etiamnum per Dei gratiam fruuntur.

*Sic sepe ex animis complorati que resurgunt,
Quosq; neges unquam vivere posse, valent.*

Hæ ad sudorem non poterant adigi, imò initio vix sumebant medicamenta etiam multis verbis obtrusa. Ἡ φύσις τῶν νόσων ἐστὶν ἰατρὸς: Sive natura non male Hippocr. VI. Epid. dicebantur νόσων ἰατροί. Tertia

tia autem soror in colle bubonem habet, quem facile ferebat, verum nascabatur in lienis regione, ubi tamen nihil vel visu vel tactu se prodebat, dolor tam immanis, ut dies noctesque ejulare & clamorem miserabilem edere fuerit coacta, cujus ejulatus viribus collapsis finem tandem mori fecit. Subfuit sine dubio anthrax in liene aut musculis intercostalibus, licet hic tactu fortè potuisset deprehendi. Etiam in internis visceribus carbunculos erumpere, ibidemque latitare se anno M. DC. XXVI. Hildesiae observasse scripsit ad me Cl. Dominus D. Behrens Archiater Cellensis meritisimus, adducitque Reuchlinum Physicum Lubecensem, cui anno M. D. LXXVII. simile quid observatum. Certè cum ejusmodi laborantibus actum est. Nec memini quenquam evasisse, qui ita miserandum in modum clamasset.

OBSERV. LXXXII.

Vir non mollis corporis, cujus vita jam processerat ultra quinquagesimum annum, non ita periculose decumbere visus est, loquebatur bene, ridebat interdum in lecto jacens, nullam corporis anxietudinem incusabat, carbunculum nullum habebat, sed tantum bubonem inguinalem, optimè ad medicamenta habebat multumque sudabat, de superiore cubili descendit in hypocaustum, atque ibi lectum in scamno ruditer sibi fieri curat. Tertio vel quarto die, cum ipsum visito, manè mediocriter habet, cum ipsi nunciatur me adesse subito surgit caligis indutus mihi que apertis hypocausti foribus obviam ire, imò progredi in aream animus est. Eo viso hortor, ut referat pedem, neque hypocausto exeat, ita leviter agrotabat. Post meridiem, cum fortè ipsius ades prætereo, intro ipsas sciscitaturus quid rerum ibi ageretur, tunc lectum cui incubuerat, offendo in area & mulierem plorantem agrumque animam effluisse narrantem. Subita hæc erat metamorphosis tristisque catastrophe, qui ante paucas horas subridens mihi occurrebat vestibus indutus, nunc insperato concidit exanimis. Mille mutationibus obnoxii sunt peste affecti.

XVI, Aug.

OBSERV. LXXXIII.

Mater, & filia sedecim annorum unà agrotant, mater bubonem habet in inguine, vomit sæpe, circaque cor multum anxia est, in somnes noctes transigit. Contra filia omnia mitiora patitur symptomata, carbunculum habet in altera mamilla & brachio, de nihilo queritur, nec nisi compellata loquitur, febris magna est, quicquid potulenti accipiebat ventriculus, retinebat, paucis diebus moritur. Mater diutius periculosiusque decumbens longo tempore evadit.

XVII, Aug.

XVII. Aug.

OBSERV. LXXXIV.

ANcilla cujusdam consulis *ἐνερτικῇ* graviter laborat, vomit, æstuat, facies præ calore insufflata rubebat, sudor sponte fluebat, sanguis mittebatur, à cuius detractione carbunculus erumpit meliusque habet, serum lactis & lac ebutyratum, quo natura gaudebat, retinet, cætera omnia, uti assumpta erant, rejiciebat: Ita & in acutissimis videas naturam oblectari assuetis, licet minus ea morbo proficua fore judices. Hic error notandus multis adeò familiaris, qui obstinatè jubent ægros abstinere *δυσπέπτοις καὶ κακοχύμοις*, quibus tamen valde delectantur avideque inhiant laborantes, contra substituunt ipsis *εὐχύμα καὶ εὐπέπτα* quæ tamen natura respuit & adversatur. Maximè huc facit *Aphor. Hippoc. l. II. Aphor. XXXIIX. Cibis & potus paulo deterior, suavior tamen, melioribus, sed insuavioribus est anteponendus.*

XIIX.
Aug.

OBSERV. LXXXV.

UXor cujusdam Camerarii bubonem in inguine, & carbunculum in lumbo habet, intensissimo cruciatur bibendi desiderio, nihilum mente turbatur, cordis & præcordiorum compressionem patitur maximam, jactatur multum in lecto, bubo per interna externaque medicamenta non producit, nec carbo ad maturitatem tendit, propter inquietudinem sudorem prolicere erat impossibile, ita animo præ mortis metu & corpore ex ægritudine valde turbato in tertium saltem diem lecto affixa tenetur, post placidè obdormiscit.

OBSERV. LXXXVI.

XIIX.
Aug.

VIdua quinquagenariâ major in crure sive ipsa sura carbonem accipit non multum molestiæ ipsi creantem, ideoque illum nauci habens nullam ipsius curam gerit, languidior tamen est, quàm aliàs corporis conditio fert, propterea me in consilium adhibet, petitque ut sibi quædam ad præservandum, ne communi grassante malo corripatur, præscribam. Examinatis examinandis pulsuque explorato actu jam ipsam laborare pronuncio, maculamque illam nihil esse aliud, quàm verum carbunculum. Contra illa ex matrice se laborare potius, quod infiniti ructus monstrent, quo malo se aliàs sæpe torqueri. Verum cum indies pejus haberet, vires conciderent, *ἀγρυπνία* succederet, omnisque cibi appetitus periret, passa est se ut peste infectam tractari, accersitoque chirurgo ulcusculum obligari, quod à perita manu curationem demum recepit. Atque ita refectis viribus paulatim ad se redit integrèque curatur, quæ se verè ægrotare non putabat.

OB-

OBSERV LXXXVII.

SOrores duæ, una statim post alteram, peste periculosè decumbunt, al- XIII.
 teri altero ab invasione die sexta vena saphena fuit, nihil in corporis Aug.
 habitu pestilentis notabatur, tertio die hæmorrhagia narium succe-
 dit magna, & maculæ tres ex rubro livescences oriuntur in manu dex-
 tra, sudavit statim in initio optimè, mensium fluxus debitum statutumque
 naturæ tempus antevertit, evalit tamen feliciter. Altera, dum sororis
 morbus adhuc in declinatione est, etiam incipit ægrotare ex capitis dolo-
 re & vigiliis, pulsus celer est, in corpore nihil erumpit, quod pestem po-
 tuerit monstrare, fluxus alvi moderatus, magnum de vita peritura incutie-
 bat metum bubonis carbunculiq; absentia, superavit tamen & hæc ex
 sententia periculum.

OBSERV. LXXXIIX.

Mulier bene valens adhuc, & marito suo fataliter decumbenti an- XIX. Aug.
 xiè prospiciens, carbunculos parvos in cruribus sortitur. Ne-
 scia pestis hos esse *ἐξανθήματα*, vel potius *φύματα*, dumque
 dolorem nullum inferebant aut molestiam aliquam, nauci eos
 facit, ostendit tamen eas Chirurgo, qui tum fortè curam Mariti in se su-
 sceperat, cum & ipsi ignotæ essent hæ papulæ, utpote hæcenus non visæ,
 dicit, illas nihil esse unde se angat, aut periculum de peste metuat, atque
 ita bono animo eam dimittit. Marito defuncto & ipsa vi morbi adacta
 lectum cogitur petere altero à viri morte, si rectè recordor, die; Me in
 consilium vocat, tunc denudatis cruribus ea ipsissimis carbunculis parum
 elevatis livescensq; notata video, eorum aliqui jam evanuerant, lan-
 guor corporis aderat, vomitus cordisque compressio, mens constans ma-
 nebat, & animo forti ferebat, quicquid mutare non poterat, finemque
 vitæ suæ sibi ipsi ex livescens carbunculis & macula in manu oborta
 præsagiebat, quibus se indefinens inquietudo associabat & *ἀεινήσσια*.
 Sæpissimè fit, ut *sub pusillo tuberculo & viti cicerculo latitaverit & conclusa*
fuerit vis veneni magna, ut alicubi loquitur Severinus, Neapolitanus ille
Chiron. Hic locus postulare videtur ut explicem, quid sit Carbunculus,
 quibus signis noscatur, quo in loco oriatur, quiq; sit salutaris & qui mor-
 tem portendat, ultimo quomodo curetur. Carbunculus nomine pustula-
 rum venire comprehendique generaliter sub vocibus *ἐξανθήματων*,
ἐκθυμάτων καὶ ἐκφυμάτων extra controversiam esse puto, variari autem
 multum ex causâ materiali (vide Heurnium in Comm. Aph. Hippocr.
 Aph.

Aph. XVI. f. II. colore & aliis accidentibus, nec incommodè eos referas ad pustulas Celsi, quas dicit à Græcis vocari ἀγπλᾶς : Verè enim instat feræ alicujus sub & adjacentem carnem depascunt & corrumpunt. Videndus *Goræus in definit. medic.* Sunt igitur Carbunculi nihil aliud quàm pustulæ sive potius tubercula parva parùm elevata cutemque ut plurimum exulcerantia ex fervido adusto, & à pestilenti veneno fermentato inque ichorem verso sanguine in cute erumpentia, nunc rubra, nunc purpurea, nunc livida. C. Celsus ita eos describit lib. V. c. XXII X. Rubor est, superque eum non nimium pustula eminent, maximè nigra : interdum sublivida aut pallida. In his sanies esse videtur, infra color niger est : ipsum corpus aridum & durius, quàm naturaliter oportet, circa quem quasi crusta est eaque inflammatione cingitur, neque in eo loco cutis levare potest, sed inferiori carni quasi affixa est. Ita Celsus. Quibus Ego addo, si rubor iste in acutum tendit, sitque ὑπὸ σκληρὸς & cunifformis, & instar varorum in facie, (die Sinnen.) pus nondum habentium, se habeat, nec altero die liveat aut rubor is obscurus fiat, bonum esse signum, itidem si ἀπτίως καὶ ἀπαρτί, quod rarò tamen fit, erumpat. Contra si non attollatur, brevi tempore livescat aut nigrescat, ad ἐκπύωσιν maturè non deveniat, sed potius saniem & ichorem serosum reddat, mortem præ foribus esse indicat. Commodum hîc adducitur prognosticum Hipp. lib. I. Prognost. §. XV. Ulcera in morbis inspicere debemus, ante mortem livida sunt. Oriuntur autem in universo corpore, capite, pede, manuum digitis partibusque obscænis, in locis tamen glandulosis, excepto capite, non memini me quemquam observasse. Curatur attractivo medicamento, & circa ruborem appposito defensivo, denique maturante & consolidante, ut cætera ulcera semper admixtis pesti peculiariter adversantibus. Num ad Carbunculos pestilentes referendus Carbunculus, cujus meminit Plin. Secundus l. XXVI. cap. I. ? non puto.

OBSERV. LXXXIX.

XX. Aug.

Mulier juvencula post obitum parentum paulo ante memoratorum & ipsa peste corripitur, bubonè in inguine habet, qui ad supurationem non pervenit, sed beneficio caloris naturalis discutitur sensim & applicatione emplastrorum. Carbunculos duos patitur, quorum alter in ventriculi superiori orificio ad cartilaginem ensiformem conspicitur, alter paulò superius supra diaphragma, tres dies admodum debilis est, sine tamen gravibus accidentibus, quod mirum, cum in locis hæserint illi sanguinis calorisque fonti vicinis, ipsi Cordi.

Ve-

Verum agræ corpus bene præparatum erat, ab omni que cacochymia liberatum, ideoque putredo tam altè pedem figere nequibat, sed natura oneris parte levata facilius, quicquid noxium erat ad cutem protrudere potis erat. Et quamvis ipsius malignitatis *πρώτον δεικτικόν* non sit *κακοχυμία*, affectum tamen valde reddit deteriore. Dici enim vix potest, quàm bellè se habuerint omnes, qui moderatè præservatoriis, iisque temperatis, usi sunt remediis, atque ad mensuram sive libellam mediocriter vixerunt, maximam enim partem contagii correpti liberati sunt, nec ita gravibus symptomatis laborarunt: Contra qui immodicè ea usurparunt nimiumque calida in usum traxerunt, pessimè cum iis actum, uti in progressu dicetur

OBSERV. LXXX.

Vir quinquagenarius durorum haud impatiens laborum, *ευσταρκος*, bubonem sub axilla sinistra, carbunculos, unum in sterno, alterum in humero habet, bubo dissipatur, carbunculus in sterno suppuratur, & cum subjectam carnem non altè exedisset, faciliè sanationem suscipit, ut & qui humerum obsidebat, sudabat multum, & ferè continuo cutis ex halituosis vaporibus madebat, urina turbata & lutosa erat cum multo crasso sedimento, facies rubebat, somni vacuitas, post octo dies restituitur. Quem optatum eventum etiam nanciscitur ipsius Filia major juxta patrem in eodem cubili cubans, bubonem in inguine magnum exulceratum habebat, multum etiam calebat & sudabat.

XX. Aug.

OBSERV. XCI.

Mulier boni salubrisque habitus, cujus maritus ante paucas septimanas jam è vita decesserat, continua corripitur febre, rubet, æstuat, deficitur appetitus, nauseat, nullus in cute erumpit vel carbunculus vel bubo, à doloribus omnibus libera, mens firma, maior cutis multus. Hanc peste infectam asserere non dubitabam, quod tum ex superius adductis symptomatis erat colligere, tum ex quorundam in propriis ædibus mortuorum sepultura. Abscessuum autem nulla eruptio erat facta, partim quod conceptum virus in corpore puro fermentationem multam & putredinem creare non potuit, potiusque naturæ robore & bonitate discussum paulatimque superatum fuit. Illa post plures dies integrè convalescit. Confirmat meam opinionem magnum Hippocr. argumentum: *δηλοὶ καὶ ἡ ἥσις*, quæ pesti contraria adhibebatur.

XXI. Aug.

OBSERV. XCII.

XXI. Aug. **S**imile, sed dissimili eventu, exemplum affert nobis virgo robusta, illa per aliquot dies malè habet, nunc lecto tenetur, nunc obambulat, & quia medicamenta averfabatur pertinaciter, resque ejus periculosiores nec agra nec domesticis videbantur, negligitur medicus, quo tamen tandem in consilium vocato nec melius ad Alexipharmaca habet, nec pejus, ultimum refugium fit ad sectionem venæ, quâ celebrata omnia in pejus ruunt, altero à secta vena die ab hac luce subtrahitur. Nulli in corpore abscessus vel maculæ apparuerunt. Fortè, quia nondum in corpore bubo vel carbunculus fuit visus, audacter vena secta est, verùm ἀλόγως καὶ ἀμερόδως & non sperato effectu. An non apparentibus vel bubonibus vel carbunculis tutò vena aperienda, uti cuidam ex nostris medicis placebat? Non certè videtur.

OBSERV. XCIII.

XXII.
Aug.

Quid terror subitus & insperatus possit in corpore humano, multis docent, & res est clara. *Schenk. lib. I. Obs. I.* recitat exemplum de juvene in aula Cæsaris, qui ob expugnatam virginis, quam deperit, pudicitiam in carcerem conjectus ad mortemque damnatus est. Mortis horâ denunciata nocte illâ, quam ultimam fore sciebat, canus factus est, ita ut sequenti die pro tribunali consistens à nemine eorum, quibus cum familiariter vixerat, ne à Cæsare ipso potuerit agnoscì: adeò illi mortis horror vitæque desperatio paucarum horarum spatio colorem vigoremque corporis ademeral, ut omnis species formæque decor ac venustas defluxisse videretur. Quâ repentina, & insolita pilorum mutatione aspectuque viri attonitus & obstupefactus Imperator, ex vindicta in commiserationem deflexit animum, satisque panarum dedisse ratus culpam illi remisit, ac violatæ ereptæque pudicitiae crimen condonavit. *Quandoque ex terrore & timore Epilepsia orta est, Joh. Bapt. mont. de morb. part. Conf. XXVI.* Quid valeat in gravidas, clarius est, quàm egeat narratione. *Nonnunquam sanat morbos terror repentinus: Sic Epileptica tempore paroxysmi frigida largiter affusa præter expectationem perterrita convalescit, Barthol. Hist. Anat. Cent. III. p. LXXXIII.* Terrore pestem induci plurimis exemplis hîc sumus edocti, verùm eo curatum novimus neminem. *Idem Bartholin. Centur. IV. Obs. LXXVI.* censet, corripì multos tempore pestilenti pestilentia, quàm fortè constanti animo & sereno evaderent, ob timorem vel eo nomine, quod torpidus metu

metu sanguis ingruentia mala facilius admittat. Ego Vocor ad Viduam ægotantem, ancilla adventum meum sollicitans neminem in domo sua ægotare præter heram dicebat, verebatur, si verum dixisset, ut venirem. Domum cum intro in ipsa area ex improvviso arcam sepulchralem albo linteo tectam offendo,

steterunt

Statim arrepta horrore comæ, vox faucibus hæsit.

Sisto illicò pedem incertus num introeundum, num pes referendus sit. Ast resumpto animo pergo ad heram, quam in cubili suo offendo admodum ægram, sanguinea erat, obesa, circa diaphragma & faciem æstus multus, valde febriebat, vomebat, secatur vena, evadit. Primo accessu paucis verbis cum ipsa commutatis fortè retrospiciens à tergo duos lectulos video, in quibus singulis liberi contrage infecti decumbebant, quos etiam brevi pòst omnes mors abstulit atra, sola matre relicta superstite; Iterum non levi horrore concutior, & tamen mali nihil inde per Numinis clementiam, quæ semper mihi mirè adfuit, mihi accrevit:

Sic subii toties manifesta pericula vite.

OBSERV. XCIV.

PRæcedens historia in memoriam mihi revocat, quæ non multo ante tempore contigerant heræ hujus servo, quæ etiam merentur heic inferi. Servus iste dominicâ quadam diè extra urbem in cauponam cum sociis suis se confert, ultra mediocritatem poti portam, ne excludantur noctu, repetunt, in via altercantur, à jurgiis ac conviciis ad verbera deventum est, etiam vapulat hic servus. Vesperi domum rediens incanatus cubitum it, manè diutius solito dormit, unde mittit domina sciscitatum quî hoc fiat: respondet, heri se plagis quibusdam exceptum ex iisque ægotare. Hera fidem adhibens servi verbis & excusationi de in longius consueto tempus protracta dormitione negligentius ipsum tractat, quàm aliàs morbus postulâset, altero vel tertio die moritur, in corpore nec bubo nec carbunculus oculis usurpari poterat. Ab ejus obitu jussu Amplissimi Senatus oblegamur eò Ego, Senatores, & Præfecti judicii inferioris exploratum visumque, num ex plagis mors ipsi obvenisset. Corpore undique inspecto reperimus nec vulneratum illum, nec vestigia ulla alicujus sugillatûs & contusionis, sed in sinistro femore ad inguen usque & Epigastrium maculas purpurascens & flavos, cum nulla cutis elevatione, quales conspici aliàs solent in moribundorum aut mortuorum dorso musculosisque partibus; quæ eum non indicarent violentâ

lentâ morte illum obiisse , iudicatum fuit peste illum ab hominibus ere-
ptum, & heram finxisse hæc studio, simulasseque veram veri morbi caus-
sam, uti plurimi falsam hoc tempore sui decubitus causam prætenderunt
irreparabili sanè suo damno. Ita sæpeprehendit mortales Pests

Inter spem, curasq, timores, inter & iras.

An vero liceat morbos simulare, & qui facilius, qui difficilius possint si-
mulari, quaque pœna morbum simulantes afficiendi, optimè edisserit no-
bile illud romanum decus Zachias Quæst. med. legal. lib. III. Tit. II.

XXII.

Aug.

OBSERV. XCV.

Scriniarii uxor debilis admodum & lipothymiis defatigata anxie me
desiderat, ut servetur cum suo marito, qui duo soli ex omnibus dome-
sticis adhuc supererant. Illa bubonem unicum habet in inguine, præ-
quo ægrè incedebat claudicabatque valde, tandem omnino lecto de-
tinetur, sudat optimè, refrigerantibus maximus calor temperatur sana-
turque ex voto. Cum morbus declinat, corripitur & maritus, ille ob usu-
ram sive lucrum, quod ex manuum opera tum ubertim ipsis suppetebat,
lecto se committere nolebat, sed stando nunc, nunc sedendo arcas fune-
bres conficiebat, verum morbi vi ita dejectus viribus est, ut mortem in
proquinquo esse omnes arbitraremur. Lecto itaque illatus refocillatus-
que paululum ad se rediit, sudorifera propter virium debilitatem non po-
terat ferre, & jam in opere suo faciundo sudaverat sic satis, Convaluit.

XXIII.

Aug.

OBSERV. XCVI.

Virgo florentis ætatis lethaliter jam per aliquot dies decubuerat, an-
tequam Ego accersor, ad primum intuitum aperte dico illam non
evasuram mortis vim, quanquam morborum acutorum incertæ
sint prænunciationes, Hipp. f. II. Aph. XIX. jacebat supina artubus
omnibus extentis & projectis, qualis decubitus Hippocr. suspectus est, dum
inquit in coac.: ὕπτιον δὲ κεῖσθαι τὰ σκέλεα ἐκτεταμένον οὐκ ἀσθεῖον,
supinum jacere, cruribus extentis, bonum non est. Idem lib. I. progn. f. IX.
Habebat in inguine bubonē, non memini me alios heic notasse abscessus,
faciei color perierat vividus, non loquebatur, sed ut comatosa altero die
hominem exuebat. Mirum quā juvencula boni habitus sanguineque lau-
dabili aliàs abundans nativum floridumque faciei colorem diu ante obi-
tum amiserit, & alii non ita sanguinei servarint eundem immutatum ad
ultimum usque mortis articulum, ut vel centies observatum. Num cor,
vitæ

vitæ arx, ex quo mediantibus arteriis sanguis omnis externis partibus communicatur, statim initio ita obseſſum & occupatum fuit, ut nequiverit vel elaborare puros ſplendidosque ſpiritus ſanguinemque floridum, imò eo uſque non potuit ablegare præ imbecillitate id, quod illuſtrare faciem debuiffet, inde decolor facies, non aliter ut ex abſentia luminis tenebræ oriuntur?

OBSERV. XCVII.

Vir ſexagenarius, ut conſicio, obefus, & cacochymicus, contagio ta- XXIII.
ctus ad ſe ut veniam petit, æſtuabat, ſpiritum altè trahebat, ut aliàs Aug.
is præ corporis mole difficulter ducitur, inordinatè vivebat, nunc
hoc, nunc illud potus genus potans, potius naturâ, quàm arte ſe-
quitur ſudor, carbunculum exulceratum habet, qui ægrè ſanationem re-
cipiebat, absque hoc ſi fuiſſet, ſaltem continua putrida laborare illum eti-
am excercitaſſimus in artis noſtræ operibus judicâſſet. Eodem tempo-
re in eodem hypocausto unâ ægrotabat & uxor ejus viro pinguior ſuo,
nec purioris corporis, ex inordinato vitæ genere contracti, illa nec bubo-
nem habet, nec carbonem, ſudorem prolicere non poteramus, ob cor-
poris enim craſſitiem integumenta multa ſibi imponi non ferebat, negli-
genter tractati ſunt, & tamen ambo Dei beneficio eluctati ſunt multo
tempore. Obſervatum aliàs, periculoſius peſte ægrotare carnoſiora
corpora, ſive potius pinguiora, quàm gracilia, cæteris tamen paribus.
Et omninò diſtinguendum inter carnoſos & pingues, illi ſanguine abun-
dant calidiorisque temperamenti ſunt, hi frigidioris minusque habent
ſanguinis: pinguedo enim potius à frigore eſt, eoque concrevit, utpote
quæ calore funditur, ut optimè *Ariſt.* docet. Et de pinguibus videtur
accipiendum, quod falſè in illos dicit *M. Cato major apud Plutarchum*
de Vit. Ill. Vir. ubi tale corpus, inquit, utile ſit Reipublicæ, in quo, quod inter
gulam & inguina intereſt ſpatii, omne venter occupat? Et *Gal. lib. ad Thra-*
ſyb. dicit, venter præpinguis acutiem menti non adfert: & ex *Celſo l. II. c. I.*
Obefum corpus hebes eſt. Et impinguatio, ſi modum excedat, noxia eſt, in-
quit, *Philof. II. part. animal c. V.* unde quæ valde pingua ſunt, celerius ſe-
neſcunt, ratio eſt, quia parum ſanguinis habent, at quibus non ſuppetit
uberior ſanguis, ad interitum ſunt oportuniora: interitus quippe ino-
pia quædam ſanguinis eſt. Sunt præterea nimis obefa inquit *Cl. Sebizius*
lib. V. de Alim. Fac. ſterilia ob ſanguinis penuriam. *Gal. comment. in*
Aph. Hipp. Aph. XLIV. lib. II. diſtinguit inter illos, qui à pueris craſſi
ſunt, & illos, qui poſtea ex aliqua occaſione craſſeſcunt, hos firma valetu-
dine judicat, illos minus, quia vaſa parva habent & ſanguinis conſequen-

H

ter

ter minimum. Et corpus crassum ταχυθάνατον est, ut Hippocr. aperte innuit prænominato Aph. qui ita habet: οἱ παχέες σφόδρα κατὰ φύσιν, ταχυθάνατοι γίνονται τῶν ἰσχυῶν. Qui naturâ valde crassi sunt, celerius moriuntur, quàm graciles. Præterea pleniora corpora morbosiora quoque sunt plurimos pravos & ad putredinem aptos humores in aqualiculis suis continentia, unde Celsus l. II. c. II. Si plenior aliquis & speciosior & coloratior factus est, suspecta bona sua habere debet. Illud tamen observandum ex Mercuriali l. de morb. puerorum c. III. Obesitatem, quæ equaliter perseverat, esse multo eligibiliorem, quam sit immodica macies, eo quod vita nostra posita est in humido, & ubi humiditas hæc abundat, fugiuntur plurima noxæ, illæ scilicet, quæ ex coitu, laboribus, & aliis immensis evacuationibus contrahuntur. Nec tamen laudaverim nimiam maciem, gracile enim corpus infirmum est inquit Celsus l. II. c. I. & à causis externis facillè læditur. De macie distinctè & eruditè loquitur paulò ante citatus Mercur. cap. III. Macies, inquit, & gracilitas modò à principiis nature oritur, & naturalis est, modò adventitia, ubi à principiis nature est, semper melior est quàm obesitas nimia, quia ubi graciles à natura sunt, capaciora vasa habent: Macies autem adventitia, si modum excedat, mala est, præsertim in pueris, ratio est, tum quia hujuscemodi macies causam aliquam semper sequitur morbosicam: tum quia ut dicit Arist. III. de Histor. animal. XVI. in his venæ atque nervi extenuantur & contabescunt. Quomodo verò corrigenda sit obesitas excedens & macies immodica alibi docetur, & huc non pertinet.

OBSERV. XCIIX.

XXIII.
Aug.

PUella duodecim annorum, spes unica Parentum, graviter caput laborare ex unico in inguine parvo bubone, quantum nauseabundus ventriculus admittebat, sumere jubebatur, verùm quâ assumpserat viâ, eâdem reddebat accepta. Procedente morbo difficulter caput deglutire, ita ut brevi totum ferè interciderit deglutiendi munus, nec tamen vel extra vel intra collum tumor ullus aut visu aut tactu deprehendere erat, hinc suspicio oriebatur de musculorum faucium resolutione aut potius Angina, de qua Hipp. in coac. prænot. Angina, quæ neque in collo, neque in faucibus quicquam conspicuum faciant, verùm suffocationem vehementem ac spirandi difficultatem inducunt, eâdem die & tertiâ occidunt, accuratè tamen hoc non poteramus indagare ob distractissimam praxin, & quia mors altero die obrepebat.

OB-

OBSERV. XCIX.

Juvenis XXII. circiter annorum robustus, sentiens se infectum fategit XXIV. currendo conceptum contagium dissipare, ideoque confestim extra *Aug.* portam se confert, & citissimo cursu unum alterumque stadium conficit multo sudore ex nimio motu profuso. Altero die, cum pejus haberet lectumque petere cogeretur, Parentes me accersunt. ingressus ad ægrum de immaturo & noxio cursu quæro, dicit se tantum sudorem profudisse, ut etiam per caligas & tibialia profluxerit. Verum tantum abfuit, ut juverit, ut maximè etiam nocuerit intempestivus iste & vehementior motus. Si à motu isto statim lecti tepore esset exceptus, relictusque cordialibus & Alexipharmacis medicamentis, procul dubio conducibilis fuisset, sed poris cutis pernici isto cursu apertis illorumque ostiolis in libere aëre cessante motu occlusis occlusum quoque fuit id, quod maximè exire sanitas futura requirebat. Succesit profundus somnus, delirium mite & non continuum, narium hæmorrhagia interrupta, & quæ vires non minuebat, laudabili crisi hanc provenire existimabam, hinc omnes læti de certa salute bene sperabamus: verum crescente delirio & febre inopinatò è vita discessit.

OBSERV. C.

Civis cujusdam domus adeo infecta erat contagio, ut omnis familia XXIV. brevi pessum ierit præter unicam, quæ ex peste adhuc claudicans *Aug.* parentibus liberisque decumbentibus erat à ministerio. Ad virum vocatus offendo illum febre ardentissimâ laborare, sæpe altèque spirare, carbunculis bubonibusque corpus ejus insignitum, vomitus multus & putredo insignis aderat. A Conjugis, quæ in alio lecto cubabat, vomendi conatu vomituque subsequente respiciendi ansam capio, illa non minus lethaliter ægrotabat, ipso marito, cumque omne assumptum revomerent, brevi ambos feretro in cimiterium portari vidi. Bis saltem eos visitavi, nec lubuit pluries immundam ipsorum domum, ne Dominum meum temeritate meâ temerarem, ingredi, quoniam, inquit, *Augustin. l. XVI. de C. Dei c. XIX. si quis periculum, quantum cavere poterat, non cavet, magis tentat Deum, quam sperat in Deo:* Sordida erant omnia, cubiculi fenestræ apertæ omnes, per quas involabant gallinæ galliche pavimentum fædè conspurcantes, nec erat, qui vel suffitu quodam aërem corrigere potuisset. Sequentibus diebus in hujus fratris ædes è regione positas me conferebam, inde de illorum statu me erudiri facile sustinui. Verum aucta putredine & contagio pro deploratis habebantur,

bantur, nec erat quisquam, qui ulteriorem meam sollicitâset opem, consiliumque petiisset, brevi omnes diem suum obierunt.

OBSERV. CI.

XXV. Aug.

Mulier juvenis primis gravida mensibus nausêâ tentatur & vomitu cum modico calore præternaturali. Cum nihil in corpore pestilentis, quod oculis usurpari potuisset, animadverteretur, gravibusque symptomatis careret, à generosioribus mediis consultò abstinuimus, saltem julapiis confortantibus rem omnem expedivimus, alvoque per suppositorium sollicitatâ in melius versâ ejus res est. Num pestis subsuerit, non possum definire, præ metu animique consternatione multis ægrè viventibus; Et nausea vomitusve primis mensibus utero gerentibus non solet esse infrequens.

OBSERV. CII.

XXV. Aug.

Virgo septemdecim annorum clari Viri filia sentit lassitudinem omnium membrorum, in somnum propensa est, qui somni amor ita increvit, ut per vitam & morbi totius decursum eum vitare nequiverit, tumorum in corpore nihil conspicitur, jacet immota artubus omnibus disjectis, qualis decubitus superiùs descriptus est, *ἀσπυγος* est, facies omnem naturalem colorem amiserat, ita ut ex pallore ferè liveret, vitio scilicet præcordiis incumbente, præsertim verò à pulmone, qui de proxima vicinia, qualis ipse est, tales & genis refundit colores. Curatur primum ab alio, nescio quo, qui eam ut hystericam & ex uteri strangulatu laborantem tractat, aquam potentiâ calidam præscribit, quam adstantes actu frigidam in ægræ faciem projicere jussi sunt ad eam excitandam, prout interdum fieri suevit in uteri suffocatione. Cautè tamen hîc te geras, oportet, Hystericis enim aspersiones in faciem cum vino aromatico non conferunt, Forest. XXIX. Obs. XXV. quia uterum ascendere faciunt ibid. Obs. XXIII. Schol. Res in deterius labitur, vocor & Ego, dico peste eam laborare, quod & ægra ipsa ad sororem suâ, quæ adhuc superstes est, lingua vix perceptibili confitetur, inquires: Soror dilecta pestis est, proinde viciniùs te mihi ne sistas. Altero die oborto fluxu colliquativo fetido & nigricante ad vitæ exitum vocatur.

OB-

OBSERV. CIII.

ANcilla virago, cujus pudicitia suspecta admodum erat, nihil pestem metuens corripitur eâ satis acutè & periculose, primis diebus mediocria sunt symptomata, verùm multiplicantibus se diebus multiplicantur & ipsa, in delirium agitur continuum, quod excepit clamor & ejulatus magnus per duos dies, qui terrorem incutiebat audientibus & misericordiam plurimis movebat, *alienis enim delectari malis, voluptas in humana est*, inquit Senec. de Tranquill. anim. c. XV. Pauca admodum medicamenta ipsi porrecta sunt, & non nisi ultimis vitæ diebus.

XXVI.
Aug.

OBSERV. CIV.

MOrbos alios omnes filere pestis tempore unanimi consensu à medicis adstruitur experientiaque confirmatur, nec Ego contrarium asserere conabor, unum tamen alterumque affectum levio-rem à peste diversum pestis tempore me observasse profiteor. Viri militaris præfecturæ uxor laborat febre tertiana purâ sive exquisita, curatur à D. Collega meo Jordano, qui ante sex septimanas primum huc venerat. Verùm cum pridie ipse malè cæperit habere, mittit ad me peti- tum ut vires suas expleam mulierisque illius curam in me reciperem. Obstupefactus hoc nuncio eo ad ægrotam, quàm minus periculose ægrotare offendo, mittitur sanguis, purgatur, & administrantur alia, quæ ad talem morbum ex arte requiruntur, non multis diebus convalescit. Hinc recto pede pergo ad Collegam meum, atque ibi minus prospera omnia invenio, prout sequens docebit observatio.

XXVII.
Aug.

OBSERV. CV.

ACcedens ad Dominum Collegam meum τὸν μακαρίτην caussum- que decubitus accuratiùs inquirens tango parvum bubonem sub axilla sinistra, erat patiens sine ulla lipothymia alioque graviore symptomate. Quæro num sudoriferum aut expellens aliquod sumisset medicamentum, negativè respondet: quæ autem ductus ratio- ne abstinuerit ab ipsis non possum accuratè divinare, certè in ἰδρωτί- κοῖς in initio morbi adhibitis potior sanationis spes sita est; venenum enim in corpus transumptum non diu extra vasa subsistere posse, sed citò capi per venas ad cor, ex hoc mediantibus arteriis in universum corpus didi, credo apud omnes in confessio esse, Sed non tangam hoc argumen- ti genus, ne quis me ipsius manibus insultare velle contendat, aut mor-

XXVII.
Aug.

quo licet movere : saltem tamen omnino merentur legi, quæ in hanc rem scripsit excellentissimus Philosophus juxta ac Medicus *Fracastorius Veronensis* (qui *Patrum Concilii Tridenti* medicus fuit, & à Pontifice *Leone X.* *menstruos* habebat aureos sexaginta, teste *Sleidano lib. XIX.* Splendidum mercuries salariū. Verum splendidius multo fuit, si verum, quod de *Cotterio Ludovici XI. Gallie Regis Archiatro* narratur, teste *Cominao lib. IX. Histor.* qui pro *menstruo* stipendio decem aureorum millia accepisse scribitur. Nimium hoc est, & fidem forsan superat. At

*Quam malè nunc Artes miseras hæc secula tractant ;
Spes nulla ulterior. Didicit nunc dives avarus
Tantum admirari, tantum laudare disertos ;
Ut Pueri Junonis avem.)*

lib. de Contagionib. c. VII. Quod in animal penetrent (scil. contagii seminaria,) & nonnulla citissime nemo mirari debet, si modum quo ingrediuntur, consideret: ingrediuntur autem è parvis poris, venis, & arteriis in majores, & ab his in alios, sæpe etiam usque ad cor. Unus penetrationis modus est per propagationem & quasi sobolem; prima enim seminaria, quæ adhæserunt è vicinis humoribus, ad quos habent analogiam, consimilia sibi alia generant, & propagant, & hæc alia, donec tota humorum massa & moles afficiatur. Alius modus est per attractionem, quæ intro fit tum inspiratione per anhelitum, tum venarum dilatatione: simul enim cum aëre, qui attrahitur, ingrediuntur commista contagionum seminaria, quæ, ubi introducta sunt, non eadem facilitate regrediuntur per expirationem, quæ ingressa per inspirationem fuere, quoniam agglutinantur humoribus & membris, & nonnulla etiam spiritibus, qui contrarii speciem refugientes, secum & inimicum ad cor ferunt: non enim dicendum est (ut quidam ajunt) venena & contagiones præcipuè cor petere, atque aggredi, uti inimicum, quasi cognitio & voluntas eis insint. Tardius autem penetrant, quæ per se minus acria sunt, aut in lentore multo sepulta, & analogiam habentia ad crassiores humores, & quæ per venas trahuntur: celerius autem, quæ per anhelitum, & quæ subtiliora sunt, & acrimonia majoris, ad spiritus autem analogæ. Fortasse autem & alius est penetrationis modus: omnis enim evaporatio de angusto in amplum facillimè diffunditur: quare, quum minores & angustiores sint venæ, quæ circa summa sunt, majores verò continuè, quæ versus cor itur, inde fit, ut contagio quàm facillimè ex angustis venis in amplas diffundatur, ubi etiam major est calor, atque ad cor etiam feratur, nisi quid obstet. Suadeo ut non nihil pulveris alicujus bezoartici, Elix. pestilent. Bol. armen. vel terr. sigillat. cum aq. Theriac. & aceto Bezort. sumeret, terras enim ejusmodi pingues plurimum in peste valere jam dudum nos ab utriusque nostrum quondam Præceptore Magno & Incomparabili Conringio

ringio esse edoctos. (cujus sententiæ quoque esse video D. D. Simonem Paulli Archiatrum regium) Danicum itidem Præceptorem quondam meum plurimum honorandum in *παραβάσει* sua de Febrib. malign. nimirum *venenorum vim frenari, aut potius (εἰς illorum sisti per pinguias ne corrumpere corpus nostrum possint.)* Præbet assensum, sudat, buboni apponitur Emp. magnet. Salæ, nihil tamen eundem promovimus, circa vesperam melius habet, præscribo pauca alia, quia valde averfabatur medicinas. Manè sequentis diei iterum ipsum invisiso, adhuc bellè habet & meliores securioresque ejus res erant, quàm præcedens dies eas nobis dederat, non diu ibi moror ob diffusam praxin, & quod tunc ferè solus eam in amplissima hac civitate exercebam. Post meridiem omnia in pejus labuntur, cumque circa horam quartam ædes ipsius fortè prætereo, obaudio in ipsius cubiculo strepitum murmurationemque legentium, orantium, altèque suspirantium: mutato cursu ad ægrotum festino, ibi primo intuitu omnia conclamata invenio,

Et vis & virtus membris decesserat omnis,

facies cadaverosa erat, pulsus in manus carpo ob virium cordis oppressionem nullus sentiebatur, fluxus colliquativus lecto illum surgere compellebat, mens nihil vacillabat toto morbi decursu ad extremam usque halitum. Consolans illum fortique animo esse jubens dico posse Deum & morti proximos vitæ integræ reddere, fierique sæpe in arte nostra miracula: verum ipse sentiens, quem hostem in pectore gerat, respondet: moriundum, moriundum mihi est, tange pulsum meum & non senties ipsum. Tunc ad hunc modum ipsum locuturum divinabam:

Nil artes, herbaeq₃ valent succiq₃ potentes.

Astra se fellerunt primoq₃ in flore virili

Aufferor, heu fallax, & breve, vita, bonum.

Non mihi jam patria superest spes ulla in vande,

Manibus hac tellus est habitanda meis.

Non Ego, quod rapior primis inglorius annis,

Fata moror, quamvis vincere dulce foret.

Tu facis, ah miseranda proles, tua serior etas,

Tempus in exiguum cur superesse velim. P. Lot.

Cum jam jam instare mortem animadvertēbam, multis Deo ipsum commendabam lacrymis, ille vicissim omnia fausta mihi apprecabatur, atque ut opera mea miserrimo & calamitoso hoc rerum nostrarum statu (quo,

Quocunq₃ adspiceres, luctus gemitusq₃ sonabant.

Et — lugent juvenesq₃ senesq₃

Et vulgus proceresq₃ gemunt.

Sil. Ital.)

plu-

piurimis proficua sit, optabat, etiam, cum ab eo discefferam, mille vale
mihi nunciari iussit. Atque ita

— ipsa in patria florentibus annis
Funere cum sæuo merfit acerba dies,

& ab hoste, quem ante sex septimanas oppugnatum venerat, extinctus est
multo post se desiderio relicto. Ergo nunc

Ossa jacent tumulo: victuri gloria restat
Nominis: ad superos mens pia fecit iter.

Salve pars animæ nuper dulcissima nostra,

Gaude & perpetuum rursus ave, atq; vale. Lotich.

Ego ipsius obitu non parum consternatus non semel ingeminabam illud:
Hodie Tibi, cras Mihi, omniq; horâ truculenti hostis irruptionem Arx
vitæ meæ metuebat, cum nec hora, qua cum infectis conversari non coa-
ctus fuero, vacua mihi relicta sit, atque

Tristibus assiduò Lachesis me cura fatiget
Casibus, & latos non sinat ire dies:

& tamen ex mediis flammis Deus meus misericors verusque Ἀλεξίκακος,
ut Herculem appellat Homerus, benignissimè me eripuit, atque in hunc
usque diem optimè valere ex mera sua gratia dignatus est.

Ergo reus voti, quid agam? quæ dona rependam!

Quo Tibi, summe Pater, munere gratus ero?

Non dabimus costum succumvè liquentis amomi,

Nec te Panchæi thuris honore colam.

Grata tibi mens labe carens, & honesta voluntas,

Inq; tui flagrans agnitione fides.

Summe Parens, Sobolesq; Patris, Consorsq; duorum

Spiritus, in trino numine numen idem.

Omnipotens, cujus divina potentia finem

Non habet, æternùm laus sit honorq; Tibi.

Non medicaminibus, non sum servatus ab herbis,

Nulla meis radix usibus apta fuit.

Idcirco, Deus alme, tuo dum munere vivam,

Ingenium soli serviet omne Tibi,

OBSERV. CVI.

Matrona honesta quinquagenaria major admodum periculosè laborat, carbunculos habet & bubonem, quorum tamen nullus ad XXVII.
ἐκ πύσης & maturitatem pervenit, febris putrida magna, æstus, Aug.
vigiliæ, lipothymia, alvus sicca. His accedebat & aliud accidens, molestissima nempe & indefinens sputi sive pituitæ viscida ex ore rejectio instar *πυελισμοῦ*, (qui tamen magis de aqueo crudo humore intelligitur) in gutture & faucibus quanta aderat siccitas à fuliginibus siccis per putredinem elevatis, tenaci illa pituita os semper erat oppletum, ut vix fari potuerit, & ubi diutius paulò vel per somnum levem brevissimum-que vel alià de causa ibi detineretur, tam tenax ab exurente calore reddebatur, ut digitis ore eam eximere necessum habuerit, multum negotii creabatur tonsori, ut fauces servaretundas, defenderetque ab alta putredine. Tandem longiore curâ evadit. Decumbebat juxta matrem & filia quatuordecim annorum, sed minus periculosè, partim quod natura robustior, partim quod venenum benignius, itidem caruit carbunculis & bubonibus, eorum loco obsita erat maculis multis flavis absque ullo graviore symptomate, brevi sanitati est restituta.

OBSERV. CVII.

Juvenis corripitur bubone sub axilla sinistra carbunculisque multis, XXVII.
tribus in brachio, duobus in crure, tantum sinistrum latus affectum Aug.
erat, acutè laborat, vigilat, delirat aliquot dies, in phrenesin ipsam ipsum lapsurum valde metuebamus, putredo magna, sitis intensa, aliquoties morti proximus videbatur, ægrè tandem convalescit. Cum delirio aliquid rationis adhuc ipsi superfuisse manifestò erat deprehendere, marsupium enim suum bonâ argenti quantitate impletum juxta se vel in lecto vel scamno positum ipse servabat custodiebatque, inde depromebat, quod mihi persoluturus erat, soltrum, & quod mireris, nec plus, nec minus, & quidem iteratò, quàm quo aliàs plurimi suos honorare solent medicos, certò non secus ac si sanissimâ mente præditus fuisset. Post multa adhibita remedia ense tandem secandus erat bubo, carbunculi quoque in tam grandes abscessus & sava abierunt ulcera, ut duodeviginti hebdomadas in istorum curatione insumserit Chirurgus, reliquereque tam turpes magnas cicatrices, ac si prægrandi aliquo tormento bellico fuisset ictus: superato morbo capillorum defluvium oritur, adhuc bene valet,
Sicq; nova & firma redière in pristina vires.

OBSERV. CIIX.

XXIIX.
Aug.

UNica filia, à peste, fratribus, sororibusq; omnibus mortuis, reliqua aliquot septimanas à suorum morte in infectis ædibus sana moratur, tandem etiam corripitur pestilenti hoc malo, vomebat sæpius, intruditur suppositorium, infunditur Clyster, epithema prægressis sudorificis aliisque alexipharmacis ventriculo opponebatur, verum frustra omnia, modicè æstuabat, vigilabat, de nullo dolore conquerebatur, carbunculum parvum in pectore habebat, qui nec ad maturitatem tendebat, nec discuti poterat aut siccari, lividus erat, qui color funestus plerumque est, multum operæ impendimus, ut servaremus unicam hanc Matris spem,

Sed nihil invito medicamina numine profunt,

Imò ne hilum proficiebant medicamenta, ita oppressus natus calor erat, ut in actum deducere medicamentorum vim nullo modo potuerit sed quasi torpida obliviscebatur omnis sui muneris.

OBSERV. CIX.

XXIIX.
Aug.

PRimarius quidam familiam suam in pagum ablegat, ut ibi liberiore fruerentur aëre, minusque à contagio tangerentur, Non diu ibi subsistunt, & ecce ancilla ibi ex bubone in inguine incipit agrotare. Illico mittit dominus rerum suarum satagens eò medicamenta, quibus utatur ægra, reliqui verò in magnis angustiis positi petunt consilium, num ibi morandum, an civici lares repetendi iterum sint. Posterius placet. Reversum iterum in civitatem nullum unquam incommodum senserunt. Ancilla etiam in urbem delata paucis diebus convaluit. Hanc venenū vel in corpore vel vestimentis secum urbe exportasse verosimilius est, quàm quod in pago ab omni contagio libero id contraxerit. Cito debet fugere, qui fugā sibi salutem quæsiturus est, post occasio calva.

OBSERV. CX.

XXIIX.
Aug.

VIdua, cujus maritus, Scholæ collega, paucas ante septimanas peste diem suum clauserat, eodem malo graviter affligitur, superato morbo succedit ophthalmia sicca utrumque oculum multum fatigans, rubebant intensè oculi, ardor aderat & pruritus, nec lumen poterat ferre, quapropter velamine oppanso illud arcere cogebatur. De secutura omnimoda cæcitæte valde angebatur, nihil ferè videbat. Vocatus lenexolvens ipsi impero, refrigerantia, humectantiaque ipsi præscribo non omisis ophthalmicis, tandem recepta luminis usura recepit quoque integram, quam pene amiserat, sanitatem.

OB.

OBSERV. CXI.

Virgo parvæ staturæ macriq̃ue corporis, viro tamen matura, corri- XXIIX.
 pitur horrore, dolore capitis, vomitu, in affinis sui ædibus, cum Aug.
 hæc accidentia ipsam invadunt, tum commoratur: verum cum
 ipsæ ædes minus essent spatiosæ propriisq̃ue domesticis sic satis re-
 fertæ, eodem vespere post crepusculum currui imposita pluvioso cœlo
 ad paternos lares vehitur, ibi lecti tepore excepta hausto sudorifero sudat,
 manè iterum egregiè, erumpit bubo in inguine satis magnus, maturatur
 processu temporis, sed aliquot septimanas periculosè decumbit, sanatur,
 verum tantam incurrit maciem, ut à plurimis pro phthifica judicata sit,
 quâ macie quoque elapso sesquianno periit.

OBSERV. CXII.

In Stoicorum paradoxis est, ei, in quo virtus sit, nihil deesse ad beatè vi- XXIIX.
 vendum, & solum sapientem divitem esse. Ita mihi videtur fuisse dives Aug.
 ille, qui aurum & argentum, cum ipsi offerebatur, non accepit à Sa-
 mnitibus acerrimis Romanorum hostibus *M. Curius, contentus vasis*
 suis fictilibus & rapis. Ita Aristides Atheniensis, qui cæsis Parthis totâ
que Græcia subacta victor quidem, sed pauperior, quàm profectus est, domum
redit, cum tamen facile opes accumulare ex censu Græciæ potuisset. Ita Pho-
cion, qui Alexandri M. ingentia oblata munera repudiavit. Et quid ita
inhianum divitiis? Sunt enim juxta Isocratem orat. ad Demon. magis vi-
tiorum quàm virtutis ministre, cum quod ignaviæ facultatem offerunt, tum
quod adolescentes invitant ad voluptatem. Et ut longæ vestes corpora, ita
immodicæ divitiæ animum impediunt, est in com. ad cap. VIII, Senec. de
Tranquill. animi quod caput meretur legi. Et

Dives divitiis non congregat absq̃ labore,

Non tenet absq̃ metu, non deserit absq̃ dolore.

Vir mediæ ætatis dives & avarus egenus corripitur lassitudine & tussi,
 aliis symptomatibus caret, cumq̃ue in corporis habitu nihil appareret
 pestilentis, contagium se accepisse, ut crederet, induci non poterat, ob
 membra hanc movendi ignaviam operibus suis domesticis, quibus aliàs
 noctes dies præter necessitatem tenaciter inhærebat, interesse minimè po-
 tuit. Vocor, curatur modo, quem alias observavimus, nec melius mul-
 tò, nec tamen pejus habet. Die quodam, cum manè ipsum inviso, res
 ejus adhuc mediocres erant, circa horam septimam vespertinam quan-
 dam me accersitum mittit, renuncio, me jam cænaturum, cursitationibus
 me ita defatigatum, ut vix pedem pedi præponere potis essem. Ille contra

instat acriter, ut veniam, esse de quibus necessario consilium exquirendum esset meum. Eo, propter Cordis anxietatem nihil illum mutatum offendo: tum quærit, num eo vespere sacram Eucharistiam sibi porrigi suadeam, annuo, eâ nocte moritur æger, qui se verè ægrotare non putabat, quemque nemo hoc malo moriturum unquam credidisset; ita tacitam improvidæ naturæ struit perniciem pestilens virus. Nunquam itaque securus debet esse vel curans vel curandus. Ipsi aliàs in more fuit, etiam hisce ipsis pestis diebus, foliis tabaci convolutis & crassè concisis pituitam è crebro, pituitæ metropoli, elicere, sed cessabat jam illorum operatio, unde pejus sibi divinabat, & biduum ante mortem urina omnis stetit, quod funestum symptoma, quoniam nihil molestiæ ipsi creabat, me celavit.

XXIX.

Aug.

OBSERV. CXIII.

Sutoris cujusdam domus multum contagii susceperat, & erat valde angusta, omnes, qui in ea sunt, extinguuntur, præter unicam filiam majorem natu, quæ superat morbum. Dominus sive Paterfamilias magnitudinem periculi animadvertens proripit se in aliam domum extra portam suis domi relictis. Ultimo tandem etiam uxor corripitur, curatur à Collega meo, ut & reliqui omnes, quo extincto itur ad me. Termino acutissimorum morborum absoluto, purgo eam clementer, melius habet, valde impurum corpus erat, in vado nos esse credebamus, in eo statu permanebat aliquot dies, mens integra erat, urina, quam è longinquo monstrabant, turbida erat, & talis mingebatur permanebatque, nec mutabatur ad quæcunque etiam medicamenta, loquitur ad ultimum vitæ atticulum, insperato decedit. Fortè ita corrupti fuerunt humores sanguisque, & universum corpus, ut resistere ne tentare quidem potuerint corporis vires, quando enim vegetæ adhuc istæ sunt, lucta major cum morbo est, quàm cum omnia se dederunt.

XXIX.

Aug.

OBSERV. CXIV.

VIR procerus & robustus, in ipsoque ætatis vigore constitutus vespere cum uxore lectum petens alget præter solitum, sequitur nocte calor multus, manè statim clysterem injici curo, nil operatur, supponitur suppositorium, respondet alvus voto. Primo die multum dormit, à sudorifero in somno sudat optimè, cum haberet corpus in sudorem pronum, dolor capitis nullus, nullum *ἔξάνθημα*, non vomitus, non delirium, præter lassitudinem totius nihil incusabat. Altero die lectum

lectum permingit involuntariò, lotium erat nigrum, quod in hunc usque diem ut mihi nuper retulit vidua, ex linteis elui omnino non potuerit. Tercio die manè iterum ipsum inviso, subridens me accipiebat, & alterâ manu panem butyro illitum tenebat esturus illum. Latabamur omnes, ad vesperam inopinatò moritur.

OBSERV. CXV.

VIR ætatis statum vix affecutus bubone sub axilla sinistra corripitur, XXXI. *Aug.*
Illico accurrens uxor viri amantissima magno ejulatu subitum auxilium poscit, dicens, si sub dextra lateret bubo axilla non tam pro-
perè cordi noxam inferre posset. Deprehendo tumorem valde protuberantem, quod bonum signum est, pulsus magnus, verum non ita celer, mador totius corporis sentiebatur. Motum naturæ juvo propinato sudorifero ex Acet. Bezoart. Aq. Nuc. sudorif. cum bolo armen. & Terr. sigillat. momento, me non jubente sudat per integrum diem, minor fit tumor altero die, pulsusque remittit, julepum refrigerantem cum Alexipharmacis mixtum sumit, caput dolet, vigilat, iterum sumit priorem potiunculam sudoriferam, belle procedit sudor, & cum *εὐπορίᾳ*, pigrior alvus balano sollicitatur, sensim evanescit tumor capitisque dolor, imò omnis morbus. Num verum, sinistro latere propter cordis viciniam affecto periculosius ægrotare homines, quàm dextro? Ita videtur, Hippocr, enim *ἐν δεξιῇ* plus caloris & roboris esse quàm sinistris docet. Verum Cor in medio situm est, saltim mucrone ejus ad sinistram declinante. Vide sis quæ accurate in hanc rem scribit *ὁ Πάρις* Conringius in verè aureo suo de Igne animali libro cap. XX.

OBSERV. CXVI.

Ancilla non juvenis carbunculo corripitur in mamma sinistra cum aliis gravioribus symptomatis, quæ toties repetere supersedeo, ex XXXI. *Aug.*
superioribus illa patent. Mortem minabatur ille carbo totam ferè mammam ambitu suo complectens. Cum maturatur abscessus absceditque caro corrupta, ulcus tam amplum tamque profundum relinquit, ut costas subjectas conspicias. Multâ Chirurgi opera medicamentorumque internorum usu sanatur. Aliis, quorum cuticula tantum obsideri carbonibus videbatur parvi que erant, iidem fuerunt funesti.

OBSERV. CXVII.

XXXI.

Aug.

Adolescens scholasticus statim cum ipsa pestis invasione delirat, carbunculos habet, calor intensissimus, sitis ingens, ea ipsa nocte fit phreneticus insomnis est. Statim, ac quis peste correptus est, quenquam delirare non memini me observare, præter puellam in obs. CXXIII. Conjicio ipsum vel pridie esse infectum, non sensit autem præ incuriositate animæ stupiditate, & morbo ex insidiis ipsum adorientem, quæ juncta isti ætati plerumque esse solent. Tertio die ad se non rediens vita decedit.

OBSERV. CXIIX,

XXXI.

Aug.

Puer duodecim annorum, unica parentum spes, solatiumque in hoc miserrimo rerum statu unicum, (ceteri omnes fratres sororesque Charontis cymbæ erant illati, superaverat saltem uterque parens, graviter tamen etiam correpti, vix superabile malum) quem parentes, ut tutior à contagio esset, à se dimiserant, inque Affinis domum ad aviam ablegaverant, vespere sub crepusculo præferente ipsi ancillâ lucernam ad me venit sciscitatum, quale esset, quod in gutture, sive ipso Adami pomo, uti vulgò vocatur, (persuasum enim illi est pomi fatalis partem remansisse in Adami faucibus expœna divina, & ad posteros propagatam, est autem nihil aliud quàm cartilago Laryngis prima, græcè *ὑποειδὺς* dicta, virisque magis quàm mulieribus (ob pulchritudinem) familiaris) haberet tuberculum. Considerans Ego tangensque illud spectante filio meo XI, tunc annorum statim deprehendo bubonis esse rudimentum, atque illicò, ut domum repetat letumque jubeo, præscribo sudoriferum, à sudore alterans sumere jubebatur. Primo manè iterum mittunt me accersitum anxii parentes valdeque intumuisse hanc nocte collum indicantes. Observo non tantum Adami pomum multum increvisse, sed & sub mento bubonem radices suas sparsisse & video & manu palpo. De præscripto illum a sumere jubeo, quantum sorbendo deglutire poterat, alteratur corpus egregiè, febrisque remittit, tunc in Analepticiis cura multa fuit. Vocato Chirurgo discutientia initio adhibentur intus & extus, ut caveamus ulcus, quod ex maturantibus necessario successurum videbamus, sed sine fructu. Mutato itaque consilio ad maturantia omnis dirigebatur opera, quibus per plures dies usi eò perduximus refractarium tumorem, ut cum bonis ægri rebus tandem ruptus sit, atque ab utroque aspera arteria latere versus gulam in ulcera desierit non absque præsentis ægroti peri-

periculo, quibus rectè curatis collum faucesque ex orei faucibus Deo benedicente feliciter extraxit cumque parentibus suis adhuc bene valet.

OBSERV. CXIX.

CHirurgus, quem præfecerat Magistratus noster huic operi, ut quos- *I. Septem.*
cunque ægrotantes visitaret, eosque quantum posset, juvaret, ex
liene, ut putabat, cepit ægrotare. Vocatus ex pulsu, virium pro-
stratione, calore, vomitu, contagio ipsum affectum dico, quod, ut
crederet, ægrè ab ipso potui impetrare; quia enim nec carbunculus, nec
bubo in corpore apparebat, atque aliàs lienis affectui fuerat obnoxius,
vetus malum hæc sibi creare accidentia firmiter credebat. Verùm succe-
dente lipothymiâ, & fluxu colliquativo nimis serò sapuit morsque ipsa fidè
tandem ipsi extorsit. Audio ipsum valde affectâsse stygiû istum liquorem,
quæ Aquam vitæ (mortis penè dixeris, quam vis suâ non careat laude) no-
minant, eumque in magna quantitate ingurgitâsse, ad ebrietatē etiam usque,
partim ne vacuo ventre in publicum prodiret partim ut animosior eo fa-
ctus imperterritus obviâ iret hosti etiam præsentissimo, quo cum omni
horâ congregi officium suum ipsum compellebat. Quanto rectius, si *So-*
cratem fuisset secutus, qui in ferocissima Attica peste solâ sobrietate se immunem
prestitit, ut testatur *Ælianus lib. V. variar. c. XV.* Multos sæpe potare vidi
ejusmodi tabernas præteriens adustum illud vinum, haud dubiè magno
corporis nocumento vitæque dispendio. Hoc tamen certum, quibus
consuetudo est quotidie tales ardentis sumere spiritus, nihil aut parum
nocuisse.

OBSERV. CXX.

INter signa infectionis non immerito refertur & somni libido, nec ta- *I. Septem.*
men *fato concedunt omnes, uti Jul. Palmarius credidit, qui sopore torpe-*
scunt. Adolescens XV. annorum initio morbi miro dormiendî te-
netur desiderio, non horruit nec doluit capite, bubo aut carbunculus
nullus, ideoque parvam sui curam habet. Mater tamen altero die sudori-
ferum ex Rob. Sambuc. & semin. nasturt. hortens. cum aq. Cardbened. &
aceto ipsi porrigit, adhuc tenetur somni dulcedine, incipit delirare, vo-
cor, deprehendo in utroque inguine bubonem & in genu flexura carbun-
culum, aliquot dies mens vacillat non omnino discussâ somni gravitate,
affiguntur bubonibus cucurbitulæ sine scarificatione ad eos protrahen-
dos, res bene succedit, interim diarrhæa supervenit aliquot dies durans,
calor multus, sitis, quam & aliàs in alvi fluxibus ferè semper experimur,
val-

valde urget. Bubones & carbunculos ad supurationem veniunt, magnâ cura & labore sanationem recipientes, primumque circa Bacchanalia anni sequentis cura absolvitur omnis, cruris affecti ingressu recto nonnihil vitiato.

1. Septem.

OBSERV. CXXI.

Collega Scholæ Catharinianæ laborat peste, carbunculis & bubone affligitur, non usque adeo periculosè decumbere visus est tum sibi tum aliis, ideoque absque medico curatur. Post aliquot dies in subsidium venio sollicitatus, deprehendo omnia in mediocri statu, verùm latebat anguis in herba, ultimum enim quod mihi aperiebat, omnium primò sui curam poscebat, eratque *ισχυρία* lethalis, querebatur se jam per duos tresve dies ne guttam lotii emisisse, deque omnimoda urinæ suppressione multum anxius istius unicam promotionem sollicitabat; Verùm irrita omnia, sexto vel septimo ab urinæ cessatione cessavit & æger ulterius esse inter homines. Consideratione certe dignum, quâ factum, ut non urserit urina, diutius & ad aliquot dies retenta. nec abdomen aut saltem pubis regio in tumorem abierit, nec increverit calor totius, de nulla molestia alia conquerebatur. Causam hujus in peste suppressionis innuere videntur *Holler. & Desider. Jacotius in Comment. in Hippoc. Coac. §. V. l. I.* *Hollerius* ita inquit: *Contingunt urina retentiones in acutis emortuo calore vesicæ & perfrigerato nervo, qui in vesicam distribuitur.* *Jacotius* pluribus ejusmodi *ischurie* causam explicat, recidit tamen res ad idem merentur illa legi l. c. huc transcribere illa nil attinet. Urinæ suppressæ causa varia recitatur ab *Heurnio in Comm. Aph. Hipp. Aph. LXXXII. §. IV.* Addit ibidem in fine: In omni suppressione urinæ, sudoris, vel diarrhææ sit palindrome ad venas, symptomatica que translatione cerebrum afficitur, si tres quatuorve dies supprimantur. Quorum tamen nullum hîc evenit, neque in aliis, quos hoc accidente correptos novi.

OBSERV. CXXII.

7. Septem.

Ad pastorem quendam vocor, quò cum venio, mitius adhuc cum ipso agi deprehendo, nec enim dum gravia symptomata animadvertuntur, pulsus celerior erat, capitis dolor paucus, valde tamen languabat, appetitus sicci omnis defectus, sitis contra auctior, somni vacuitas, bubo in inguine parvus. Satis diligens erat aliàs suæ sanitatis observator, mollioris tamen animi corporisque. Et quia incolumitati suæ optimè consultum voluit, istius debitæ curæ fructum uberrimum tulit,

lit, reconvalescentiam scilicet à morbo aliàs fatali : cumque corpus suum à pravis humoribus purgaverit præservantibusque nonnihil se munierit, medicamenta etiam finem suum eò optatiùs assecuta sunt. Ipso vespere eliciebatur sudor, die sequenti manè secabatur vena, iterum sudat, bubo ad maturitatem non poterat disponi, alterantia cordialia integram tandem absolverunt curam, atque ita sanitati suæ redditus eadem adhuc fruitur. Hic primus est ex omnibus nostris verbi divini ministris, qui pestilentis aliquid passus est, cum tamen & illi multum sæpe sæpius periculi in porrigenda moribundis sacra *εὐχαιεῖα* subierint.

OBSERV. CXXIII.

VIdua Juvenis honesta proborumque morum duas filias habebat. *I. Septemb.* alteram octo, Sex alteram annos natam : natu major in domus areæ cum matre sedens absona & ridicula loqui incipit de nihilo aliàs quæstæ. Mater sagax aliquid subesse suspicans mali statim me accersit, præscribuntur sudorifera, alexipharmaca, alia : sudat, post sudorem bubo in gutture, duo carbunculi, alter in maxilla, in fronte alter erumpunt, increfcit multum ille in gutture bubo & calor, parum, & cum tolerantia vomit, quarto die tentatam prius aliquot epilepticis insultibus ipsam in ipso vite apparatu vita destituit, ut loquitur Seneca l. de Brev. vita cap. 1. Dum in agone hæc est & altera natu minor corripitur, calor multus est, & nihil in corpore, quod oculis usurpari potuisset, apparuit, saltem de dolore sub axilla conqueritur, plus evomuit alterâ, & hæc ultimis morbi diebus epilepsiâ agitatur, injicitur clyster, educitur copiosa nigra materia, sub mortis hora paucæ lividæ emergebant maculæ. Iterum dieo : Epilepsia, quæ protracto morbo supervenit, periculosior est, & ἐπὶ τὸ πολὺ lethalis, secus illa, quæ cum incipiente morbo incipit, hæc sæpissimè terminatur ad salutem.

OBSERV. CXXIV.

DIxi non semel, multos, cum sategerunt nimis curiosè, declinare pestem foribusque suis arcere omni arte, in ipsa viscera traxere eam, viribusque ex immoderato prophylacticorum calidorum usu fractis admissio hosti amplius resistere non potuerunt, sed arcem vitæ, Cor. ipsi dedere coacti sunt. Civis juvenis procerus & macer, calidæ & siccæ constitutionis, valde anxius de peste vitanda aliquoties consilium à me petiit, verbis scriptisque id ipsum ipsi dedi, additâ maximè necessariâ

K

cau-

cautione, ne nimium calidis, quibus illum delectari sciebam, uteretur. Verum is nauci, quod dederam, consilium habens aliud conficit remedium, quod sibi communicatum agebat cum gloriosa commendatione & infallibili sperato successu. Concinnatum id erat ex multis calidissimis pipere, calang. Zed. Angel. Bol. armen. terra sigill. &c. hæc in spir. vini infusa iterum destillat, & non tantum suæ domui, verum etiam aliis destillato isto prospiciebat, quotidie de hoc sumebant & sudabant. Verum enim verò tantum abfuit, ut præservare se eo modo potuerint, ut etiam omnes ejus domestici pestilens virus affatim hauserint, eoque omnes sint mortui minima saltem puellâ paucorum annorum ægrè ex morbo convalescente. Vir iste, cum inficitur contagio, jubet me accersiri, invenio ipsum in arca ambulantiem & plorantiem atque in maximis angustiis constitutum, non tam ob morbum, quem jam contraxerat, quam deplorandum domesticum statum, quidam enim suorum jam obierant morte, uxor in agone erat, liberi superstites omnes decumbebant: detracto indusio in humero anthracem mihi monstrabat boni coloris, nullum aliud ἐξάνθημα in corpore ejus memini me vidisse, vires omnes attritæ ex sæpius iterato sudamine, brevi moritur. Monitis meis quod non paruiisset serio, sed serò, dolebat.

OBSERV. CXXV.

II. Septem.

ADituus triginta annos paululum superans gravissimè affligitur peste, carbunculi & bubones erumpunt absque alleviatione, somnolentus erat, taciturnus, calor multus, delirium, absque omni cibo, ut plerique omnes, vivebat.

Accensamq; levant pocula nulla sitim,

febris putrida magna erat, superat tandem morbum ruptique bubones & carbunculi longo tempore consolidantur. Cum cepit hic melius habere, uxorem ejus apprehendit contagium, etiam non absque periculo, carbo in mamma, bubo sub axilla, ingens ex ingenti calore sitis,

Hausta nec alliciunt dulces medicamina somnos,

ad exhibita optimè sudat, facies rubebat ex magno æstu, vi morbi insueto naturæ ordine menses exprimuntur, evadit & hæc tandem ferè ineluctabile malum.

OB.

OBSERV. CXXVI.

Senatoris cujusdam uxor multâ oscitatione & pandiculatione insuetâ corripitur, sequitur capitis dolor artuumque gravitas, nihil erumpit à sudorificis expellentibusque aliis in corpore, quàm parvus in inguine bubo magnitudine nucem regiam vix æquans, plurimis præternaturalis calor ægram fatigat, insomnis ferè est, alterantibus frigidis remittit calor. Quodam die me inconsulto ad expellendum magnificiendumque bubonem vinum bibit enulatum, quod multis in more positum erat, increscit ita calor, ut de vita ejus ferè actum fuisset, non fit major bubo multò minus suppuratur, sed pedetentim resolvitur in auras, pristinamque recuperat ægrota sanitatem. *II. Septem.*

OBSERV. CXXVII.

Quartanam Scandalum vulgò dici opprobriumque medicorum, *III. Septembris.* vel quilibet mediastinus novit. Verum non tam sæpè sui ratione ita dicitur, quàm ipsorum medentium culpa, aut ægroti aliquo errore, dum enim obstinatè nimis & severè ipsam tractant, voluntque in semine jugulare pullulascentem sobolem τῆς ὑγείας Consulti, sæpe ipsum quartanarium jugulant, quæ tamen febris ex se *neminem jugulare* dicitur *Celsi* effato, & testimonio *Hippoc. l. I. Epid. sit ἀσφαλές τος πάντων καὶ ῥήϊος*, securissimus omnium & facillimus. Mitiùs secum agi postulat illa, solumque raparum decoctum ex Cratonis sententia, aut balneum aquæ dulcis (non neglectis tamen aliis per ἐπίχρησιν adhiberi solitis) sæpe numero plus efficit, quàm vel ingeniosissimè excogitata & vi ignis sæpe sæpius subtilior reddita mixtura, Elixir, Tinctura, aut quid aliud, licet magnificè talia commendentur plurimis. Puer Victoris X. annorum laborat quartanâ integrum penè biennium, quæ tamen ætas isti humori producendo inconveniens existimatur, etiam tum eâ affigitur, cum pestis sementem suam hîc amplissimè projecerat. Quando corripitur puer peste, tunc cessat quartana per tres septimanas, quibus integris cum peste ipsi res erat, elapsis tribus istis pestilentialibus hebdomadis repetit quartana suum typum continuatque in quadragesimale usque tempus, quo tandem miserâ morte diem suum claudit. Post superatam pestem à Cachexia per febrem inducta venter sensim intumescit non advertentibus parentibus, cum multum distenderetur abdomen rogatu cujusdam Consuliseo ipsum contemplatum, instar Ascitici jacebat, penis & scrotum intumuerat, medicamentis applicitis detumescit aliquo modo *K 2* *puden.*

puendum, ut & abdomen. spes certa recuperandæ valetudinis erat, & ecce tumidus umbilicus aperitur sponte, magnamque puris & sanici copiam profundit, succedit gangræna cruris. altero die insperata mors. A latente musculorum abdominis abscessu pus profluxit.

OBSERV. CXXIIX.

III. Sept.

Contrectare pulsum aut corpus, cum sudant ægri, aut malitia morbi madescit cutis, summè periculosum est, tum enim patent pori, exituro contagio panduntur fores, facileque illud in contrectantis cute, cum viscidum quid insit madori, hæret, & brevi mediantibus venis & arteriis universo communicatur corpori. Tale quid sibi accidisse etiam in mitiori febre maligna narrat Cl. Simon Paulli in *παρεμβάσει* sua. Simile exemplum in Peste observatum recitat Helmontius. Ex eadem causa & eodem planè modo pestem lethalem se contraxisse aiebat Collega meus Jordanus cujus observ. CV. meminimus, in exploratione enim cujusdã infecti pulsus sensum quasi formicantem se percepisse in digito narrabat, cui successit corporis languor & virium prostratio, ut fusiùs dicto loco docuimus. Pastor in primo senio constitutus & cacochymus, quales omnes Senes prædicat Fallop. l. de Ulceri, c. VII. dum cuidam morte præ foribus ejus operiente sacram *ἐυχάριστον* porrigit, ægerque abiturientis manum manu suâ sudore fatali madidâ arctiùs comprimit, metus incutitur Pastori verèque se infectum planè opinatur. Domum itaque properans illico curat me accersiri, quò cum venio, pulsum nonnihil celeriore deprehendo, in cute nihil observo, unicum manûs digitum aiebat, molestè & impeditè moveri. Appono vesicatorium carpo, ligatur digitus, emplastro defensivo brachium defenditur, materia pestilens per venas ascensura intercipitur, sudat, manè melius habet, ut etiam postridie in æde sacra sacris præesse potuerit. Diebus paucis interjectis alio afficitur malo, podagra nempe & doloribus ventris scorbuticis,

Mortem orat, tædet cali convexa tueri.

Tertiâ vel quartâ septimana onerosi corporis vinculis exclusus ad cœlum suum & speratas beatorum sedes migrat.

OBSERV. CXXIX.

III. Sept.

Virgo robusti & compacti corporis durorumque lacertorum magno bubone laborat in inguine, æstuat,

Nec cibus ora juvat, nec mulcet lumina somnos,

Bene sudat, ficcioris alvi est, menses prodeunt morbi vehementiâ, quo-

quorum tamen fluxum ante quartum supra decimum diem perpeſſa erat, divina ope & medicamentorum diligenti uſu ægrè tandem evadit rupto abſceſſu conſolidatoque.

OBSERV. CXXX.

Viginti annorum virgo mediocriter laborat, naſceat, vomit interdum, carbunculos & bubonem habet, mente bene conſtat, parum dormit, medicamentis, quæ ægrè ſumebat, parum proficitur, ſecatur vena mox initio, nec bubo, nec carbunculi ad maturitatem tendere videbantur, imò potiùs livebant, ſubſidebantque, ex aſtantium numero nemo ipſam hoc morbo morituram opinabatur, quæ tamen præter exſpectationem inter loquendum exſpirat placidè: *IV. Sept.*

OBSERV. CXXXI.

VIR conſtantis ætatis magno aqualiculo onuſtus horrorem patitur, (rigorem non me obſervare memini) ſubſequitur levis capitis dolor, ſtatim de ſua præſervante portione ex vino, vel etiam ſpiritu vini multis aromatibus calidiſſimis imprægnato, quam plurimi irreparabili ſuo damno, ut ſupra notavi, biberunt, doſin ſumit, & lecto ſe committit ſudorem exſpectaturus. Verùm ſtragula lectique operimenta ob corporis molem non erat ferendo, multo minus ſudorem, quo tamen in ſtatu ſanitatis tantum non diſſiſcebat, prolicere potius erat, hinc altero die cum vocor in magnis anguſtiis ipſum offendo, altè ſpirabat, circa caput ſaltem ſudabat, qui ſudor fallax admodum eſt, & hîc, & in aliis morbis acutis juxta *Hipp. Aph. IV. ſ. VIII.* ſitiebat valde. Præſcribo portio- nem refrigerantem alexipharmacam, & ſuppoſitorium ano indendum: Sequenti die res ejus in melius vergere videbantur, aſt quia medicamenta negligebat, ſubſequebatur mentis emotio, ſomno profundo tenebatur, ulterius nil potuimus efficere, ideoque brevi mortuus eſt nullo vel bubone vel anthrace in corpore apparente. *IV. Sept.*

OBSERV. CXXXII.

Cujusdam Uxor corripitur contagio, æſtuat valde, bubonem in inguine habet & carbunculum in humero, ſtatim loqui deſinit, in ſomnum perpetua proclivitas, jacet diſjectis membris, qualis decubitus in malis ducitur *Hippocr. Apoplecticâ* non erat, quia poterat ſe movere, difficulter tamen ſpiritum ducebat. Secabatur vena, glans ſupponere. *IV. Sept.*

supponebatur alvo, cordialibus alexipharmacis res omnis agebatur, sed in cassum omnia, corpus nihil movebatur ad medicamenta, sed tanquam evictum victori cessit longumque vale dixit, viro, qui vehementer etiam atque etiam ipsam deperibat, tristissimo relicto.

OBSERV. CXXXIII.

IV. Sept.

Cujusdam clari Consulis vidua, crassi corporis & valetudinarii, doloribus imi ventris affligitur cum ructibus multis, credit consuetum sibi affectum hoc accidens creare, cum multoties ex utero flatibusque uterinis laboraret; Et cum nec horrorem passa esset, nec quid præter naturam in corpore appareret, nota & sueta hætenus remedia tentat. Altero die caput gravatur, crus alterum dolere, dum extendere illud conatur, incipit, me, ad se ut veniam, ancillam petitem mittit, Quam primùm possum ex amore in laborantis defunctum maritum, qui dum vivebat, erat mihi magnus Amicus, eo ad illam visendam, statim apparebat pestilenti contagio ipsam decumbere, pulsus languidus, vires oppressæ, conquieverant ventris dolores, parvus in inguine bubo tangebatur, ad sudandum vires non sufficiebant, tertio die morbo absumitur. Ita clanculum obruerat vires virus pestilens & sub specie noti morbi, quod pluribus obtigit, ipsam invadit.

OBSERV. CXXXIV.

IV. Sept.

Decem viri cujusdam servus robustus carbunculis carbonibusque inficitur, secundo die vehementer incipit delirare, fore se effringere, discindere indusium, lectum omnem hinc inde in cubiculo projicere: nonnunquam quasi se surripiens sub sponda nudus se abscondit, & multa alia abscondita agit, ut Ego ipsi appropinquare nunquam fuërim ausus, porriguntur ipsi medicamenta, quæ nonnunquam assumebat, quandoque rejiciebat; nihil proficiebamus, ideoque sibi relictus, & ne vim corpori inferret, bene custoditus tandem carbonibus bubonibusque sponte ruptis feliciter sanatur.

OBSERV. CXXXV.

V. Septem.

Honesti cujusdam civis domus salubri sita loco & satis spatiosa multum veneni contraxerat, ita ut omnes sex liberi & duæ ancillæ peste correpti eâ extincti sint. Omnibus his mens manebat integra & expeditè loquebantur, nec de doloribus ullis ulla querela erat, non vomebant, carbunculi nulli, bubones quibusdam in inguine altè latebant.

bant. Cuidam ex illis parva pone aurem parotis erat, parum dolebat, tertio morbi die inter preces non advertente patre placide æternum obdormit. Alius paucis ante obitum horis Epilepsia correptus discedit ex vita. In filiarum una hoc erat notabile, quod cum biduum decubuisset, quasi superato morbo poscit cydonia mala, quibus aliàs fortè delectabatur, non tamen porriguntur ipsi, altero die de nova cordis anxietate queritur, vomit merum sanguinem concretum longitudinem digiti excedentem, parva intercapedine interjecta ad eundem modum vomit, instantem prædicebat vomitum, & ejusmodi sanguinis vomitio quiquies vel sexies ægram exercuit, postea inadvertenter blandam exhalavit animulam. Unde hic sanguis? In ventriculo concrevisse illum & in talem figuram coivisse extra dubium est, ex qua autem corporis parte primùm provenerit, non certò possum *τοχαλῆσαι*.

OBSERV. CXXXVI.

Scholasticus quidam juvenis parotide laboravit, tertio die mortuus *V. Septem* est. Ita & discipulo ejus novem annorum dextra colli pars sub aure intumuit valde, itidem tertio die extinguitur. Soror XV. annos nata continuo vomitu laborat, mente mota erat, in inguine bubonem magnum habebat, qui suppurabatur, aliquot mensibus non fuit consolidatus. Alter filius laborat per multos dies & vigiliâ & delirio, inguen alterum bubone obsidebatur, maturatur, æstuat æger multum, conservatur.

OBSERV. CXXXVII.

UXoris cujusdam ingenui Civis legitimus partus terminus instat. *VI. Sept.* pridie ante partum carbunculum accipit absque ullo alio graviore symptomate, altero die feliciter parturit, bene procedunt lochia, pejus habet, sudationibus nullus locus, cordis anxietas magna, somni carentia, paucis diebus moritur, relicto infante, qui adhuc, dum hæc scribo, bene valet. Cùm quodam die eam inviso, maritus ostensâ macula in pectore quærit, quid id sit? respondeo carbunculum pestilentem esse, moneoque ut sibi caveat ab externo aëre, lectoque se committat ad sudandum. Ille perterritus reponit, se jam biduo ipsam habuisse, monito tamen parens lectum petit, medicamenta idonea sumit, omnia ad pejus declinant, ex conjugali amore ad Conjugem suam pergit juxta eam in lecto eodem cubans, ægrè ab latere ejus avelli poterat, delirium cum risu ipsum continuò agitat, insomnis est, bubo in inguine erumpit, nec

nec bubo, nec carbunculus ad maturitatem tendunt, tandem fatis cessit, cui omnes dies longiores precabamur, parente Consule Sene maestissimo relicto, qui orphanos istos pusillos adhuc sustentat educatque liberaliter & paternè.

VI. Sep.

OBSERV. CXXXVIII.

Aditui filia annos XIIX. nata horrore corripitur levi que capitis dolore. statim succurritur ei medicamentis, secatur vena, largiter sudat, nihil in corpore, quod vel tactu vel visu deprehendi poterat, exit, crus sinistrum universum intolerabiliter dolet, adinstar Arthritidis scorbuticæ, præter dolorem nihil in eo conspicitur, cutis reliquæ cuti incolor, apponebamus cruri Empl. vesicatorium, sed nihil præter serum subcutaneum extraximus. Non lethaliter visa est decumbere, verum indies decrecentibus viribus, fractis partim continuis doloribus, partim veneni vi, omnia ad interitum spectabant, qui etiam septimo ab invasione morbi die obtigit puellæ, parentibus suis charissimæ.

OBSERV. CXXXIX.

VII. Sep.

Virgines duæ Patriciæ eodem tempore peste laborant non admodum periculose, altera in mamma carbunculum habet, in inguine altera bubonem, suppuratur carbo, sed non atque exedit carnem, diu manet apertus tenui sanie madidus. Bubo ad maturitatem perducere non poterat, tamen vesicatorio non nihil humoris extraximus, longo tempore anxiam tenebat hic tumor virginem & matrem pro filialibus suis maxime sollicitam. Absque Chirurghi manu curatur utraque præscriptis Empl. & unguentis ad rem accommodis, adhuc bene valent. Hanc aliter ferè decumbebat in ipsis illis ædibus ipsarum ancilla, quæ etiam non multâ ope restituta est, solus Pater, ut erat à medicamentis alienus, ita ferè me accersiri voluit, tertio nempe primum die, soporosus erat, nil loquebatur nisi interrogatus, præter carbunculum nil meminisse in corpore fuisse notatum, non discutitur somnus profundus, moritur.

OBSERV. CXL.

VII. Sept.

Sutoris Coniux admodum obesa, sani alioquin coloris, horrore afficitur, capitis dolore, calore non adeo magno, bubo erumpit in medio femore multum negotii exhibens ipsi ægrotanti & nobis, nulla arte ad suppurationem eum perducere quivimus, ad dimidium an-

num

num ipsum gestavit, antequam ex toto evanescebat. Crassifere omnes interierunt, mirum quod hæc evaserit, cum mollioris sit corporis animique, humorum tamen vitiosorum pura.

OBSERV. CXL I.

CAnonicus Senior cum conjuge sua curru vehitur extra portam fortè in pagum quendam exhilarandi animi ergò, ad vesperam repetit lares suos, verum præter solitum fessus languidiorque, cumque descendente sole aer esset frigidior, isti adscribit horrorem, quem levem passus erat, nocte istac profundè dormit, manè vocor, adhuc dormit, mens erat integra, ex alto isto somno excitari non poterat, medicamenta, cum mortem non multum formidaret, parum curabat, in corpore nihil præter naturam apparebat. Erat vir crassi habitus, nec usque adeò laudabilis constitutionis. *VII. Sept.*

OBSERV. CXL II.

Primarii Civis filius communi invadendi modo à peste patitur invasionem, caput nempe dolet & horret, succedit magnus & æstuans calor, bubo erumpit sub axilla sinistra parvus, vigilat, suppressitur alvus, delirat, bis sudat, non melius habet, humescit alvus injecto clymate, calorque refrigerantibus mitescit. Dare somnifera ut parentes postulabant, initio consultò abstinuimus, exemplo quod pejus plerumque ægrotantium res exinde evaserint, datoq; soporifero in inexpugnabilem dormiendi necessitatem conjecti sint, vel quod per somnum se insinuavit penitioribus cerebri partibus virulenta materia, vel quod calidum nativum in somno citius oppressum virulentæ materiæ subigendæ vel expellendæ haut suffecit. Paucis, uti superius indicatum, phreneticis in parva dosi & in principio data, oborto nempe sudore, profuere. Bubonem ad debitam protuberantiam protrahere nequivimus, ideoque applicato vesicatorio & inuncto Elix. pestilent. Crollii cum partim *μαλακτικοῖς*, partim *ἀραιωτικοῖς* trium septimanarum spatio consumptus est absque suppuratione, atque ita æger integrè amissam penè sanitatem recuperavit. *IX. Sept.*

OBSERV. CXL III.

VIR modestus & probus circa panni lanei conficiendi rationem versans debilitate & doloribus capitis, quibus aliàs erat obnoxius, (vertigine sæpe corripiebatur) affigitur, lassitudinem patitur omnium *IX. Sept.*

mnium membrorum, non vomitus, non cordis anxietas, non carbunculus, non bubo. Fallax casus erat, quia tamen adhuc pestis latè grassabatur, dico ut peste affectum debere ipsum tractari, contra illi: & à sententia mea ferè dimoverunt me, jam secundus erat dies ab invasione, dumque ita disputabamus, vomitus succedit, petechiales maculæ, æstus circa præcordia, sudor ad caput, discussis istis bonam partem accidentibus tertio die melius habet, liberius respirat, parcius bibit, alacrius fit totum corpus. Quarto die vigilæ infestant, sudat symptomaticè, manet mens integra, sexto morbi die concedit fatis.

OBSERV. CXLIV.

X. Septem. **U**Xor juvenis sana marito suo in lecto accubans circa crepusculum matutinum expergefit, calore præternaturali è somno excitata excitat & maritum, ex eoque quærit, num & ipse ita caleat, ut suum corpus, contrarium dum percipit, terrore percellitur, seque peste infectam verè sentit, mox parvum tumorem pone aurem & tactu & dolore percipit, increscit, æstuat, vigilat, menses, qui debito tempore fluebant, sistuntur, subito omnes corporis vires collabascunt, ut eas servare in nullius fuerit potestate, redeunt menses, paucis horis ab horum reditu inopinato extinguitur. Maritus juxta eam dormiens nihil passus est mali, & in secundo conjugio adhuc bene sanus vivit.

OBSERV. CXLV.

X. Septem. **J**uris candidatus Clari medici filius laboraverat per integrum annum Quartanâ, medicè tractabatur à Parente & modicè, diætæque certæ se adstringere jubebatur, famemque interdum pati, nihil tamen isto vivendi genere effectum est. Filius ab obitu patris sui juris factus susque deque fert diætam, suoque indulgens genio & gulæ sine discrimine quæque ingerit ad satietatem usque, dulcia, amara, acida, cucumeres cum acetato, facilia coctu, difficilia, contra quam *Horatius* monet *Satyra II. lib. II. Carminum*, prout Versus isti superius in Præfatione sunt allegati. Quid fit? brevi quartanam jugulat iste juvenis isto liberiore vivendi modo, quæ, nese ipsum jugulatura sit, valde metuebat. Quartâ à febris cessatione septimana corripitur capitis dolore cum horrore, statim admonitus, quem hostem exceperat, ad me mittit consiliumque menm expetit. Evacuatis primis viis sudat optimè à sudore alterantia sumit, erumpit bubo sub inguine sinistro satis magnus, admodum ægrotat, elapsis tribus diebus melius habet, ad suppurationem visus est tendere abscessus, ideoque vocato

vocato Chirurgo cura istius bubonis committitur, ex aperto ulcere satis magna profluxit puris copia & diu, ab inflicto buboni vulnere tanti & tam immanes ipsum exercent dolores cruris affecti, ut manibus pedibusque reptitaverit in hypocausto. Hæc miseria non semel mihi movit scrupulum vel à ferro adaperiente bubonem, vel à turunda nimis altè intrusa, & hinc vel membranam vel nervum læsum dolores istos esse excitatos. Optimâ etiamnum gaudet corporis incolumitate.

OBSERV. CXLVI.

Eodem tempore laborabat & ipsius Soror plurimis pustulis in summitate albicantibus similibusque illis, qui in facie ex fervidiore epate & sanguine pullulant, præcipuè autem obsidebant collū, pectus & brachia absque omni alio graviore symptomate, ita ut in considerationem & sub curam apud ægram non venirent, quibus tamen visis iussa est secedere paululum & lecto se dare, ex præscripto dein sudorifero bis ter vé sudavit ex voto, & pededentim evanüere carbunculi omnes. Cum nitebatur brachium sinistrum attollere, dolebat id, & imprimis sub axilla, erupturi bubonis id erat signum, nihil tamen apparuit, sed illitis unguentis & oleis congruis disparuit & ille.

X. Septem.

OBSERV. CXLVII.

Mercator juvenis ægritudine corripitur & lassitudine totius corporis, de exanthematibus nihil apparet, non dolet caput, non vomit, parum tamen dormit, nec multum sitit, bibit cerevisiam, cui panem intriverat cum orbiculis Citri. Nil præternaturale in corpore notabatur quàm jactatio corporis frequens & inconditus decubitus, nunc situm lecti pedibus destinatum capiti aptabat, contra, ubi caput reclinare consueverat, pedes ponit,

X. Septem.

Ἄλλοτ' ἐπὶ πλευρὰς κατακείμενος, ἄλλοτε δ' αὖτε
Ἵππος, ἄλλοτε δὲ πρηνής· τότε δ' ὀρθὸς ἀναστὰς.

Nunc lateri incumbens, iterum post paulo supinus

Corpore, tum pronus, tum surgens, denique rectus, Homer. Iliad. α.

quod proprium agri est, nihil diu pati, & mutationibus, ut remediis uti secundum Senec. de Tranquill. animi c. II. Sciscitanti mihi instabilis istius decubitûs causam exprimere eam non poterat, nisi quod ad ventriculi superius orificium nesciens quid molestiæ se sentire ajebat. Nec sudoriferis, nec cordialibus potuimus liberare hominem ab incondito decubitu,

paucos post dies excedit è vita. Laborabat unà & ipsius famulus, ille nimium dormiendo insensile ferè corpus effecerat, non videbat, non loquebatur etiam interrogatus, sed trunci instar jacebat, brevi quoque sequitur herum multis carbunculis & bubone defædatus. Hic, ubi potus actu frigidi meminimus, non incommodum quæritur, an potus peste correptorum debeat esse frigidus, an calidus, aut potius tepidus? Actu frigidus placet, potus enim medicinales refrigerantes frigidi bibuntur, ut Julapia, cur non & Cerevisiæ tenues? Præterea calidis istis acciditur magisque rarefit calor noster naturalis, & effeminatur, potusque aliàs celeriter in nobis calefit, celeriterque διέρχεται, per corpus transit. Cùm contra ventriculus calore febrili æstuans, & viscera naturalia, partesque spiritales potius modico gaudeant contrariorum usu. Frigidum autem dum dico, intelligo illum, qui tam ἐνερχέται, quàm δυνάμει, & quidem πρώτος, id est, καὶ ἐαυτῇ ἑαυτῇ μέσσω μὲν δὲνός hoc præstat, ut has refrigerandi differentias notat Galenus X. meth. med. c. X.

OBSERV. CXLII.

X. Septem. **S**enator Sexagenarius statim dum corripitur omnis vis corporis dilabitur, anhelat, æstuat, vomit sanguinem, corrupti omnes humores videbantur, dolore nullo tenebatur, vigiliis infestabatur, sudorifera non poterat ferre, multo minus alviducum medicamentum ob lipothymias & subitam virium exolutionem, solis alexipharmacis & alterantibus ad tertium diem prorogatur ipsi vita, quâ probè functus (erat vir pius & honestus) reddit eam, qui dederat ipsam, immortalī Deo. Quo vix tumultu suo illato etiam vidua ejus inficitur, & quidem in labio superiore accepto bubone tam magno & informi, ut non modò universum malam dextram ad oculum & tempora usque deformaverit, sed etiam os ita distorserit, ut σπασμῶδι apparuerit, nec à quoquam agnosci potuerit. Brevi sequitur maritum.

OBSERV. CXLIX.

XI. Septem. **V**idua sexagenaria præter carbunculos patitur & bubonem, taciturna est & truculenta facie, acutè febrit, parùm dormit, medicamenta ægrè sumebat revomebatque sumpta: *Mentis emotiones taciturnas periculosas pronunciat Hippocr. in Coac.* Cùm propter mentis alienationem sudorifera imperare nequiremus, suppositoriis, & Alexiphar-

pharmacis res acta est, sed nihil proficiente ope medica, quinto die desit
esse inter homines. Ad unum omnes istius domus incolæ peste perie-
rant, ita sæviebat ibi pestilens virus.

OBSERV. CL

Viri primarii Patriciique uxor amantissima in ipso ætatis flore con- XII. Sept.
stituta parvo bubone corripitur sub axilla sinistra, quem omni
etiam ingenio, sive sudorificis, sive attrahentibus emplastris aut cu-
curbitulâ magnâ non poteramus protrahere, gravia symptomata
non habet, leviter videtur febrire, pulsus languidus erat, sudor nonnun-
quam circa caput erumpebat, somnus parvus, mente non movebatur,
elapsis paucis diebus expirat relictis tribus pusillis liberis etiamnum su-
perstitibus, nec memini quenquam in ista domo postea fuisse infectum.

OBSERV. CLI.

Vir ordinis Senatorii robustus & magnus corripitur horrore, dolo- XII. Sept.
ribus capitis soporiferis, (*κεφαλαλγικοῖς καρῶδεσι Hippocr. in
Coac.*) maturè discutitur sopor, bubo in inguine oritur, & carbo
in digito manûs dextræ minimo, hic verè carbo erat, instar enim
vivi carbonis urebat multumque doloris patienti inferebat, per vicem
sudorem optimè eliciebamus, æstuabat valde, sitiebat multum, bubo pro-
cedente tempore maturabatur, diuque apertus manebat, tandem conso-
lidabatur, superstiti adhuc Viro Camerario.

OBSERV. CLII.

UXor jam memorati Camerarii corripitur peste & bubonibus in u- XIII. Sept.
troque inguine, succedit diarrhæa tam larga, ut viribus exhaustis
multum de vita periclitaretur: quin & menstrua, quæ diu ante na-
turæ lege cessaverant, cursum repetunt desuetum, pro malo omine
omne hoc duximus. Initio bis sudavit, postea adhibita fuit tinctura ro-
sar. Bol. armen. Terr. sigill. nonnunquam & emulsio ex papav. alb. cum
aq. appropriatis, evasit feliciter periculosam hanc Charybdim. Alter bu-
bo longo tempore tandem ad suppurationem sponte pervenit, mulier
ista integrâ adhuc fruitur sanitate. *Hippocr. in Coacis: Multum aquosa
dejectio, non desinens, in acutis, mala: & præsertim si sitis abfuerit. Verum
sitis hîc satis ingens, ideoque minus periculosa aquosa dejectio.*

OBSERV. CLIII.

XIII. Sept.

Senator quinquaginta annos natus bubone in inguine inficitur satis magno pugnū æquante, nullum considerabile accidens experitur, appetitus integer serè persistit, quod non memini mihi aliàs observatum, edit, bibit, absoluto tertio die obambulat, bubonem curat emplastro Norimbergensium, quod & maturat abscessum & rursum consolidat. Et sic facillimè à peste liberatur.

OBSERV. CLIV.

XIII. Sept.

Ejusdem Senatoris filius XVI annorum febre pestilente corripitur, in corpore universo nihil notatur alieni, de difficili queritur degluti-tione, intra & extra collum nihil conspicitur, quod notabile fuisset, parùm dormit, mens ei manet immota, calor multus erat, fauces excremento pituitoso viscido scatebant. Angina occulta erat, oetavo die moritur. Non negaverim, quin Angina ad pulmonem versa sit, quod interdum fieri notat Hippocr. in Coac. dicens: Οἷς δὲ πυνά γχὴ ἐς τὸν πνεύμονα τρέπεται, οἱ μὲν ἐν τῇσιν ἑπτὰ ἡμέρησιν ἀπόλλυνται, *Quibus angina ad pulmonem vertuntur, quandoque in septem diebus pereunt.*

OBSERV. CLV.

XIII. Sept.

Mulier ultra dimidium gestationis tempus prægnans anxietates magnas, experitur, frequentibus vomitionibus, etiam inani vomendi conatu vehementer tentatur, admodum attollitur venter, vigiliæ vexant eam, corroborantia præscribuntur, nihil promove-tur vel morbus vel fatus, in immensum distenditur venter, moritur fatu haut excluso, cujus exclusioni tamen multum insudamus, cum bene certi essemus de ipso in utero extincto. Agitabatur non semel sermo de eji-ciendo fatu, ut matrem salvarem: nolui tamen proletariis istis & du-ris hominibus assentiri, cum valde dubium sit, & res anceps, matrem eje-cto vi fatu iri salvatum. Et quoniam hæc quaestio magni est momenti adeoque scitu digna, juniores medici de hac omnino admonendi sunt. *Quemadmodum autem maximum & præcipuum munus faminarum est, inquit, Ulpian. in L. queritur §. 1. D. de edilit. accipere & tueri conceptum, ita summum scelus est, abortui conciliando operam dare. Neque enim ab homicidio abit, ubi vita adimitur ei, cui non nos, sed natura deusq. illam elargi-tur.* Ne dicamus, qui Christiani sumus, de sanctissimo regenerationis lava-

lavacro, quo factus in peccato originali conceptus datâ operâ privatur. Canones etiam, qui abortum procurat, & sterilitatis venena exhibet, homicidam esse ajunt, & mortaliter peccare, caus. XXXII. quest. II. c. aliquando, & c. si aliquis X. de homicidio. Quo respectu in Synodo Constantinopol. VI. Can. XCIII. sancitum, tam eas, quæ propinant, quàm quæ assumunt abortiva, homicidarum penis subjiciendas. Ita Sixtus Pont. in Bulla, quam anno M. D. LXXXIX. publicavit, eosdem simpliciter puniendos sancit, ut homicidas, qui voluntarium homicidium actu patrârint.

An verò liceat promoveré abortum, si prægnans acuto aliquo morbo laboret, nec subveniri possit ægræ sine fætûs ejectione, quod quidam voluere, & an conceptum nondum formatum, siue animâ rationali nondum informatum sine crimine ad salvandam matrem elici posse, jam videbimus. Affirmant Canones capitale sicut ex literar, XX. de homicidio, XXXII. quest. II. cap. quod v. & cap. seq. Moyses. Silvest. Prierias verbo medicus, quest. IV. Navarrus in manuali c. XXV non LXII. Nec delictum capitale volunt Carol. V. Imp. Peinlich Hals Geriches Ordnung art. CXXXIII. & August. Elect. Sax. ordinat. part. IV. constit. IV. Verum enim verò omnibus hisce meritisimò opponendum illud Divi Pauli, Epist. ad Rom. c. III. non esse facienda mala, ut inde eveniant bona, quod istorum damnatio sit justa. Certum est, medicamenta phœica siue corruptoria, id est, ejectoria absque matris manifesto discrimine non posse adhiberi, ideoque rectius multò & commodius secundum D. Ambros. l. de Offic. si alteri subveniri non potest, nisi alter ledatur, neutrum juvare, & medicamenta talia tam matri quàm fætui sunt inimica.

De fætui non animato ita habe: ut abortu procurato vita tollitur animantis, ita nondum animato spes vitæ & hominis præciditur, arg. L. si quis S. qui abort. D. de Penis. Et conceptus iste dispositionem habet & potentiam proximam ad animam rationalem formamque ultimam recipiendam. Audiatur Tertullianus Apologet. Nobis homicidio semel interdicto etiam conceptum utero, dum adhuc sanguis in hominem delibatur, dissolvere non licet, homicidii festinatio est, prohibere nasci, nec refert natam quis eripiat animam, an nascentem disturbet. Homo est & qui futurus est, & fructus hominis jam in semine est.

Vide quæ commentati in hanc rem, sunt Ranchinus & Meibom. Comment. in iusiurandum Hippocr. & quæ habet Rodoricus à Castro de morb. mulier. l. III. c. XXII. Sennert, Prax. lib. IV. part. II. sect. V. cap. III. quest. V. Heurn.

Commento in Aph. Hipp. sect. III.

Aph. I.

OBSERV. CLVI.

XIII. Sept.

Omnis morbus acutus in gravidas incidens est funestus, inquit Heurnius in Commento Aph. Hippoc. sect. V. Aph. LV. quia si in curationem morbi incumbas, ipsum fœtum pessum dabis. Quod verum esse experta est & alia juvencula gravida, quæ corripitur plurimis carbunculis & petechiis, multum anxiosa est, somnus abest, hinc inde in lecto se projicit, per intervalla nares stillant sanguine, nihil levatur, ad quartum diem sic cum morbo colluctatur, tandem abortit, quo immaturo fœtu excluso excludit simul quoque ipsam animam.

OBSERV. CLVII.

XIV. Sept.

Puer septimum jam completurus annum nocte incipit ægrotare, manè vocor, invenio ipsum anxium, æstuantem, pulsus ipsius erat celer & magnus, nec carbunculus, nec bubo, nec maculæ ullæ in corpore conspiciebantur. Præscribebam pulveres cordiales expulsi- vos, sudor in tam tenera ætate largè fluebat medicamentis excitatus, par- tim etiam sponte naturæ, sitim aquis cordialibus è s. Acetos. Cardbened. Scabios. Borragin. cum Acet. Bezoartico restinguebamus, additis qui- busdam, quæ fermentationem nimiam sisterent, ut C.C. ust. præparat. Corall. rubr. præparat. Perlis præparatis. Res ex voto cessura videba- tur, omnesque omne sperabamus bonum, ast ecce, spe inopinatò cecidi- mus, tertio enim à morbi insultu die Epilepsia tam vehemens ipsum cor- ripit, ut tertio quartovè paroxysmo elegans puer parentibus suis deside- ratissimus vitam hanc suam cum altera commutârit.

OBSERV. CLVIII.

XIV. Sept.

Mulier peste laborans in inguinèque bubonem gerens graviter de- cumbit, calor magnus circa præcordia & faciem, quæ etiam inten- sè rubebat. Circa initia morbi, quæ fuere acta, ignoro, cum eo tempore medicinam ipsi non fecerim, sed postmodum vocatus bonam curæ partem in restinguendo immodico calore insumpsi, aliisque quæ ipsam urserant, accidentibus planè abigendis. Verum novus & non exspectatus successit hospes, affectus scilicet circa oculos & præsertim sinistrum, quo ferè nihil videbat, aëremque & lumen ferè minimè pote- rat, propterea oppansum pannum supra oculum gerebat, scintillulæ in oculis apparebant, non multum tumebat sinister oculus, cum calore rubebat. Correximus hoc iis, quæ sanguinem fervidiorem temperant, etiam

etiam appposito nuchæ vesicatorio ad retrahendam materiam ad oculum
jam fluxam & intercipiendam eam, quæ ulterius fluxura erat. Ægrè cu-
rabatur hoc malum, ut de lucis usura reducenda non semel dubitaverit
ægrota, quâ tamen etiamnum acutè videt.

OBSERV. CLIX.

Servus cujusdam mercatoris robustus non admodum periculosè vide- *XV. Sept.*
tur decumbere, præter lassitudinem totius corporis nihil incusat, al-
tero die bubo in inguine protuberat, edit patiens quandoque po-
mum assum, injussus tamen, vigiliæ quoque ipsum molestant, sed in-
terruptæ, calor ad tactum modicus, optimè ratiocinabatur, parum bibe-
bat, ita ut jurâsses hunc certo evasurum periculum. Sed, ecce, inter lo-
quendum contra omnium opinionem placide obit vix conspecto ullo
mortis signo.

OBSERV. CLX.

Vidua ætatis provectæ primaria superficiale saltem & levem sentit *XVI. Sept.*
horrorem, statim me accersiri jubet, ut erat rerum suarum satis cau-
ta, pulsus febrilis deprehendebatur, calor modicus, somnus mode-
ratus, parvus bubo in inguine oritur, aliud nullum grave patitur
symptoma, paucis usâ medicamentis convalescit bubone in auras evane-
scente. Jam tum duæ sæminæ juvenes ex illa domo terræ mandatæ erant,
& hæc septuagenaria vitæque satur superesse debuit.

OBSERV. CLXI.

Non minori fermè erat ætate Vir quidam Senatorii ordinis latine *XVII. Sept.*
quadantenus doctus, is doloribus ventris colicisque aliàs obno-
xius etiam peste corripitur, sed dispari eventu. Vocor, exponit
æger casum, omninoque se peste non laborare multis argumentis
probare conatur. Verum tantum absuit, ut me à sententia dimoverit, ut
etiam suo sermone me confirmaverit inscius. Dolores hi non erant
pungentes, non extensivi, nec fixi, sed potius gravativi cum lassitudine o-
nerosâ. Verum ille firmiter credebatur à Colica omne hoc esse, quod ipsum
molestabat, pulsus celerior justo erat, capitis obtusus dolor, somni va-
cuitas, decubitus instabilis, tertio die bubo parvus in inguine: tum seriò
in sententiam meam descendebat, sed serò nimis, paucis enim diebus e-
lapsis abiit ad plures.

OBSERV. CLXII.

Ancilla mea sarra & benè cænata cubito it cum liberis meis & *XVIII. Sept.*
muliere sene, quam uxor præfecerat liberorum custodiæ & servitu-
ti,

ti, nihil sequius cogitans securè placidèque dormit : circa diluculum ma-
tutinum mulieri adjacenti dicit : *ô Anna, femur alterum doleo, parvum-
que tumorem in inguine tango.* Surgens munia domestica obit, post
Conjugi mex aperit suum infortunium, illa statim de medicamento, quod
domi semper paratum habebamus, nonnihil ipsi porigit, sed illa flocci
pendens & morbum & medicamentum frequentat templum contra vo-
luntatem heræ suæ, ast in templo altius se insinuante veneno-syncope cor-
ripitur, vixque tamdiu inibi durare potest, quàm Sacerdos è suggestu de-
scendit. Maturè itaque domum jam claudicando repetens omnem fa-
ciei vividum colorem exuerat, atque ut jamjam moritura animi corporis-
que vigorem amiserat, quæ aliàs rubicundi erat coloris & sanguinei habi-
tus. Circa meridiem cum ab ægrotantium visitatione domum redeo non
parū consternatus ob infectionem ancillæ peto, ut ad sororem suam, quæ
peste jam laboraverat, in maternas ædes secederet, illas jam tum esse infe-
ctas, matremque suam contagio mortuam, ibi omnia necessaria ipsi sub-
ministratum iri pollicens. Paruit petitioni, præscribuntur medicamen-
ta, sudat, ad maturitatem Chirurgi operâ perducitur bubo, sed carbuncu-
lus in femore refractarius fuit, amplæ & latæ maculæ rubræ totum corpus
faciemq; obsidebant, delirabat, sedato delirio tam profundæ putredinis
notæ conspiciebantur in corpore, ut impossibile fuerit vel *Æsculapio* ipsi
ipsam servare. Decimo, si bene memini, morbi die, cum paulò ante obitum
sororem suam orizam cum lacte coquere jussisset estura pulmentū illud in
advertenter efflat animam. Puerulis meis ob singularē Dei angelorumq;
custodiam nihil mali obtigit, nec mulieri in eodem lecto ancillæ accuban-
ti. Erat juvencula & plena humorum pravorum, temperare sibi non po-
terat ab usu lardi crudi, præsertim manè loco jentaculi, firmiter sibi ima-
ginans propter pinguitudinem minus hære posse in corpore adventu-
rum contagium. Verùm caro suilla tempore pestis in universum damna-
tur, tum propter ingentem in putredinem inclinationem, tum humidita-
tem, quâ scatet præ carne reliqua, cùm potius hoc tempore corpora sicca
facere unusquisq; studere debeat sedulò : & tempore pestis tanquam
mors ipsa, caro porcina fugienda Capelluti consiliò. Interim alio
tempore, & modicè sumpta quin laudabilem & uberem succum gene-
ret, cum inter *εὐπεπτα, εὐχύμα, μόνιμα & πολυτρόφα* connumere-
tur, inficias ire minimè possumus, vel saltem Galeni, fautoris
suillæ carnis, pluribus in locis
testimonio.

OBSERV. CLXIII.

Virgo viginti præter propter annorum, invalido aliàs corpore & morboſo, peſtem contrahit, quæ bubonibus carbunculisque ſe manifeſtabat, multum dormiebat, taciturna erat, nec de morbo quicquam adſtantibus querebatur, decubitus quoque informis, ſudor præ animi impotentia nullus. Mater contra, quæ eodem tempore decumbebat, liberius loquebatur & præmeditatè, morbum bene ſentiebat, ſecus ac filia, æſtuabat, parum dormiebat, carbunculum unum habebat & bubonem, ſudat monitisque omnibus parebat. Hæc brevi moritur, filia ad plures dies ægrotans tandem ex fatali morbo planè plenèque eluctatur. Ita ludit sæpe peſtis, ut quale inſtituas prognosticum, incertus omnino ſis.

XVII. Sept.

OBSERV. CLXIV.

Vir annos ſupra quinquaginta natus levi corripitur horrore & dolore capitis tolerabili, bubo erumpit in inguine, ſomnus paucus, ἀπορία adeſt, virium tamen non omnimoda deſectio, interdum obambulabat in cubili palliolo confuſe conſectus, & quia ær aſterior jam erat externumque frigus ægrotis inimicum, carbonibus vivis id alterabant, & ita absque ullo graviore ſymptomate liberatur. Declinante morbo uxor ipſius graviore corpore ventreque magis diſtento, quam mariti habitus, affigitur eodem malo acerrimè, æſtuat multum, calor fortis, carbunculis inſicitur bubonibusque, rarò ſentit ſomni clementiam, appetitus planè deſicitur, periculoſè ad aliquot dies decumbit, tandem poſt tres ſeptimanas evicit inſultantem hoſtem. Simul ægrotabat ejus filia major, plurimum primis tribus diebus dormiebat, ita ut parum medicamenti in ipſius cura efficere potuerimus, ſopore profundo liberata alterum dolebat crus, bubo in inguine tangitur, alacrior fit, omnis mortis metus diſpellitur & absque labore ſaneſcit.

XIX. Sept.

OBSERV. CLXV.

Virgo egregiæ formæ clariſque parentibus nata, & *Ἀμείνη πρὸς ἔρωτα καὶ ἡδέα κύπριδος ἔργα*
ſam matura ad amorem & jucundas Veneris res,
 etiam vulgariter hoc graſſans malum experitur, horrorem patitur cum levi capitis dolore, anxietudine premitur magna, floridus & nitens corporis facieiſque ſtatim perit calor,
Cujus ſic tanta eſt retinendi cura decoris
 vomit non enormiter, vires citò collaſcunt, ſtatim inſicitur Clyſter, ſecatur

XIX. Sept.

catur vena tali, sudorifera præscribuntur non omnis alexipharmacis roborantibus. Nil proficimus. Menses qui non multum ante consuetum naturæ cursum observaverant, paucis sui præsentiam nunc iterum indicant, tertio die placidè expirat.

OBSERV. CLXVI.

XIX. Sept.

Civis consistentis ætatis corripitur, nescio quibus, molestiis circa ventriculū imprimis & cor, non poterat explicare satis. ubi calceus ipsū urgebat, non dolor capitis, non bubo, non carbunculus, somnus paucus erat & interruptus, calor mitis. interim in lecto se detinebat, sed decubitus incertum servabat, lecti opera se non posse pati dicebat, appetitus sicci nullus, sitiebat modicè & cerevisiam nostratam cum intrito pane sorbebat, non nihil vomebat. Cum de suspecto malo ipsum admonerem, seque ut operiret optimè & sudaret juberem, risu consilium excepit, firmiter credens rem omnem omnis periculi fore expertem. Tercio die cum venio ipsum visitatum, jam abierat ex hominibus non advertentibus vel ipso ægotante vel adstantibus domesticis.

OBSERV. CLXVII.

XX. Sept.

Fœmina quædam tres tantum menses gravida abortit ex manifesta causa. Linum hæc ex agro procul ab urbe sito suas jubet evellere, evulsūque curru in urbem vehi curans una se ipsam invehi postulat: annuitur postulato, cumque per pagum quendam esset eundum, rustici rusticæque more solito frigida affatim ipsam in curru perfundunt, unde de improvviso territa domūque vecta patitur abortum, lecto detinetur aliquot diebus, tractatur partim ut infecta grassante malo, partim cura generali, quæ debetur ejusmodi ex abortu laborantibus, lochiorum fluxu immodico cessante cessat omnis morbus, integrèque restituitur nullo alio graviore symptomate ipsam infestante. Tribus hebdomadis elapsis iterum morbo affigitur & quidem verâ peste, carbunculum accipit, sed quia priore fluxu nimio corpus multis excrementitiis humoribus purgatum, saburrâque onerata natura se liberaverat, succedentem noxam levius tulit, citiusque sine multo incommodo expulit, atque in pristinum valetudinis statum brevi ipsa restituitur. Contra ejus maritus gravissimè laborat, aliquot carbunculis in pene, imo ipsa glande enatis, æstuat ejus corpus valde, hinc inde illud volutat, certo loco quiescere nesciens, delirabat, nudo corpore jacebat, nec diu imposita stragula patiebatur, hinc nullus sudor sperandus erat, solis alterantibus & alexipharmacis rem omnem peragere nobis relinquebatur, Dei beneficio & ope naturæ intentata

tentata certæ mortis spicula eludit, hodienu[m] optimè valens. Misera
alioquin erat harum ædium facies, liberi omnes ægrotabant, quidam
moriebantur ex illis, & ex domesticis aliis unus alterque. Puer septem
annorum instar mortui jacebat maculis rubris purpureis livescentibusq[ue];
undique oblitus, tamen evasit.

OBSERV. CLXVIII.

XXI. Sept.

LAnii uxor gravissimè decumbit peste, bubo sub axilla est sinistra,
carbunculos in pectore aliisque corporis partibus habet, univer-
sum corpus viribus exhaustum erat, somni absentia, mens immota
maebat, nec vomitus, nec sitis multa. Sedulo curatur ad quatuor-
decim usque dies, tunc & mihi aliisque restituta videbatur integræ sanita-
ti. Verum præter expectationem omnem recrudescebat malum ex externa
causa & animi quodam affectu concitatore, altero die moritur omnibus
admirantibus inque vado illam ponentibus. Quid affectus animi sive
παθήματα valeant in corporibus nostris alterandis & corrumpendis,
notius est, quàm ut hinc operosè id congeram.

OBSERV. CLXIX.

XXII. Sept.

Bibliopolæ viduæ puellam unicam à peste reliquam in aliam adhuc
puram domum ad cognatam ire compellit, ne in propriis impuris
ædibus scintilla illa micans exstingeretur. Non diu ibi moratur,
& ecce carbunculo in femore inficitur cum repentina virium exolu-
tione, ex nigrore livescebat anthrax, non attollebatur, serum tenue fun-
debat, quod pessimum est signum & lethale carbunculorum, moritur.
Ita paucis septimanis omnibus suis liberis orbata est mæsta aliàs vidua.
An in maternis ædibus contraxit venenum proprioque gestavit in cor-
pore hostem internecinum? An aliunde & apud cognatam primò in-
fecta est? posterius non videtur, nec enim vel antè vel post puellæ mor-
tem quisquam in ista domo decubuit, multo minus morti cessit.

OBSERV. CLXX.

XXVI.
Septemb.

UXor Decemviri incipit malè habere ex tactibus infinitis & coangu-
statione quasi cordis, non vomitum, non horrorem saltem sensibi-
lem patitur, nec bubo, nec carbunculus, erumpit, nec macula ulla.
Non pestem esse hinc inde conatur probare argumentis patiens,
seque pluries uterinis flatibus & hinc distentionibus ventris vexatam
narrat. Penè me in suam sententiam protraxerat, tamen ob alexiphar-
macorum cum uterinis mixtorum usu non abstinui, tertio die adstanti-

bus non advertentibus somno consopitur sempiterno. Peste hanc sublatam è medio luculentò demonstrat subita mors, quam uterini flatus nullis prægressis gravibus symptomatibus inferre minimè potuissent, & præter rationem virium lapsus. Ita vel etiam tutissimis non fidendum.

OBSERV. CLXXI.

XXVII.
Septembr.

Sutor infirmæ aliàs valetudinis, & qui sæpe dolorem pungentem experiebatur sub mammilla sinistra cum parvo cuti concolore tumore tactum vix ferente, (qui tamen uno aut altero die ad dorsum & ventrem pergens purgante medicamento, carminantibus & unguento Alth. cum sem. Cymin. ol. Chamomill. & Spir.urin.volatili facile tolleretur ex toto quæ cessabat) corripitur carbunculo in ipsa illa parte pectoris, quâ aliàs dolorem illum senserat. Ille veteri malo & consueto se correptum autumanstardiùs medicinam adhibet huic funesto malo, accedentibus enim cordis anxietate ingenti, virium dejectione, ἐφιδρώσει, tertio die naturæ satisfacit. Paucis ab hujus morte tota ejus familia contagio absumitur.

OBSERV. CLXXII.

XXIIX.
Septemb.

Hactenus sat atrociter sævitum in viscera nostrum est, sed ex divina misericordia longè latè quæ disseminatum venenum de sua virulentia & vehementia circa hæc tempora non nihil remittebat, indies quæ ægrotantium numerus minuebatur. Hinc observare est, quandoque & morbis fatales sui ortus & occasus esse terminos. Verum res meas accessus quæ ad ægrotantes periculosiores fore valde metuebam, cum jam non in libero & patente aëre, sed concluso & hypocauftis concalectis visendi essent ægri. Hoc tempore in viros & sexum virilem, cui Numinis benignitas hætenus multum pepercerat, magis sævire videbatur pestis, quæ ante foeminis puellis quæ satis superciliosè insultaverat. Vir Sexagenarius robustus horrorem passus erat mediocrem cum subsequenti modico calore, non æstuabat, non dolebat caput, non vomebat, pacata videbantur omnia, carbunculus nullus, nec ullus in locis emunctoriis bubo, in brachii tamen sinistri musculo, qui Anatomicis dicitur brachium extendentium primus seu longus, tumor durus non admodum elatus, sed latus, indolens reliquæ quæ cuti concolor visebatur: similis tumor subnascebatur mento. Quid esset ambigebatur, Chirurgus aliàs satis exercitatus senex quæ primò pestem esse negabat, cui consentiebant & alii domestici: Contra ibam Ego demonstrans satis firmiter veram esse pestem, contestabantur eam & appetitus dejectio, virium defectus, pulsus

pulsus celerior, ἀγρυπνία, alia. Verum quod mireris, & quod ut singulare notes, est, quod bubo in medio musculo supra cubitum, ubi glandulae nullae sunt, sedem fixerat. Alterum, quod observes est, quod neuter ad maturitatem deduci potuerit etiam optimis & efficacibus medicinis, nec discussoria medicamenta vel tantillum eorum imminutionem promoveri valuerunt, sed sola natura & temporis longinquitas tandem medelam refractariis hisce tumoribus invenerunt, venenumque superarunt alias vix superabile, tumoresque consumpserunt salvo ad aliquot annos viro sene, nunc autem mortuo.

OBSERV. CLXXIII.

Vir constantis ætatis & habitus haut illaudabilis horrore corripitur & levi capitis dolore, sumit medicamenta domestica, sudat, altero die me vocari jubet. Invenio ipsum pro morbi magnitudine satis valentem viribus, jacebat in scamno, sine labore se erigebat, bene ratiocinabatur, cerevisiam juxta se positam cum pane & orbiculis Citri pomi habebat, non carbunculus, non bubo in conspectum se dabat, saltem de interpolata corporis anxietate querebatur, præscribo sudoriferum & cordiale, sequenti die eo ipsum visitatum, tunc agonizantem ipsum deprehendo eaque horam animam efflaturum. Sic sæpe fallit pestis cautos incautosque.

XXVIII.
Septemb.

OBSERV. CLXXIV.

Vir fortis corpore & valens, sed animo præ mortis metu molli, laborat peste, multum æstuat, bubonem habet sub humero, jactat corpus, insomnis est. Cum accedo ad eum valde febricitare ipsum offendo, multum & indefinenter loquebatur, non tamen ἀλογία. Aureos, si sanarem se, promittit montes; bene sperare ipsum jubeo, interim omnia ad interitum inclinabant, cumque animadverteret, medicamentis parum effici, quodam die aliquot cantharos cerevisiae nostratis Mummianæ (salubris alias potus) avidè bibit ad ebrietatem ferè usque ut referebatur, sperans sic vi & copiâ liquidi vim pestis elusum iri & fractum; Verum tantum abfuit, ut fregerit, vel saltem debilitaret venenum, ut multo magis obruerit suffocaveritque eluctaturum calidum nativum, brevi que mortem oppetierit.

XXVIII.
Septemb.

OB-

OBSERV. CLXXV.

XXIX.
Septemb.

Quid terror possit & metus in peste in superioribus notatum & ab aliis abundè doctum. Magnum quoque terrorem & repentinum etiam in ipsa peste frustra aliquando fuisse exemplis aliquot superius ostensum, & hac ipsa observatione ulterius confirmabitur. Pastor obesus ipso Michaëlis festo circa vesperam caput malè habere, altero die vocor, haut immoderatè febricitantem offendo, de Apostematis nihil apparet, de nihilo querebatur, quàm quod caleret præternaturam, in somnum semper pronus, alia accidentia aberant. Eodem tempore & ipsius filia XV. annorum corripitur, cum patre in eodem cubili cubans, statim profundo somno per tres dies & excitatu difficili obruitur, nihil in corpore apparet, postea de dolore femoris conqueritur, bubo enascitur, discussio somno delirium succedit, imo ipsa phrenitis aliquot dies durans. *Lethargum si excipiat phrenitis, salutare esse Hollerius docet in Comment. ad Coac Hippocr. l. IV. §. XXIIIX. p. m. CCXIII. non verò contra. Jacotius ibidem in suo commentario dicit: Qui ex phreneticis lethargici fiunt per resolutionem caloris nativi aut extinctionem, servari non possunt, uti etiam in hac peste non semel notatum.* Aegrè tandem admittà Chirurghi manu ex aperto arte abscessu ingens puris & saniei copia prorumpit, qui post decem tandem septimanas consolidationem recipit, interim cordialia & expellentia adhibita multa sunt. Quodam die, cum ipsi medicinam facio, mediisque inter ægrotantes cum matre & alia, quæ ipsis ministrabant, sto, Ancilla aquam ex flumine Ocra, ædes aluente satisque altè fluente, vase exceptura caput nimis inclinando præcipitem se dat in flumen, uno alteroque obscuro clamore edito forte minor filius ipsam observat, visaque ancilla penè submersa inque aqua nante ingentem clamorem excitat & horrificum, quo ad aures nostras perlato perhorrescimus omnes relictisque ægrotis accurrimus subito, & quâ arte possumus semianimem faminam extrahimus. Nulli obsuit repentinus hic terror haut absque singulari Dei providentia.

OBSERV. CLXXVI.

I. Octobr.

UXor triginta præter propter annorum legitimo tempore parturit, quarta à partu septimana horrore corripitur pestilentiali & dolore capitis, bubo oritur in inguine parvus, infestant vigiliæ, sitit vehementer, delirat, calor multus, alvus pigrescit, infantem non nisi admonita lactat, maturatur bubo, tribus hebdomadis vix ad se redit. Altera à convalescentia septimana malè caput habere infans, brevi moritur plurimis lividis maculis corpus tenerum defædantibus. Fortè suxit cum lacte

lacte materno & virus pestilens, secus ac *Salmuthus* testatur *Observationum suarum Cent. I. Obs. XCVII.* quando infans ubera matris peste extinctæ ore apprehendens suxit innocuè. Paulò post & reliqui duo liberi inficiuntur, in eorum corpore nihil observare fuit, quod monstraverit pestem, tertio à morbi invasione die ambo decedunt è vita. Puerpera hæc à servi sui peste laborantis inopinato ad se accessu perterrita malum hoc sibi enatum affirmabat; servus iste vehementer delirabat, quodam die ex fenestra superioris domus partis proripit in aliam contignationem instar somnambuli, quò pervenire absque præsentissimo vitæ discrimine aliàs impossibile ipsi fuisset.

OBSERV. CLXXIX.

Patricius procera staturæ & crassus, dum
*Brunsvigam serpunt contagia dira per urbem,
Nec non pestis atrox omnes crudefcit in horas,*

III. Octob.

reliquerat civitatem contuleratq; se cum suis in hortum suburbanum, quo vitaret, quod aliàs omnium humeris inhæsurum credebat, pestilens virus, & quàm diu ruri degit, satis salubriter ibi cum suis vixit. Cum autem asperioris pro anni tempore aëris inclementiam cum parvulis suis diutius extra igne alteratum hypocaustum asperum & durius videretur, inito consilio, cum magnam partem horrida pestis desæviisset, lares civicos petit: at, ecce, in ipsa urbis ingressu & sub porta terrore quasi panico concutitur, & de dolore capitis obtuso queri incipit. Statim advocatur medicus affinis ratusq;, quod res erat, peste ipsum tactum, antipestifera præscribit cum sudorem elicientibus, non sequitur sudor, in pejus abit morbus. Mane in consilium adhibeor, invenio patientem ferè ἀσθενος, tremulâ saltem, titubante & vix intelligibili linguâ loquentem, in somnum pronom, artubus disiectis ac si levi ἀποπληξία tactus esset, jacebat, nullum ullius ἐξανθήματος signum. Nulli pepercimus labori & curæ, quò restitueretur, verùm oleum perdidimus & operam omnem, paucorumq; dierum spatium abiit eò, quò tandem tendimus omnes, ad cælifica scilicet gaudia, mæstissimâ conjuge & liberis orphanis in hac miseria- rum valle relictis, nec ante vel post ipsius mortem quisquam istis in ædibus ægrotavit. Tardè redire licet.

OBSERV. CLXXX.

Vir consistentis ætatis, fortis corporis, & succi plenus laborabat continuo calore præternaturali tolerabili, non bubo, non carbunculus, nec pustula ulla comparebat, delirium cum risu per totum mor-
IV. Octob.

bi decursum, vigilabat, de nihilo, quod mens infirma ipsi erat, querebatur. Et hunc primis diebus alius curat medicus, cui postea me adjungi facile passus sum. Verum uterq; frustra laboravimus, licet à debita & diligenti cura non destiterimus morbo ad aliquot dies nec meliore nec deteriore reddito: tandem insensibiliter labantibus viribus lapsus & ipse planè est de statu naturali atq; ad aliam vitam migravit.

OBSERV. CLXXXI.

VI. Octob. **S**Exagenaria vidua statim initio concepti contagii mente movetur & varia sibi imaginatur, tristes & melancholica est, sæpe poscebat librum precationum, in quo porrecto parum tamen vel nihil legebat, semper aliò migrare sibi præsumebat, unde à duabus mulieribus eam custodiri necessum fuit, appetebat vehementer ardentem istum liquorem, quem aquam vitæ nominat vulgus, cujus si particeps poterat fieri, lætabunda & sitabundo ore affatim hauriebat eum. Quodam die, dum visito eam, invenio fores conclavis clausas, voce & digiti ad fores appulsu præsentiam meam significo, altera mulierum dum ostium paulatim aperit intromissura me, mox accedens ægra simul egressum efflagitat & verbis & viribus, mihiq; ingressuro in ipso limine occurrit, torvum videt, nullum verbum profert, librum suum precationum sub axilla portat. Non mediocriter consternatus improvise hoc spectro refero pedem, dummodo illam ad lectum reducant ambæ mulieres, tunc ingredior, & increpo eam minacibus verbis, promittit quietiores mores, verum omnia versa in pectus, & ex eo die ipsam non vidi, paucis post vitâ concessit.

OBSERV. CLXXXII.

IX. Octob. **V**Idua juvenis à vitæ integritate & morum elegantia commendabilis in limine domûs stans me prætereuntem intrò vocat, esse quod me velit. Intro, tum ipsa obvertit mihi cervicem suam petens ut, quid pustula illa in cervice significet, significem. Ego visâ ea, quid malum! inquit, Tu in aere rigido stas & carbunculum pestilentem in cervice geris? atque mox ut hypocaustum petat, jubeo. Dicto audiens est, porritato ventre glande præscribo sudoriferum & cordiale moderatè refrigerans, evanescit carbunculus, sed alium habebat in femoris sinistri parte externa multum doloris urendo inferentem, hunc observabat altero vel tertio die, & tum severe ægrotare sentiebat, ita ut aliquot septimanis lecto surgere præ morbi vi ipsi negaretur. Ex aperto carbunculo ulcus ingens nascebatur, quod ægrè tardeq; sui consolidationem recepit.

Aliquot

Aliquot diebus præterlapsis ad pravos & corruptos humores dejiciendos passulas laxativas sumebat cum fructu: gaudet adhuc optima & vitæ & corporis integritate claro & candido Viro nupta.

OBSERV. CLXXXIII.

V Ir annorum ἀκμήν vix attingens corripitur bubone in inguine, leviter ægrotare deprehenditur, sudat, nares sanguine stillant cum *ἐνφορεία*, ideoq; abstinuimus à secanda vena, non multum protuberabat bubo, occultò quasi obruebantur vires. Plurima adhibuimus pro conservando viro, verum omnia nemine advertente iverunt in pejus, delirium mite successit, ἀρεπνία, sitis, tremor manuum, quod funestum est signum febrium continuarum & malignarum, ostendit enim naturam ex parte victam, conantem partim adhuc consuetos edere motus. Altero ab hoc symptomate moritur die. XIII. OÆ.

OBSERV. CLXXXIV.

Uxor juvenis gravida contrahit pestem in inguine alvo sponte solutâ do sudoriferum, optimè sudat, medicamentum quod se & fructum suum confortet accipit, melius habere visa est. Postero die abortit præcedente levi iterum horrore, increscit calor multum, pro quo sedando omnem operam impendim⁹, sed haut respondente voto successu, altero die deficientibus lochiis hanc cum æterna commutat vita. XIII. OÆ.

OBSERV. CLXXXV.

DUcor ad virum quendam ex plebe, juvenem, robustum, mirè æstu- antem, aliquot dies jam decubuerat, caput faciesq; ac si ex ardente clibano extracta fuisset, præ rubore splendebat, omnia viscera incensa videbantur, etiam frigidissimis extingvere flammam istam & sedare æstum nequivimus, æstuabant ita præcordia, ut Spiritum isti præclusum iri non semel æstantes putarint, sanæ adhuc mentis erat, in corporis habitu nihil maligni comparebat. Manum à secanda vena, cum tamdiu decubuisset, ne ipse ipsum jugulasse viderer, præmeditatò abstinui, quam sectam initio morbi plurimum opis ipsi ad vasa plethorico allaturam sperasses. Postero die ponit spiritum. XIV. OÆ.

OBSERV. CLXXXVI.

VIrgo honesta viginti annorum brevi concutitur horrore, quem statim excipit capitis dolor tolerabilis: A præscriptis medicamentis bene sudat, à sudore parvus bubo sub axilla sinistra se manifestat, mediocriter habet, haut quivimus protrahere amplius paululum XIX. OÆ.

protuberantem tumorem, nec ad maturitatem perducere. Ideoque tantum expellentibus & corroborantibus insistendo tandem optimam virginem priori valetudini benedicente Deo restitimus. Vel paucum admiserat venenum hæc virgo, quæ aliàs non ita robusta videbatur, vel venenum multum remiserat à sua malignitate, erat enim in declinatione pestis, pariter ac cum incipiebat suas hinc exferere vires, non ita periculosè & crudeliter invadebat homines, ac procedente tempore.

OBSERV. CLXXXVII.

XIX. Oct.

Ancilla mercatoris vehementi affligitur febre, dolet caput, æstuat, rubet facies, irrequieta est, non dormit, mens non turbatur, statim subsequitur vomitus, quo omnia & medicamenta & alia liquida rejiciebat, nec ullo modo poterat sisti enormis iste & effrenis vomitus. Erant omnia magnæ putredinis notæ. (ex putredine omnem ferè pestem omnem suam vim deleteriam recipere putat Codrunchus Philosophus ac Medicus Imolensis libello suo de Sale Absynthii.) Tertio die animam exhalat. Omnia erant corrupta & altè veneno infecta ut vel ipsi Chironi ipsam servare *ἀδύνατον* fuisset.

OBSERV. CLXXXVIII.

XX. Octob.

Vir modestus & sedatus magnam diarrhæam incurrit cum *ἐν ποσὶ*, hinc periculi vacuus læta sperabat omnia, putans hæc vacuandi ratione omne noxium expulsum iri. Bubonem acceperat sub axilla sinistra & carbunculum in femore ejusdem lateris fluente adhuc alvo. Sistere alvum religio erat, vi propellere sudorem prohibebat motus contrarius, propinavimus tamen quæ paulatim ad cutem pellerent venenum, nec alvum morarentur, tantum hæc medendi ratione effecim⁹, ut æger erectus in lecto sedere, ridere, edere potuerit, extraq; periculum positus videretur omnibus. Carbo à chirurgo curatur, abscedit caro corrupta, absunt omnia suspecta accidentia. Nono ab invasione morbi die incipit tibia affecti cruris vehementer dolere, chirurgus flocci dolorem pendens medicinam nullam adhibet, increscit dolor, altero die Ego quædam externè applico, quæ instanti gangrænæ appropriata deprædicantur, verum frustra: lineæ rubræ in tibia conspiciebantur ad extremum usque pedem porrectæ, *ἀκίνητος* fit pes & *ἀναίσθητος*, dolor circa carbunculum jam evanuerat, vocatur alius chirurgus, secatur pes & planta ejus secundum longitudinem absque sensu, applicantur experta & aliàs efficacia remedia, sed cum nullo emolumento, hinc consilium de amputando pede

de capimus consentiente ipso ægroto sat animoso, imò urgente. Verùm quia ἀνασθησία illa & insensibilitas ad genu ferè usque perrexerat, metuen- dum omninò erat, ne pars veneni subtus cutem per venas ulterius versus Cor viam suam affectasset operationemq; nostram elusisset, & pro occi- soribus postea ab ignaris traducti fuisset, propterea prudenter à cru- deli aliàs & periculosissima abstinuimus sectione, quod remedium tamen unicum supererat, ἐς τὸ τὰ ἐξάλια νοσήματα αἱ ἐξάλαι διεγείραι ἐς ἀριβείνν κρᾶναι. Quarto die sphacelatus moritur. Ejusmodi Gangrænarum malignarum meminit Hildanus in observationibus suis medico-Chirurgicis p. m. D.C. LXXVI.

OBSERV. CLXXXIX.

Vir obesus & intemperans, cujus uxor decubuerat peste eamque haut XXI. Oct. diu superaverat feliciter, incipit ægrotare non ad consuetum pesti- lentis affectûs modum, leviter febricitabat, difficulter spiritum du- cebat, difficultas in verum asthma degenerabat cum magno sterto- re spirabat, facies ex labore spiritûs rubebat, vi sudor exprimebatur, ἐξάνθημα nullum in universo corpore, mens manebat sana. Etiam hunc peste affectum fuisse non dubito asserere, non potuit autem natura istius indicium facere in externo corporis habitu propter suppressionem vi- rium, sicuti & aliàs ferè ἀνὴρ ♂ erat ob corporis molem. Brevi sive astma- te sive peste suffocatus est.

OBSERV. CLXXXX.

Quidam ex nostris mercatoribus primarius & Patricius celebris, XXII. Oct. cum funus quoddam ad loculum suum XIX. hujus comitatus es- set, secedit paululum in pharmacopolium nostrum cum aliis iti- dem urbis nostræ Viris primariis, saltem ut de statu nostro præ- senti, & etiam de bellicis Poloniæ rebus, cùm dies iste esset, quo Tabel- larii Hamburgenses destinatò huc redibant, inter se conferrent. Accedo & Ego ad illos, trahitur sermo ad horam usque inter nos, quolibet dein domum suam repetente, & mercator ad suas se recipit ædes, in via levi horrore corripitur, quem ex aëris autumnalis circa vesperam inclemen- tia oriri suspicatus est. Verùm eo ipso vespere tres carbunculi supra genu exoriuntur purpurascens, ille haut animadvertens angvem in sinu se gerere negligentius illos tractat, putans ex arctiore ligatura hæc tu- bercula enata, abit in publicum, etiam sequenti die ad Pastorem è sug- gestu populum docturum audiendum frequentat templum. Cùm autem tertio morbi die sentiret res suas deteriores fieri me accersiri jubet, in-

venio ipsum vestibus indutum in hypocausto adhuc obambulante: remotis removendis ostendit mihi carbunculos livescentes ad modum trifolii positos, dico ipsissimam pestem esse & malè sibi prospexisse, quòd serò nimis curam eorum peteret. Alvo ad excernendum clystere sollicitatà præscribuntur expellentia, cordialia, alexipharmaca, gravibus accidentibus non torquebatur. Meliora speramus omnes, sudorem elicere non poteramus, corpus jaçtabat, dies sabbathi, qui erat sextus ab incurfione morbi, erat ipsi fatalis.

OBSERV. CXCI.

XXV. Oct. **C**ollegæ Scholæ viri eruditi & de adolescentibus scholasticis bene meriti uxor malè habet, in somnes noctes transigit, bubone afficitur inguinali, alia gravia symptomata non adsunt, brevi restituitur. Cum nondum omninò convaluit conjux, horrore levi corripitur & maritus ejus, bene sudad, & arte & naturâ, in corporis habitu nihil conspiciebatur pestilentis, optimè discurrebat, nec valde languebat, tertio die delirat, torvum videt, caligas induit, ambulat in domo. Multa adhibuimus ut servaremus hunc virum, verùm non cessante delirio medicamenta ad libitum & debitum exhibere nequivimus, propterea paucis diebus mors vitæ filum ipsi abscindit.

OBSERV. CXCII.

XXV. Oct. **P**uella novem annorum omne, quod ore accipiebat, eadem reddebat viâ, sive liquidum id fuerat, sive solidum, bubo aut carbunculus nullus, saltem capitis dolor & febris mitis cum incessabili vomitu. Hic frustra laborâsses in procurando vomendi appetitu. Paucis diebus tenerum corpus animâ sua privabatur. Sanè si, quod res est, dicendum, non omninò abhorreo ab emeticis in peste, præsertim in corporibus cacochymicis, ad præcordia non nimium æstuantibus, & qui præservando corpora sua non fecerunt sicca, & ad quos præporè & statim post ipsam accessionem accesseris, adhibuerisque lenissima, vel quæ saltem nauseam excitare apta competeris, sine magno enim conatu & labore sequetur vomitus optatus.

OBSERV. CXCIII.

1. Novem. **S**artoris cujusdam uxor juvencula multo corripitur capitis dolore & calore præternaturali, statim omnia membra languent, cessat capitis dolor, in cujus locum succedit nimietas somni, sub axilla enascitur parvus bubo & carbunculus in fronte ruber, rubet admodum
facies

facies, cordis angustia tenetur laboriosâ, præ cuius vehementia sudorem prolicere nequibamus, alexipharmacis & febrem alterantibus medicamentis res agebatur omnis. His ipsis diebus & maritus itidem juvenis corripitur horrore, sub utraque axilla oritur bubo magnus, primo & secundo die lecto se committere nolebat, partim quod fidebat multum corporis robori, partim ut dulcissimæ conjugis operâ sua semper adesset. Verum vi morbi fractus diu dein lecto surgere nequivit ruptisque bubonibus satis longum tempus in ipsorum curatione fuit consumptum, uterque feliciter intentatam mortem effugit.

OBSERV. CXCV.

Puella decem præter propter annorum nauseâ tentatur & inani vomendi conatu, cui se adjunxerat ingens cordis angustia. Accurrunt illicò auxilium petitori, atque ut motum istum juvarem unicè efflagitant. Obtempero precibusque ipsorum indulgens leve emeticum præscribo, quo assumpto tantum abfuit, ut voti compotes se factos crediderint, ut etiam jam morituram puellam certò sibi persvaserint ex intolerabili & præclusura fauces angustia & cordis anxietate, quâ corporis cum morbo lucta superatâ erupit carbo in pectore, exin cessavit vomitus cordisque coangustatio breviq̃ integrè convaluit.

OBSERV. CXCV.

Puella duodecim annorum, cum ferè jam desævierat contagium, à vicini, cujus liberi omnes ante VI. septimanas peste erant extincti, rogatur, ut sibi collare, (vel aliud quid) ministerio ejusmodi à suis destitutæ, in tergo acubus firmaret. Illa memor præteritorum cunctatur parum, alterâ vocatur vice, it effectum datura, quod petierat vicina, timidiuscula puella: cum tremore acus tangit, & citò expedit, quod erat rogata, domumque reversa horrore corripitur lectumq; petit, quarto die moritur. Laboraverat jam octo dies alvi fluxu, uti narabant parentes, qui tamen fluxus lecto illam non affixerat, continuavit ille ad ultimam rerum lineam. In corpore nihil poterat notari vel tactu vel visu, quod pestem proderet, nec dixerim Ego eâ illam è medio sublata, ne huic præ illa favere dicar, judicent alii, quibus hæc res parum negotii est datura.

OBSERV. CXCVI.

Adolescens, cujus uterque parens peste dudum decesserat opimâ hereditate relicta, immani torquetur capitis dolore & nausea, portatur

tur in aliam domum, in qua diu nemo habitaverat, puraque erat ab infectione. Accersor crepusculo vespertino, offendo eum valde æstuantem & magnâ febre detentum, vomebat frequenter, jactabat corpus, sudabat sed symptomaticè & præ morbi vehementia, color faciei vividus omnis perit, medicamentis ne hilum proficiebamus, facies fit cadaverosa, moritur tertio die. Ad eundem planè modum XII. hujus lethaliter decumbebat Consul's quondam filius juvenis absque vomitu tamen, cujus etiam facies primo statim die in Hippocraticam mutabatur figuram, & huic tertius morbi dies fuit fatalis. Non memini quenquam servatum, cui initio morbi floridus faciei color omnis periit.

OBSERV. CXC VII.

XVI. Nov.

Matronam honestam primariam, cujus ancilla iisdem diebus vehementissimè peste afflicta decumbebat cum vomitu enormi & lethali, leviusculè & cum paucò horrore pestis invadit, sub axilla sinistra parvus bubo accuratè tangenti occurrit, & carbo in mamma sinistra superficialis, neuter debito modo exire ac maturescere visus discutientibus curatur, sed remanebat in mamma duriusculus ille parvus tumor sine omni molestia inde percepta adusque ferè festum paschatos sequentis anni, tunc videbatur maturari, paululum increfcebat, & venula ad axillarem tendens purpurascebat: Hinc illa aliquid monstri sibi portendi inq; cancrum abiturum hunc abscessum verita mihi multum reclamanti fidem non adhibet, sed alios scilicet externos adit eosq; in consilium adhibet. Illi ut incipientem cancrum abscessum tractant tum intus, tum foris medicamentis cancrose dispositioni contrariantibus, efficitur nihil, tum iterum meæ Chirurgiq; prioris curæ se committit, & sine multo labore ex tumore nonnihilichorose & purulente materiæ profluente brevi restituitur integrè. Bene adhuc valet.

OBSERV. CXC VIII.

XIX. Nov.

Vir sexagenarius quadratus leviter horret cum tolerabili capitis dolore, in genu accipit carbunculum parvum, aliàs nihil exit è corpore, mediocriter se habet, ad sudorifera bene sudat, appetitus non planè dejicitur, optimè ratiocinatur, vigiliæ nonnihil molestant, & sitis, quibus obviam ivimus medicamentis haut sine fructu. Protrahebatur morbus, & vires insensibiliter imminuebantur, quod cum animadverteret ægrotans rebus suis eò rectius prospecturus testamentū condit, obsignat & me præsentem delegatis à Senatu è lecto surgens per fenestram id porrigit, eodem vespere mortem oppetit.

OB-

OBSERV. CXCIX.

Hujus filius, cujus uxoris CLXXVII, graviter laborantis *fe- 1. Decem.*
 cimur mentionem, nimia somni dulcedine tenetur, sine
 vomitu, sine capitis dolore, sine exanthematis ul-
 lis. Erat vir boni habitus, & si verum est axioma medicorum:
 (quod Ego ubique verum nego) Talis in cute efflorescit color,
 qualis in corpore sanguis abundat, hic certè sanissimus fuit. De-
 pulso somno tremor omnium artuum succedit, lingua balbutiens,
 error mentis, brevi moritur. Plurimum sudabat & arte & naturâ,
 quia corpus raræ erat texturæ, molle & humidius. Decumbenti
 Patri suo aderat frequenter, imò unà cum alio, qui pestem supe-
 raverat, potando ad lectum sedebat in noctem intempestam, con-
 tra quàm ipsi suaseramus & Ego & uxor ejus; verum pietatem ob-
 jiciebat filialem, & se malle quicquid perperi & periclitari, quàm
 patrem deserere senem.

OBSERV. CC.

Scholasticus juvenis Senatoris filius incipit ægrotare, ex qua *II. Decem.*
 tamen causa & ubi corpus laboret, non poterat directè expri-
 mere; corpus omne languidum erat & segne, nihil dolebat,
 nihil in corporis habitu, quo quicquam pestilentis aut præterna-
 turalis potuisset probari, conspiciebatur, interim lecto se commit-
 tit, appetitus imminuitur, urina ex toto supprimitur, quod tamen
 primo & secundo die non animadvertibat, ἀναίσθητος quidam labo-
 rabat vesica, nihil urgebat urina, non dolor circa pubem, non tu-
 mor nec ardor. Multa abhibuimus, ut proliceremus diutius re-
 tentam urinam, etiam secta vena brachii est, sed irrita fuere o-
 mnia. Postea adhibitus lithotomus est, credebant enim vesicæ
 calculo ipsum laborare, moritur postquam ad minimum octo dies
 stagnaverat urina. Non judicâsem peste hunc affectum, nisi si-
 mile quid in superioribus observâsem. Quàm terminum ponant
 medici ἰατρία, sive potius morti exsurgenti à suppresso lotio, non
 omninò certum. Vide *Cl. Tulp. Obs. l. II, Obs. XLIII. XLV.*

O

OB-

OBSERV. CCI.

Cum declinabat pestis multumque remiserat à truculentia sua ab uno aut altero commendatus quidam erro, militaris quondam tonsor, sycophanta & nugator, qui aliâ ratione se suosque alere nesciebat, ex mera, ut puto, audacia, aut rerum suarum inopia pulsus huc venit pollicens certa & indubitata contra pestem remedia. Admittitur, à plebe, quæ major pars civitatis esse solet, in consilium auxiliumque, ut fieri assolet, adhibetur, quid autem præstiterit singulariter, ignoratur. Unicum saltem referam, quod in virgine, quæ meæ se subjecerat curæ, patravit. Quando vocabar ad eam, multum æstuabat, facies præ rubore splendebat, anxietas magna. Impero sudoriferum, sudat, dein vena ut secetur, suadeo, abeo. Me absente, nescio cujus mulierculæ suasu, & hic vocatur, rejicit medicamenta mea præscripta suaque ipsi commendat de meliori, quod dicitur, nota: Sumit de istis nonnihil, ab assumptis vomit enormiter, nigra *ἄνω καὶ κάτω* reddit, brevi moritur, atque ita incauta virgo temeritatis suæ pænam luit.

Non tali auxilio, nec defensoribus istis

Tempus eget.

Tonsor iste postea laudabili mehercules Magistratûs mandato urbe exire jussus est.

OBSERV. CCII.

Pastor, cujus domum etiam invaserat Pests ancillamque ejus prostraverat, necique propè dederat, quæ tamen venesectione, sudorificis, & alterantibus liberata est, noctu somniat sibi minimum dextræ manûs digitum à cane nigro dentibus appeti morderique, quem morsum ut elideret aut declinaret adhuc alto somno sopitus Pastor magno conatu manum ad spondam allidit, quo motu & dolore expergefactus nonnihilque alteratus contemplatur digitum, maculamque in ejus medio articulo nigricantem observat. Uxorem accubantem celat hoc bono consilio, & saltem præservationis gratiâ sudoriferum medicamentum sumpturum se simulat, sudat optimè bis tervè assumpta Tinctura bezoartica
lenâ

venâ ab Cl. Mœbio dono ipsi missâ. Officio pastorali ita jubente, cum non admodum ægrotaret, exit suâ domo sacraque publica peragit. Quodam die ædes ejus prætereunti mihi monstrat digitum, tum Ego: Et tu habes ægrum digitum? Cura, ut valeas, carbunculus est, qui digito tuo insidet, consilioque meo exposito discedo. Optimo adhuc per Dei gratiam rerum suarum statu gaudet.

OBSERV. CCIII.

TEmpore, quo Frisii boves quotannis huc veniunt circa Galli diem, ut vendantur scilicet, quidam senex ad duo stadia extra portam se confert visum eos, propter contagium enim urbem ingredi prohibebantur. Domum rediens senex ob aëris rigiditatem & inclementiam alget, sed nauci habens hoc frigus vespere lecto se committit nihil sequius cogitans. Manè adest insignis virium imbecillitas ex nulla manifesta causa, art⁹ & membra omnia quasi delassata erant, brevi post succedit stillicidium urinæ sanguinolentum, increscit id & nullo medicamine poterat sisti vel in melius mutari, cætera securus jacebat. Imaginabatur sibi ex hernia intestinali, quâ plures annos affligebatur, omne hoc, quicquid præter naturam sibi accidebat, provenire. Curavimus hominem sedulò, sed sanare non erat in nostra potestate. Sine dolore ullo & graviore accidente animam suam immortalem reddidit ei, à quo eam acceperat, immortalis Deo. Unde fundatur sanguis mejendo, & quomodo id discernendum sit, videre est apud Heurn. in Comment. Aph. Hippocr. sect. IV. Aph. LXXIIX. Pertinet & huc Aph, XXXIX. sect. VII.

F I N I S.



